

欲爭晨暝不如從我遊高論發犀柄溪南渡橫木
山寺稱小徑太平寺俗號小徑山幽尋自茲始歸路微月映
南望功臣山雲外盤飛磴三更渡錦水再宿留石
鏡緬懷周與李能作洛生詠明朝二子至詩律嚴
號令籃輿置紙筆得句輕千乘玲瓏苦竒秀名實
巧相稱九仙更幽絕笑語千山應空巖側破甕飛
溜灑浮磬山前見虎跡候吏鏡鼓競我生本艱竒
塵土滿釜甌山禽與野獸知我久贈蹙笑謂候吏
還禦虎吾有命徑山雖云遠行李稍可併頗訝王
子猷忽起山陰興但報菊花開五當理歸榜

汪覃秀才久留山中以詩見寄次其韻

季子應嗔不下機棄家來伴碧雲師中秋冷坐無
因醉半月長齋未肯辭擲簡揮毫無忤色汪善書託寫衆
人詩投名入社有新詩飛騰桂籍他年事莫忘山中
採藥時

再遊徑山

老人登山汗如濯到山困卧呼不覺七來五鼓日
三竿始信孤雲天一握古語云孤雲兩角去天一握平生未省
出艱險兩足慣曾行學確含暉亭上望東溟凌霄
峰頭挹南岳共愛絲杉翠絲亂誰見玉芝紅玉琢

白雲何事自來往明月長圓無晦朔山有白雲塚
上雞鳴猶憶欽山前鳳舞遠徵璞雪窓馴鬼元不
死煙嶺孤猿苦難捉從來白足傲死生不怕黃巾
把刀槩榻上雙痕凜然在劔頭一呌何須角以上
中故嗟我昏頑晚聞道與世齟齬空多學靈水先
除眼界花清詩為洗心源濁騷人未要逃競病禪
老但喜聞剥啄此生更得幾迴來從今有暇無辭
數

洞霄宮

上帝高居愍世頑故留瓊館在凡間青山九鎖不

易到作者七人相對閑

論語云作者七人
矣今監宮凡七人

庭下流

泉翠蛟舞洞中飛鼠白鴉翻長松怪石宜霜鬢不
用金丹苦駐顏

初自徑山歸述古召飲介亭以病先起

西風初作十分涼喜見新橙透甲香遲暮賞心驚
節物登臨病眼怯秋光慣眠處士雲庵裏倦醉佳
人錦瑟旁猶有夢迴清興在卧聞歸路樂聲長
明日重九亦以病不赴述古會再用前韻

月入秋帷病枕涼霜飛夜簾故衾香可憐吹帽狂
司馬空對親春老孟光不作雍容傾座上翻成翫

辭倚門旁人間此會論今古細看茱萸感歎長

九日尋蘇閣梨遂泛小舟至懃師院二首

白髮長嫵歲月侵病眸無怕酒杯深南屏老宿閑
相過東閣郎君懶重尋試碾露芽烹白雪休帶
藥嚼黃金扁舟又截平湖去欲訪孤山支道林
湖上青山翠作堆葱葱鬱上氣佳哉笙歌叢裏相
身出雲水光中洗眼來白足赤髭迎我笑拒霜黃
菊為誰開明年桑苧前茶處憶著衰翁首重廻皎然
有九日與陸羽煎茶詩不日遊
桑苧翁余來辛九日去此久矣
九日舟中望見有美堂上魯少卿飲處以詩

戲之

指點雲間數點紅笙歌正擁紫髯翁誰知愛酒龍
山容却在漁舟一葉中

西閣珠簾卷落暉水沉煙斷佩聲微遙知通德淒
涼甚擁髻無言怨未歸

遊諸佛舍一日飲醞茶七琰戲書懃師壁

示病維摩元不病在家靈運已忘家何煩魏帝一
丸藥且盡盧仝七椀茶

九日湖上尋周李二君不見君亦見尋於湖
上以詩見寄明日乃次其韻

湖上野芙蓉含思愁脉脉始然如靜女不肯傍阡陌
詩人杳未來霜艷冷難宅君行逐鷗鷺出處浩
莫測葦間聞擘音雲表已飛屐使我終日尋逢花
不忍摘人生如朝露要作百年客喟彼終歲勞幸
茲一日澤願言竟不遂人事多乖隔悟此知有命
沉憂傷魂魄

送杭州杜戚陳三掾罷官歸鄉

秋風撼上鳴枯蓼船閣荒村夜悄悄正當逐客斷
腸時君獨歌呼醉連曉老夫平生齊得喪尚戀微
官失輕矯君今憔悴歸無食五斗未可秋毫小君

言失意能幾時月啖蝦蟇行復皎殺人無驗中不
快此恨終身恐難了徇時所得無幾何隨手已遭
憂患繞期君正似種宿麥恐饑待食明年麥

次韻周長官壽星院同餞魯少卿

瑠璃百頃水仙家風靜湖平響釣車寂歷疎松欹
晚照伶俜寒蝶抱秋花困眠不覺依蒲褐歸路相
將踏桂蕊更著綸巾披鶴氅他年應作畫圖誇

次韻述古過周長官夜飲

二更鐃鼓動諸隣百首新詩聞八珍已遣亂蛙成
兩部更邀明月作三人雲煙湖寺家上境燈火沙

河夜上春曷不勸公勤秉燭老來光景似奔輪

述古以詩見責屢不赴會復次前韻

我生孤癖本無隣老病年來益自珍肯對紅裙辭
白酒但愁新進笑陳人北山怨鶴休驚夜南畝巾
車欲及春多謝清詩屢推轂豨膏那解轉方輪詩來

齋雲霄蒲
輔之句

金門寺中見李留臺與二錢惟演唱和四絕

句戲用其韻跋之

帝城春日帽簷斜二陸初來尚憶家未肯將鹽下
尊菜已應知雪似楊花

生平賀老慣乘舟騎馬風前怕打頭欲問君王

符竹但憂無蟹有監州詩世所傳

西臺妙迹繼楊風式無限龍蛇浴寺中一紙清詩

弔興廢塵埃零落梵王宮

五季文章墮劫灰升平格力未全回故知前輩宗
徐庾數首風流似玉臺

胡穆秀才遺古銅器似鼎而小上有兩柱可
以覆而不蹶以為鼎則不足疑其飲器也胡
有詩答之

隻耳獸齒環長唇鴛鴦喙三趾下銳春蒲短兩柱

向張秋茵細君看翻覆俯仰間覆成三角翻兩髻
古書雖滿腹苟有用我亦隨世嗟君一見呼作偶
纔注升合已漂逝不如學鴟夷盡日盛酒真良計
古有篆五
字不可識

賀陳述古弟章生子

鬱葱佳氣夜克間始見徐一弟二雛甚欲去爲湯
餅客惟愁錯寫弄麈書參軍新婦賢相敵阿大中
郎喜有餘我亦從來識英物試教啼看定何如

贈治易僧智周

寒窓孤坐凍生餅尚把遺編照露螢閣東九師新

得妙夢吞三書舊通靈斷絃挂壁知音喪

師與染
高深相

知時已
逝矣揮塵空山亂石聽齋罷何須更臨水胸中
自有洗心經

張子野年八十五尚聞買妾述古今作詩

錦里先生自笑狂莫欺九尺髯眉蒼詩人老去鷺
鷺在公子歸來燕忙柱下相君猶有齒江南刺
史已無腸平生謬作安昌客略遣彭宣到後堂

書雙竹湛師房

我本江湖一釣舟意嫌高屋冷飈上羨師此室纔
方丈一炷清香盡日留

暮鼓朝鐘自擊撞閉門孤枕對殘缸白灰旋撥通
紅火卧聽蕭上雪打窓

寶山新開徑

藤梢橘刺元無路竹杖櫻鞋不用扶風自遠來聞
語笑水分流處見江湖回觀佛國青螺髻踏遍仙
人碧玉壺野客歸時山月上棠梨葉戰顛禽呼

和述古冬日牡丹

一朵妖紅翠欲流春光回照雪霜羞化工只欲呈
新巧不放閑花得少休

花開時節雨連風却向霜餘染爛紅漏泄春光秋

一物此心未信出天工

當時只道鶴林仙能造秋花發杜鵑誰信詩能迴
造化直教霜枿放春妍
不分清霜入小園故將詩律變寒暄使君欲見藍
關詠更倩韓郎爲染根

和錢安道寄惠建茶

我官于南今幾時嘗盡溪茶與山茗胸中似記故
人面口不能言心自省爲君細說我未暇試評其
略差可聽建溪所產雖不同一天與君子性森
然可愛不可慢骨清肉膩和且正雪花雨脚何足

東坡全集 卷之五 十六
道啜過始知真味永縱復苦硬終可錄汲黯少齋
寬饒猛草茶無賴空有名高者妖邪次頑憤體輕
雖復強浮泛性滯偏工嘔酸冷其間絕品豈不佳
張禹縱賢非骨鯁葵花王轉不易致道路幽峻隔
雲領誰知使者來自西開緘磊落收百餅嗅香嚼
味本非別透紙自覺光炯炯粃糠團鳳友小龍奴
隸日注臣雙井收藏愛惜待佳客不敢包裹鑽權
倖此詩有味君勿傳空使時人怒生癭

和柳子王喜雪次韻仍呈述古

詩翁愛酒長如渴餅盡欲沽囊已竭燈青火冷不
與君鬢鬢葛不走投陳孟公有酒醉君仍飽德瓊
瑤欲盡天應惜更遣清光續殘月安得佳人擢素
手笑捧玉盃兩奇絕豔歌一曲迴陽春坐使高堂
生暖熱

弔天竺海月辯師三首

欲尋遺跡強沾裳本自無生可得亡今夜生公講
堂月滿庭依舊冷如霜
生死猶如臂屈伸情鍾我輩一酸辛樂天不是蓬
萊客憑仗西方作主人

東坡全集 卷之五 十一
欲訪浮雲起滅因無緣却見夢中身安心好住王文度此理何須更問人

李願秀才善畫山以兩軸見寄仍有詩次韻
答之

平生自是箇中人欲向漁舟便寫真詩句對君難出手雲泉勸我早抽身辛來白髮驚秋速長恐青山與世新從此北歸休悵望囊中收得武林春雪後至臨平與柳子玉同至僧舍見陳尉列落帆古戍下積雪高如丘強邀詩老出踈髯散颺颺僧房有宿火手足漸和柔靜士素寡言相對自

忘憂銅鑪懼煙穉石鼎浮霜漚我行雖有程坐穩且復留大哉天地間此生得浮遊

夜至未樂文長老院文時病退院

愁聞巴叟卧荒村來打三更月下門往事過年如昨日此生未死得重論老非懷土情相得病不關堂道益尊惟有孤栖舊時鶴舉頭見客似長言

柳氏二外生求筆迹

退筆成山未足珍讀書萬卷始通神君家自有元和脚莫厭家雞更問人

一紙行書兩絕詩遂良鬚鬢已如絲何當火急傳

家法欲見懸誠筆諫時

錢安道席上令歌者道服

烏府先生鐵作肝霜風卷地不知寒猶嫌白髮年
前少故點紅燈雪裏看他日卜隣先有約待君投
綬我休官如今且作華陽服醉唱儂家七返丹

除夜野宿常州城外二首

行歌野哭兩堪悲遠火低星漸向微病眼不眠非
守歲鄉音無伴苦思歸重衾脚冷知霜重新沐頭
輕感髮稀多謝殘燈不嫌客孤舟一夜許相依
南來三見歲云徂直恐終身走道塗老去怕看新

曆日退歸擬學舊桃符煙花已作青春意霜雪偏
尋病客鬚但把窮愁博長健不辭醉後飲屠酥

元日過丹陽明日立春寄魯元幹

堆盤紅縷細茵陳巧與椒花兩鬪新竹馬與時寧
信老土牛明日莫辭春西湖弄水猶應早北寺觀
燈欲及辰白髮蒼顏誰肯記曉來頻嚏爲何人

古纏頭曲

鴟絃鐵撥世無有樂府舊工惟尚叟一生喙硬眼
無人坐此困窮今白首翠鬟女子年十七指法已
似呼韓婦輕帆渡海風掣迴滿面沙塵和淚垢青

東坡全集 卷之五
衫不逢湓浦客紅袖漫插曹綱手爾來一見哀駘
他便着臂鞵躬并白我慙貧病百不足強對黃花
飲白酒轉關渡索動有神雷輟空堂戰慄牖四絃
一抹擁袂立再拜十分爲我壽世人只解錦纏頭
與汝作詩傳不朽

刁同年草堂

不用長竿矯繡衣南園北第兩參差青山有約長
當戶流水無情自入池歲久醱醑渾欲合春來楊
柳不勝垂主人不用忽忽去正是紅梅着子時

惠山謁錢道人示小龍團登絕頂望太湖

踏遍江南南岸山逢山未免更留連獨携天上小
圓月來試人間第二泉石路縈回九龍脊水光翻
動五湖天孫登無語空歸去半嶺松聲萬壑傳

錢道人有詩云直須認取主人翁作兩絕戲
之

首斷故應無斷者冰消那復有冰知主人苦苦令
僕認認上人人竟是誰

有主還須更有賓不如無鏡自無塵只從半夜安
心後失却當年覺痛人

和蘇州太守王規甫侍太夫人觀燈之什余

時以劉道原見訪滯留京口不及赴此會二
首

不覺朱轡輟後塵爭看繡憶錦纏輪洛濱侍從三
人貴京兆平反一笑春但逐東山携妓女那知後
閣走窮賓滯留不見榮華事空作賡詩第七人
翻翻緹騎走香塵激激飛濤射火輪美酒留連三
夜月豐年傾倒五州春時浙西皆以不熟罷燈惟蘓獨盛安排詩
律追強對躑躅歸期爲惡賓墮珥遺簪想無限華
胥猶見夢回人

成都進士杜暹伯升出家名法通往來吳中

欲識當年杜伯升飄然雲水一孤僧若教俯首隨
韁鎖料得如今似我能柳子玉云通若及第不過似我



國家圖書館, NATIONAL CENTRAL LIBRARY, TAIWAN, R.O.C.

Vertical text on the right side of the page, likely bleed-through from the reverse side. The text is partially obscured and difficult to read, but appears to contain several lines of Chinese characters.

東坡全集第六卷

詩九千九首

虎丘寺

入門無平田石路穿細嶺陰風生澗壑古木翳潭
井湛盧誰復見秋水光耿耿鐵花秀巖壁殺氣噤
蛙黽幽幽生公堂左右立頑礪當年或未信異類
服精猛胡爲百歲後仙鬼互馳騁窈然留新詩讀
者爲悲哽東軒有佳致雲水麗千頃熙熙覽生物
春意破淒冷我來屬無事暖日相與永喜鵲翻初
旦愁鴛躑落景坐見漁樵還新月溪上影悟彼良

自怡歸田行可請

常潤道中有懷錢塘寄述古五首

從來直道不辜身，得向西湖兩過春。
沂上已成曾點服，泮宮初采魯侯芹。
休驚歲歲年年貌，且對朝朝莫莫人。
細雨晴時一百六，畫船鼉鼓莫違民。
草長江南鶯亂飛，年來事事與心違。
花開後院還空落，燕入華堂怪未歸。
世上功名何日是，樽前點檢幾人非。
去年柳絮飛時節，記得金籠放雪衣。
杭人以放鴿爲太守壽。

浮玉山頭日日風，山在金山湧金門外已春融。
二年魚

鳥渾相識三月鶯，花付與公剩看新。
翻眉倒暈未應泣，別臉消紅何人織。
得相思字寄與江邊北，向

鴻

國豔天饒酒半酣，去年同賞寄僧簷。
但知撲撲晴香軟，誰見森森曉態嚴。
穀雨共驚無幾日，蜜蜂未許輒先甜。
應須火急回征棹，一片殺枝可得黏。
惠山泉下土如濡，陽羨溪頭米勝珠。
賣劍買牛吾欲老，殺雞爲黍子來無。
地偏不信容高蓋，俗儉真堪着腐儒。
莫怪江南苦留滯，經營身計一生迂。

刁景純賞瑞香花憶先朝侍宴次韻

上苑天桃自作行劉郎去後幾回芳厭從年少追
新賞閑對宮花識舊香欲贈佳人非泛洧好紉幽
佩弔沉湘鶴林神女無消息爲問何年返帝鄉

同柳子玉遊鶴林招隱醉歸呈景純

花時臘酒照人光歸路春風灑面涼劉氏宅邊霜
竹老戴公山下野桃香巖頭足練兼天靜泉底真
珠濺客忙安得道人攜笛去一聲吹裂翠崖岡

景純見和復次韻贈之二首

解組歸來道益光坐看百物自炎涼卷簾堂上檀
槽開送客林間樺燭香淺量已愁當酒怯非才尤

覺和詩忙何人貪佩黃金印千柱耿耿鎖北園
人間膏火正爭光每到藏春得斲涼多事始知田
舍好凶年偏覺野蔬香溪山勝畫徒能說來往如
梭爲底忙老去此身無處著爲翁栽插萬松岡

柳子玉亦見和因以送之兼寄其兄子璋道
人

不羨腰金照地光斲時假面弄西涼晴窓嚙日肝
腸暖古殿朝真履袖香說靜故知猶有動無閑底
處更求忙先生官罷乘風去何用區區賦陟岡

子玉家宴用前韻見寄復答之

自酌金樽勸孟光更教長笛奏伊涼子玉家牽衣
男女遶太白扇枕郎君煩阿香詩病逢春轉深痼
愁魔得酒斲奔忙醒時情味吾能說日在西南白
草岡

景純復以二篇一言其亡兄與伯父同年之
契一言今者唱酬之意仍次其韻

靈壽扶來似孔光感時懷舊一悲涼蟾枝不獨同
攀桂雞舌還應共賜香亦同等是浮休無得喪粗
分憂樂有閑忙年來世事如波浪鬱鬱誰知柏在
岡

屢把鉛刀齒步光更遭華袞照龐涼蘇門山上莫
長嘯蒼苔林中無別香燭燼已殘中夜刻槐花還
似昔年忙背城借一五何敢慎莫樽前替戾岡

金山寺與柳子玉飲大醉臥實覺禪榻夜分
方醒書其壁

惡酒如惡人相攻劇刀箭頽然一榻上勝之以不
戰詩翁氣雄拔禪老語清軟我醉都不知但覺紅
綠眩醉時江月墮撼撼風響變惟有一龕燈二桌
俱不見

大風留金山兩日

東坡全集 卷之六
塔上一鈴獨自語。明日顛風當斷渡。朝來白浪打
蒼崖。倒射軒窓作飛雨。龍驤萬斛不敢過。漁艇一
葉從掀舞。細思城市有底忙。却笑蛟龍爲誰怒。無
事久留童僕怪。此風聊得妻孥憚。瀟山道人獨何
事。半夜不眠聽粥鼓。

監洞霄宮俞康直郎中所居四詠

退圃

百丈休牽上瀨船。一鉤歸釣縮頭鱖。園中草木春
無數。只有黃楊厄閨年。俗說黃楊歲長一
寸。遇閏退三寸。

逸堂

新第誰來作。並隣舊官寧。復憶星辰請。君置酒吾
當賀。知向江湖拜散人。

趣軒

冠蓋相望起隱淪。先生那得老江村。古來真趣何
曾遜。笑殺逾垣與閉門。

遠樓

西山煙雨卷疎簾。北戶星河落短簷。不獨江天解
空闊。地偏心遠似陶潛。

遊鶴林招隱二首

郊原雨初霽。春物有餘妍。古寺滿脩竹。深林聞杜

鷓鴣睡餘柳花慵目眩山櫻然西窓有病客危坐看
香煙

行歌白雪嶺坐味脩竹林風輕花自落日薄山半
陰澗草誰復識聞香杳難尋時見城市人幽居惜
未深

書普慈長老壁志誠

普慈寺後千竿竹醉裏曾看碧玉椽倦客再遊行
老矣高僧一笑故依然久參白足知禪味苦厭黃
公鷓鴣聒晝眠惟有兩株紅杏葉晚來猶得向人妍

書焦山綸長老壁

法師住焦山而實未嘗住我來輒問法法師了無
語法師非無語不知所答故君看頭與足本自安
冠屨譬如長鬣人不以長爲苦一旦或人問每睡
安所措歸來被上下一夜着無處展轉遂達晨意
欲盡鐻去此言雖鄙淺故自有深趣持此問法師
法師一笑許

刁景純席上和謝生二首

悞入仙人碧玉壺一歡那復問親疎杯盤狼藉吾
何敢車騎雍容子甚都此夜新聲聞北里他年故
事紀南徐欲窮風月三千界願化人天百億軀

東坡全集 卷之六
縱飲誰能問，挈壺不知門。外曉星疎綺羅勝，事齊
三閩賓主談鋒敵。兩都榻畔煙花常，歎杜海中童
非尚追徐母多酌我，公須聽醉後粗狂膽。滿軀

留別金山寶覺圓通二長老

沐罷中冠快晚涼，睡餘齒頰帶茶香。艤舟北岸何
時渡，晞髮東軒未肯忙。康濟此身殊有道，治醫外
物本無方。風流二老長還往，顧我歸期尚渺茫。

無錫道中賦水車

翻翻聯聯銜尾鴉，莘莘确确蛻骨蛇。分畦翠浪走
雲陣，刺水綠鍼抽稻牙。洞庭五月欲飛沙，鼃鳴窟

中如打衙。天公不見老農泣，喚取阿香推雷車。

杭州牡丹開時僕猶在常潤周令作詩見寄

次其韻復次一首送赴闕

羞歸應爲負花期，已是成陰結子時。與物寡情憐
我老，遣春無恨賴君詩。玉臺不見朝酣酒，金縷猶
歌空折枝。從此年年定相見，欲師老圃問樊遲。
莫負黃花九日期，人生窮達可無時。十年且就三
都賦，萬戶終輕十首詩。天靜傷鴻猶戢翼，月明驚
鵲未安枝。君看六月河無水，萬斛龍驤到自遲。

蘇州間丘江君二家雨中飲酒二首

小圃陰陰遍灑塵方塘潏潏欲生紋已煩仙袂來
行雨莫遣歌聲便駐雲肯對綺羅辭白酒試將文
字惱紅裙今宵記取醒時節點滴空堦獨自聞
五紀歸來鬢未霜十眉環列坐生光喚舫渡口迎
秋女駐馬橋邊問秦娘曾把四絃娛白傅敢將百
草關吳王從今却笑風流守畫戟空凝宴寢香

次韻沈長官三首

家山何在兩忘歸杯酒相逢慎勿違不獨飯山嚙
我瘦也應糠覈怪君肥
男婚已畢女將歸累盡身輕志莫違誰道山中食

無肉至池清水自生肥

造物知吾久念歸似憐衰病不相違風來震澤帆
初飽雨入松江水漸肥

戲書吳江三賢畫像三首

誰將射御教吳兒長笑申公爲夏姬却遣姑蘇有
麋鹿更憐夫子得西施

范蠡

浮世功勞食與眠季鷹真得水中仙不須更說知
機早直爲鱸魚也自賢

張翰

千首文章二頃田囊中未有一錢看却因養得能
言鴨驚破王孫金彈丸

陸龜蒙

和劉孝叔會虎丘時王規甫齋素祈雨不至

二首

白簡盛猶凜青山興已穠鶴閑雲作斃馳卧草埋
峰跪履若可教卜隣應見容因公問四老何處定
相逢

太常齋未解不肯對織穠只遣三千屐來遊十二
峰林空苔清唱潭淨寫衰容歸去瑤臺路還應月
下逢

過永樂文長老已卒

初驚鶴瘦不可識旋覺雲歸無處尋三過門間老

病死一彈指頃去來今存亡慣見渾無淚鄉井難

忘尚有心欲向錢塘訪圓澤葛洪川畔待秋深

贈張刁二老

兩邦山水未淒涼二老風流總健強共成一百七
十歲各飲三萬六千場藏春塢裏鳴花鬧仁壽橋
邊日月長惟有詩人被磨折金釵零落不成行

去年秋偶遊寶山上方入一小院圓然無人
有僧隱几低頭讀書與之語漠然不甚對問
其隣之僧曰此雲閣梨也不出十五年矣今
年六月自常潤還復至其室則死葬數月矣

作詩題其壁

雲師來寶山一住十五秋讀書常閉戶客至不舉
頭去年造其室清坐忘百憂我初無言說師亦無
對酌今來復扣門空房但颼颼云已滅無餘薪盡
火不留却疑此室中嘗有斯人不所遇孰非夢事
過吾何求

聽僧昭素琴

至和無攫躒至平無按抑不知微妙聲究竟何從
出散我不平氣洗我不和心此心知有在尚復此
微吟

僧惠勤初罷僧職

軒軒青田鶴鬱鬱在樊籠既爲物所縻遂與吾輩
同今來始謝去萬事一笑空新詩如洗出不受外
垢蒙清風入齒牙出語如風松霜鬢茁病骨饑坐
聽午鐘非詩能窮人窮者詩乃工此語信不妄吾
聞諸醉翁

遊靈隱高峯塔

言遊高峯塔蓐食治野裝火雲秋未衰及此初旦
涼霧霏巖谷暗日出草木香嘉我回來人久便雲
水鄉相勸小舉足前路高且長古松攀龍虵怪石

東坡全集 卷之六
坐牛羊漸聞鐘磬音飛鳥皆下翔入門空無有雲
海浩茫茫惟見聾道人老病時絕糧問年笑不荅
但指穴藜牀心知不復來欲歸更傍徨贈別留足
布今歲天早霜

八月十七日天竺山送桂花分贈元素

月缺霜濃細葉乾此花元屬桂堂仙
鷲峯子落鷲前夜蟾窟枝空記昔年
破滅山僧憐耿介練裙溪女鬪清妍
願公採撷紉幽佩莫遣孤芳老澗邊

捕蝗至浮雲嶺山行疲苦有懷子由弟二首

西來煙陣塞空虛
灑遍秋田雨不如新法清平那

有此老身窮苦自招渠無人可訴
烏銜肉憶弟難憑犬寄書自笑迂
疎皆此類區區猶欲理蝗餘
瘴風漸欲作重陽
州州溪邊野菊黃
久廢山行疲
弊確尚能村醉舞
淋浪獨眠林下夢
魂好回首人間憂患長
殺馬毀車從此逝
子來何處問行藏
青牛嶺高絕處有小寺人迹罕到

暮歸走馬沙河塘
爐煙裊裊十里香
朝行曳杖青牛嶺
崖泉咽咽千山靜
君勿笑老僧耳聾喚不聞
百年俱是可憐人
明朝且復城中去
白雲却在題詩處

新城陳氏園次晁補之韻

荒涼廢圃秋寂。歷幽花晚。山城已窮僻。况與城相遠。我來亦何事。徒倚望雲巘。不見苦吟人。清樽爲誰滿。

梅聖俞詩集中有毛長官者。今於潛令國華也。聖俞沒十五年而君猶爲令。捕蝗至其邑。作詩戲之。

詩翁憔悴老一官。厭見苜蓿堆青盤。歸來羞澁對妻子。自比鮎魚緣竹竿。今君滯留生二毛。飽聽衙鼓眠黃紬。更將嘲笑調朋友。人道獼猴騎土牛。願

君恰似高常待。暫爲小邑仍刺史。不願君爲孟浩然。却遭明主放還山。宦遊逢此歲年惡。飛蝗來時半天黑。羨君封境稻如雲。蝗自識人人不識。

與毛令方尉遊西菩觀二首

推擠不去已三年。魚鳥依然笑我頑。人未放歸江北路。天教看盡浙西山。尚書清節衣冠後。處士風流水石間。一笑相逢那易得。數詩狂語不須刪。

路轉山腰是未移。水清石瘦便能奇。白雲自占東西嶺。明月誰分上下池。黑黍黃梁初熟後。朱柑綠橘半甜時。人生此樂須天賦。莫遣兒曹取次知。

聽賢師琴

太絃春溫和且平小絃蕪折亮以清平生未識宮
與角但聞牛鳴盎中雉登木門前剝啄誰扣門山
僧未閑君勿瞋歸家且覓千斛水淨洗從來箏笛
耳

贈馮真何克秀才

君不見路州別駕眼如電左手挂弓橫撚箭又不
見雪中騎驢孟浩然皺眉吟詩肩聳山饑寒富貴
兩安在空有遺像留人問此身常擬同外物浮雲
變化無蹤迹問君何苦寫我真君言好之聊自適

書冠野服山家容意欲置我山巖中勲名將相今
何限往寫褒公與鄂公

回先生過湖州東林沈氏飲醉以石榴皮書
其家東老庵之壁云西隣已富憂不足東老
雖貧樂有餘白酒釀來因好客黃金散盡爲
收書西蜀和仲聞而次其韻三百東老沈氏
之老自謂也湖人因以名之其子借作詩有
可觀者

世俗何知貧是病神仙可學道之餘但知白酒留
佳客不問黃公覓素書

符離道士晨興際華岳先生尸解餘忽見黃庭丹
篆句猶傳青紙小朱書

淒涼雨露三年後髣髴塵埃數字餘至用榴皮綠
底事中書君豈不中書

李行中秀才醉眠亭

已向閑中作地仙更於酒裏得天全從教世路風
波惡賀監偏工水底眠

君且歸休我欲眠人言此語出天然醉中對客眠
何害須信陶潛未苦賢

孝先風味也堪憐肯爲周公晝日眠枕麴先生猶

笑汝枉將空腹貯遺編

甘露寺彈箏

多景樓上彈神曲欲斷哀絃再三促江妃出聽霧

雨愁白浪翻空動浮玉金山喚取吾家雙鳳槽遣

作三峽孤猿號與君合奏芳春調啄木飛來霜樹

杪

單同年求德興俞氏聚遠樓詩三首

雲山煙水苦難親野草幽花各自春賴有高樓能
聚遠一時收拾與閑人

無限青山散不收雲奔浪卷入簾鈞直將眼力爲

疆界何啻人間萬戶侯

聞說樓居似地仙不知門外有塵寰幽人隱几寂
無語心在飛鴻滅沒間

平山堂次王居卿祠部韻

高會日陪山簡醉狂言屢發次公醒酒如人面天
然白山向吾曹分外清江上飛雲來北固檻前脩
竹憶南屏六朝興廢餘丘壘空使姦雄笑寧馨

次韻陳海州書懷

鬱鬱七蒼梧海上山東海鬱洲山云蓬萊方丈有無
間舊聞草木比白蒼梧浮來仙藥欲棄妻孥守市闌雅志未成

空自歎故人相對若為顏酒醒却憶兒童事長恨

雙鳧去莫攀陳曾令辨邑

次韻陳海州乘槎亭

人事無涯生有涯逝將歸釣漢江槎乘浮我欲從
安石遁世誰能識子嗟日上紅波浮碧巘潮來白
浪卷青沙清談美景雙竒絕不覺歸鞍帶月華

次韻孫職方蒼梧山

蒼梧竒事豈虛傳荒怪還須問子牟遠託鰲頭轉
滄海來依鵬背負青天或云靈境歸賢者又恐神
功亦偶然聞道新春恣遊覽羨君平地作飛仙

次韻孫巨源寄漣水李盛二著作并以見寄

五絕

南嶽諸劉豈易逢相望無復馬牛風山公雖見無

多子社燕何由戀塞鴻昔與巨源劉貢父劉莘老相遇於山陽自尔契闊惟

巨源近者復相見於京口

高才晚歲終難進勇退當年正急流不獨二疎為

可慕他時當有景孫樓巨源近離東海郡有景疎樓

漱石先生難可意謂巨源齷齪校尉久無朋詎應知

客路愁無柰故遣吟詩調李陵謂李君也

雲雨休排神女車忠州老病畏人誇詩豪正值安

仁在空看河陽滿縣花盛為邑宰

膠西未到吾能說桑柘禾麻不見春不羨京塵騎

馬客羨他淮月弄舟人

王莽

漢家殊未識經綸入手功名事事新百尺竿成連

夜井千金購得解飛人

董卓

公業平時勸用儒諸公何事起相圖只言天下無

徒者豈信車中有布乎

虎兒

舊聞老蚌生明珠未省老兔生於菟老兔自謂月中物不騎快馬騎蟾蜍蟾蜍爬沙不肯行坐令青衫垂白髮於菟駿猛不類渠指揮黃熊駕黑羆丹砂紫麝不用塗眼光百步走妖狐妖狐莫誇智有餘不勞搖牙咀爾徒

除夜病中贈段屯田

龍鍾三十九勞生已強半歲暮日斜時還爲昔人歎梁天詩云行年三十九歲暮日斜時今年一線在那復堪把玩欲起強持酒故交雲雨散惟有病相尋空齋爲老伴蕭條燈火冷寒夜何時且勸僕獨屏風譏鼯嗅空

案數朝閉閣卧霜髮秋蓬亂傳聞使者來策杖就梳盥書來苦安慰不怪造請緩大夫忠烈後高義金石貫要當擊權豪未肯覲哀懦此生何所似閻盡灰中炭歸田計已決此邦聊假館三徑粗成費一枝有餘煖願君留信宿庶奉一笑粲

喬太博見和復次韻答之

百年三萬日老病常居半其間足憂樂歌笑雜悲歎顛倒不自知直爲神所玩須臾便堪笑萬事風雨散自從識此理久謝少年伴逝將遊無何豈暇讀城旦非才更多病二事可并案愧煩賢使者弭

節整紛亂喬侯瑚璉質清廟嘗薦奮鬚百吏走
坐變齊俗緩未遭甘鷓退並進耻魚貫每聞議論
餘凜凜激貪懦莫邪當自躍豈復煩爐炭便庶朝
秣越未暮刷燕館胡爲守故丘眷戀桑榆煖爲君
扣牛角一味南山粲

二人再和亦再答之

寒雞知將晨餓鶴知夜半亦如老病客遇節常感
歎光陰等敲石過眼不容玩親友如搏沙放手還
復散羈孤每自笑寂寞誰肯伴元違號神君晉僧
史喬
智明字
元達高論森月旦紀明本賢將段釋之
本將家泪沒事

堆案欣然肯相顧夜閣燈火亂盤空愧不飽酒
僅堪盥雍容許着帽不怪安石緩雖無窈窕人清
唱弄珠貫幸有從橫舌說劍起慵懦二豪沉下位
暗火埋濕炭豈似草玄人默默老儒館行看昂貴
通炙手借餘煖應念苦思歸登樓賦土粲

雪夜書北臺壁二首

黃昏猶作雨纖纖夜靜無風勢轉嚴但覺衾裯如
澌水不知庭院已堆鹽五更曉色來書幌半月寒
聲落畫簷試掃北臺看馬耳未隨埋沒有雙尖
城頭初日始翻鴉陌上晴泥已沒車凍合玉樓寒

起粟光搖銀海眩生花遺蝗入地應千尺宿麥連
雲有幾家老病自嗟詩力退空吟冰柱憶劉叉

謝人見和前篇二首

已分酒盃欺淺懦敢將詩律鬪深嚴漁蓑句好應
須畫柳絮才高不道鹽敗屨尚存東郭指飛花又
舞謫仙簷書生事業真堪笑忍凍孤吟筆退尖
九陌淒風戰齒牙銀杯逐馬帶隨車也知不作堅
牢玉無柰能開頃刻花得酒強歡愁底事閉門高
卧定誰家臺前日暖君須愛冰下寒魚漸可叉

鐵溝行贈喬太傅

城東坡壠何所似風吹海濤低復起城中病守無
所爲走馬來尋鐵溝水鐵溝水淺不容輒恰似當
年韓與侯有魚無魚何足道駕言聊復寫我憂荒
村野店亦何有欲發狂言須斗酒山頭落日側金
盆倒着接離搔白首忽憶從軍年少時輕裘細馬
百不知臂弓腰箭南山下追逐長楊射獵兒老去
同君兩憔悴犯夜醉歸人不避今年定起故將軍
未肯先誅灞陵尉

出城送客不及步至溪上二首

送客客已去尋花花未開未能城裏去且復水邊

來父老借問我史君安在哉今年好雨雪會見麥
千堆

春來六十日笑口幾回開會作堂堂去何妨得得
來勸游行老矣舊隱賦歸哉東望峨眉小廬山翠

作堆

鄱東廬山絕
類峩冒而小

蘇州姚氏三瑞堂

姚氏世
以孝稱

君不見董邵南隱居行義孝且慈天公亦恐無人
知故令雞狗相哺兒又令韓老爲作詩爾來三百
年名與淮水東南馳此人世不乏此事亦時有楓
橋三瑞皆目見天意宛在虞鰥後惟有此詩非昔

人君更往求無價手

莫笑銀杯小

答喬太博

陶潛一縣令獨飲仍獨醒猶將公田二頃五十畝
種秫作酒不種菘我今號爲二千石歲釀百石何
以醉賓客請君莫笑銀杯小爾來歲旱東海窄會
當拂衣歸故丘作書貸粟監河侯萬斛船中着美
酒與君一生長拍浮

送段屯田分得千字

勸農使者古丈夫不惜春衫踐泥塗王事靡盬君
甚劬奉當客卿虬兩須東武縣令天馬駒泮宮先

生非俗儒相與野飲四子俱樂哉此樂城中無溪
邊策杖自攜壺腰笏不煩何易于膠西病守老且
迂空齋愁坐紛墨朱四十豈不知頭顱畏人不出
何其愚

和段屯田荆林館

南山有佳色無人空自竒清時爲題品草木變芬
菲謝女得秀句留待中郎歸便當勒鞭策僕勸馬
亦饑段有姪
女在密

贈上天竺辯才師

南北一山門上下兩天竺中有老法師瘦長如鶴

鶴不知脩何行碧眼照山谷見之自清涼洗盡煩
惱毒坐令一都會勇丈禮白足我有長頭兒角頰
峙犀王四歲不知行抱負煩背腹師來爲摩頂起
走趁奔鹿乃知戒律中妙用謝羈束何必言法華
佯狂啖魚肉

遊廬山次韻章傳道

塵容已似駭駘駒野性猶同縱壑魚出入叢巒千
仞表較量筋力十年初雖無窈窕驅前馬還有鴟
夷拊後車肯笑吟詩淡生活當令阿買爲君書

廬山五詠

盧敖洞

圖經云敖秦博士
遊難此山遂得道

識
上界足官府飛昇亦何益還在此山中相逢不相

飲酒臺

儒
博士雅好飲空山誰與娛莫向驪山去君王不喜

聖燈巖

稚
石室有金丹山神不知秘何必露光芒夜半驚童

三泉

月
皎皎巖下泉無人還自縈不用比三星清光同

障日峯

其狀類我
眉但小耳

眉
長安自不遠蜀客苦思歸莫教名障日喚作小峨

東坡全集第六卷終

一

漢書卷之九十八 地理志第八

卷之九十八

月

漢書卷之九十八 地理志第八



東坡全集第七卷

詩八十三首

次韻章傳道喜雨

常山
而待

去年夏旱秋不雨海畔居民飲鹹苦今年春煖欲
 生蠶地上戢戢多於土預憂一旦開兩翅口吻如
 風那肯吐前時渡江入吳越布陣橫空如項羽去
 錢塘見飛蝗自西農夫拱手但垂泣人力區區固難歲
 禦撲綠鬣尾困牛馬啖齧衣服穿房戶坐觀不救
 亦何心秉畀炎火傳自古荷鋤散掘誰敢後得米
 濟饑還小補常山山神信英烈撫駕雷公訶電母

NATIONAL CENTRAL LIBRARY, TAIWAN, R.O.C.

東坡全集卷之十
應憐郡守老且愚欲把瘡痍手摩撫山中歸時風
色變中路已覺商羊舞夜牕騷騷鬧松竹朝畦泫
泫流膏乳從來蝗旱必相資此事吾聞老農語庶
將積潤掃遺孽收拾豐歲還明主縣前已窖八千
斛今春及今得豐率以一勝完一畝更看螿婦過
初眠蠶一眠則蝗不復生矣未用賀客來旁午先生筆力吾
所畏蹙踏鮑謝跨徐庾偶然談笑得佳篇便恐流
傳成樂府陋邦一雨何足道吾君盛德九州晉中
和樂職幾時作試向諸生選何武

謝郡人田賀二生獻花

城裏田員外城西賀秀才不愁家四壁自有錦千
堆珍重尤奇品艱難歲後開芳心困落日薄艷戰
輕雷雷昨雨老守仍多病壯懷先已灰慙慙此粲者
賀獻魏攀折為誰哉玉腕揜紅袖金樽瀉白醅何
當鉏霜鬢強插滿頭廻

惜花

吉祥寺中錦千堆錢塘花前年賞花真盛哉道人
勸我清明來腰鼓百面如春雷打徹涼州花自開
沙河塘上插花回醉倒不覺吳兒哈豈知如今雙
鬢催城西古寺沒蒿萊有僧閉門手自栽千枝萬

東坡全集 卷之四
葉巧翦裁就中一叢何所似馬腦盤成金縷杯而
我食菜方清齋對花不飲花應猜夜來雨雹如李
梅紅殘綠暗吁可哀

和頓教授見寄

用除夜韻

我笑陶淵明種秫二頃半婦言既不用還有責子
歎無絃則無琴何必勞撫玩我笑劉伯倫醉髮蓬
弗敢二豪苦不納獨以鍾自伴既死何用埋此身
同夜且孰云二子賢自結兩重按笑人還自笑出
口談治亂一生溷塵垢晚以道自盟無成空得懶
坐此百事緩及聞頓夫子講道出新貫豈無一尺

書恐不記庸懦陋邦貧且病數米銖稱炭慙愧章
先生十日坐空館袖中出子詩貪讀酒屢煖任言
各須慎勿使輸薪粲

和子由四首

韓太祝送遊太山

偶作郊原十日遊未應回首厭籠囚但教塵土驅
馳足終把雲山爛漫酬聞道逢春思濯錦便須到
處覓菟裘恨君不上東封頂夜看金輪出九幽

送春

夢裏青春可得追欲將詩句絆餘暉酒闌病客惟

東坡全集 卷之七
思睡蜜熟黃蜂亦懶飛芍藥櫻桃俱掃地病過此二物

鬢絲禪榻兩忘機憑君借取法界觀一洗人間萬

事非來書云近看此書余未嘗見也

首夏官舍即事

安石榴花開最遲絳裙深樹出幽菲吾廬想見無限好客子倦遊胡不歸座上樽雖得滿古來四事巧相違令人却憶湖邊寺垂柳陰陰晝掩扉

送李供備席上和李詩

家聲赫奕蓋并涼也解微吟錦瑟傍擘水取魚湖起浪引杯看劍坐生光風流別後人人憶才器歸

來種種長不用更貪窮事業風騷分付與沉湘

西齋

西齋深且明中有六尺牀病夫朝睡足危坐覺日長昏昏既非醉踽踽亦非狂褰衣竹風下穆然濯微涼起行西園中草木含幽香榴花開一枝桑棗沃以光鳴鳩得美蔭困立忘飛翔黃鳥亦自喜新音變圓吭杖藜觀物化亦以觀我生萬物各得時我生日皇皇

小兒

小兒不識愁起坐牽我衣我欲嗔小兒老妻勸兒

癡兒癡君更甚不樂愁何爲還坐愧此言洗盞當
我前大勝劉伶婦區區爲酒錢

寄劉孝叔

君王有意誅驕虜椎破銅山鑄銅虎聯翩三十七
將軍走馬西來各開府南山伐木作車軸東海取
鹽漫戰鼓汗流奔走誰敢後恐乏軍興汗質斧保
甲連村圍未遍方田訟牒紛如雨爾來手實降新
書抉剔根株窮脉縷詔書惻怛信深厚吏能淺薄
空勞苦平生學問止流俗衆裏笙竽誰比數忽令
獨奏鳳將雛倉卒欲吹那得譜况復連年苦饑饉

剝菹草木啖泥土今年雨雪頗應時又報蝗蠱生
翅股憂來洗盞欲強醉寂寞虛齋卧空甌公厨十
日不生煙更望紅裙踏筵舞故人屢寄山中信只
有當歸無別語方將雀鼠偷太倉未肯衣冠掛神
武吳興丈人真得道平日立朝非小補自從四方
冠蓋鬧歸作二浙湖山主高蹤已自雜漁釣大隱
何曾棄簪組去年相從殊未足問道已許談其祖
逝將棄官往卒業俗緣未盡那得覩公家只在雪
溪上上有白雲如白羽應憐進退苦皇皇更把安
心教初祖

孔長源挽詞二首

少年才氣冠當時晚節孤風益自奇君勝宜為夫子後林宗不愧蔡邕碑南荒尚記誅元惡東越誰能事細兒耆舊如今幾人在為君無憾為時悲
小堰門頭柳繫船吳山堂上月侵筵潮聲夜半下
巖響詩句明朝萬口傳長源自越過杭夜飲有美堂上聯句長源詩云天日遠隨雙鳳落海門遙一坐稱善豈意日斜庚子後忽驚歲在巳辰年佳城一閉無窮事南望題詩淚灑牋

寄呂穆仲寺丞

孤山寺下水侵門每到先看醉墨痕楚相未亡談

笑是中郎不見典刑存

沈南人善學呂舉措酷似別後常令作之以為笑

君先去踏塵埃陌我亦來尋桑棗村回首西湖真一夢灰心霜鬢更休論

余主簿母挽詞

閨庭蘭玉照鄉閭自昔雖貧樂有餘豈獨家人在中醜却因麟趾識關雎雲耕忽已歸仙府喬木依然擁舊廬忍把還鄉千斛淚一時灑向老萊裾

送趙寺丞寄陳海州

景疎樓上喚峨眉君到應先誦此詩若見孟公投轄飲莫忘衝雪送君時

答陳述古二首

漫說山東第二州，棗林桑泊負春遊。城西亦有紅千葉，人老簪花却自羞。

小桃破萼未勝春，羅綺叢中第一人。聞道使君歸

去後，舞衫歌扇總生塵。

陳有小妓述古稱之

張安道樂全堂

列子馭風殊不惡，猶被莊生譏數步。兵飲酒中散琴於此得，全非至樂樂全居士全。於天維摩丈室空，翛然平生痛飲今不飲。無琴不獨琴無絃，我公天與英雄表。龍章鳳姿照魚鳥，但令端委坐廟

堂。北狄西戎談笑了，如今老去苦思歸。小字親書寄我詩，試問樂全全底事。無全何處更求虧。

張文裕挽詞

高才本出朝廷右，能事空推德業餘。每見便聞曹植句，至今傳寶魏華書。濟南名士新凋喪，劫外生祠已潔除。欲寄西風兩行淚，依然喬木鄭公廬。

懷西湖寄晁美叔同年

西湖天下景，遊者無愚賢。深淺隨所得，誰能識其全。嗟我本狂直，早爲世所捐。獨專山水樂，付與寧非天。三百六十寺，幽尋遂窮年。所至得其妙，心知

口難傳至今清夜夢耳目餘芳鮮君持使者節風
采樂雲煙清流與碧巘安肯爲君妍胡不屏騎從
蹇借僧榻眠讀我壁間詩清涼洗煩煎策杖無道
路直造意所便應逢古漁父葦間自寅綠問道若
有得買魚勿論錢

和梅戶曹會獵鐵溝

山西從古說三明誰信儒冠也捍城竿上鯨鯢猶
未掩近梟草中狐兔不須驚東州趙叟飲無敵南
國梅仙詩有聲不向如梟閑射雉歸來何以得卿
卿是日惟梅
趙不射

祭常山回小獵

青蓋前頭點皂旗黃茅岡下出長圍弄風騎馬跑
空立趁兔蒼鷹掠地飛回望白雲生翠巘歸來紅
葉滿征衣聖朝若用西涼簿白羽猶能效一揮

和章七出守湖州二首

方丈仙人出渺茫高情猶愛水雲鄉功名誰使速
三捷身世何緣得兩忘早歲歸休心共在他年相
見話偏長只應未報君恩重清夢時時到玉堂
絳闕雲臺總有名應須極貴又長生鼎中龍虎黃
金賤松下龜蛇綠骨輕君好爐火
而餌茯苓霽水未渾纓可

濯弁峰初見眼應明兩巵春酒真堪羨獨占人間
分外榮

和張子野見寄三絕句

前生我已到杭州到處長如到舊遊更欲洞霄爲
隱吏一庵閑地且相留過舊遊

狂吟跌宕無風雅醉墨淋漓不整齊應爲詩人一

回顧山僧未忍掃黃泥見題壁

柏堂南畔竹如雲此閣何人是主人但遣先生披
鶴氅不須更畫樂天真竹閣見憶

和蔣夔寄茶

我生百事常隨緣四方水陸無不便扁州渡江適
吳越三年飲食窮芳鮮金盞玉膾飯炊雪海螯江
柱初脫泉臨風飽食甘寢罷一甌花乳浮輕圓白
從捨舟入東武沃野便到桑麻川翦毛胡羊大如
馬誰記鹿角腥盤筵厨中烝粟埋飯壑大杓更取
酸生涎拓羅銅碾棄不用脂麻白上須盆研故人
猶作舊眼看謂我好尚如當年沙溪北苑強分別
水脚一線爭誰先清詩兩幅寄千里紫金百餅費
萬錢吟哦烹噉兩奇絕只恐偷乞煩封纏老妻稚
子不知愛一半已入薑鹽煎人生所遇無不可南

比嗜好知誰賢死生禍福久不擇更論甘苦爭蚩
妍知君窮旅不自釋因詩寄謝聊相鑄

荅李邦直

美人如春風著物物未知羈愁似冰雪見子先流
澌子從徐方來吏民舉熙熙扶病出見之驚我一
何衰知我久慵倦起我以新詩詩詞如醇酒盎然
薰四支徑飲不覺醉欲和先昏疲西齋有蠻帳風
雨夜紛披放懷語不擇撫掌咲脫頤別來今幾何
春物已含姿柳色日夜暗子來竟何時徐方雖云
樂東山禁遊嬉又無狂太守何以解憂思聞子有

賢婦華堂詠螽斯盍不倒囊橐賣劍買蛾眉不用
教絲竹唱我新歌詞

和文與可洋川園池三十首

湖橋

朱欄畫柱照湖明白菖烏紗曳屐行橋下龜魚晚
無數識君拄杖過橋聲

橫湖

貪看翠蓋羅紅粧不覺湖邊一夜霜卷却天機雲
錦段從教閒練寫秋光

書軒

東坡全集 卷之七
雨昏石硯寒雲色風動牙籤亂葉聲庭下已生書
帶草使君疑是鄭康成

冰池

不嫌冰雪透池看誰似詩人巧耐寒記取羲之洗
硯處碧瑠璃下黑蛟蟠

竹塢

晚節先生道轉孤歲寒惟有竹相娛麤才杜牧真
堪咲喚作軍中十萬夫

荻浦

雨折霜乾不耐秋白花黃葉使人愁月明小艇湖

邊宿便是江南鸚鵡洲

蓼嶼

秋歸南浦蟋蟀鳴霜落橫湖沙水清卧雨幽花無
限思抱叢寒蝶不勝情

望雲樓

陰晴朝暮幾回新已向虛空付此身出本無心歸
亦好白雲還似望雲人

天漢臺

漾水東流舊見經銀潢左界上通靈此臺試向天
文覓閣道中間第幾星

待月臺

月與高人本有期，拄簷低戶映蛾眉。只從昨夜十分滿，漸覺冰輪出海遲。

二樂榭

此間真趣豈容談，二樂并君已是三。仁智更煩訶妄見，坐令魯叟作瞿曇。來詩云二見因妄生

瀟泉亭

聞道池亭勝兩川，應須爛醉峇雲煙。勸君多種長腰米，消破亭中萬斛泉。

吏隱亭

縱橫憂患滿人間，頗怪先生日日閑。昨夜清風眠北牖，朝來爽氣在西山。

霜筠亭

解籜新篁不自持，嬋娟已有歲寒姿。要看凜凜霜前意，須待秋風粉落時。

無言亭

慇懃稽首維摩詰，敢問如何是法門。彈指未終千偈了，向人還道本無言。

露香亭

亭下佳人錦繡衣，滿身瓔珞綴明璣。晚香消歇無

尋處花已飄零露已晞

函虛亭

水軒花榭兩爭妍秋月春風各自偏惟有此亭無
一物坐觀萬景得天全

溪光亭

決去湖波尚有情却隨初日動簷楹溪光自古無
人畫憑仗新詩與寫成

過溪亭

身輕步穩去忘歸四柱亭前野約微忽悟過溪還
一笑水禽驚落翠毛衣

波錦亭

煙紅露綠曉風香燕舞鶯啼春日長誰道使君貧
且老繡屏錦帳咽笙簧

禊亭

曲池流水細鱗鱗高會傳觴似洛濱紅粉翠蛾應
不要畫船來在勝於人

齒齶亭

日日移床放下風清香不盡思何窮若爲化作龜
千歲巢向田田亂葉中

茶蔭洞

長憶故山寒食夜野荼蘼發暗香來分無素手簪
羅髻且折霜蕤浸玉醅

長憶故山一作半雨半晴

筍簞谷

漢川脩竹賤如篷斤斧何曾赦籜龍料得清貧饒
太守涓濱千畝在胸中

寒蘆港

溶溶晴港漾春暉蘆筍生時柳絮飛還有江南風
物否桃花流水鱖魚肥

野人廬

少年辛苦事犁鋤剛厭青山遶故居老覺華堂無

意味却須時到野人廬

此君庵

寄語庵前抱節君與君到處合相親寫真雖是文
夫子我亦真堂作記人

金橙徑

金橙縱復里人知不見鱸魚價自低須是松江煙
雨裏小舫燒薤擣香齏

南園

不種天桃與綠楊使君應欲候農桑春畦雨過羅
紈膩夏壠風來餅餌香

北園

漢水巴山樂有餘一麾從此首歸塗北園草木憑
君問許我他年作主無

寄題刁景純藏春塢

白首歸來種萬松待看千尺舞霜風年拋造物陶
甄外春在先生杖履中楊柳長齊低戶暗櫻桃爛
熟滴堦紅何時却與徐元直共訪襄陽龐德公

王盤盂二首

并序

東武舊俗每歲四月大會于南禪資福兩寺以芍
藥供佛而今歲最盛凡七千餘朵皆重柎累萼繁

麗豐碩中有白花正圓如覆盂其下十餘葉稍大
承之如盤姿格絕異獨出于七千朵之上云得之
於城北蘇氏園中周宰相莒公之別業也而其名
俚甚乃爲易之

雜花狼藉占春餘芍藥開時掃地無兩寺粧成寶
纓絡一枝爭看王盤盂佳名會作新譏曲絕品難
尋舊畫圖從此定知年穀熟姑山親見雪肌膚
花不能言意可知令君痛飲更無疑但持白酒勸
嘉客直待瓊舟覆玉鬢負郭相君初擇地看羊屬
國首吟詩吾家豈與花相厚更問殘芳有幾枝

和潞公超然臺收韻

我公厭富貴常苦勳業尋相期赤松子永望白雲
岑清風出談笑萬竅爲號吟吟成超然詩洗我蓬
之心嗟我本何人麋鹿強冠襟身微空志大交淺
屢言深囑公如得謝呼我幸寄音但恐酒錢盡煩
公揮橐金

聞喬太博換左藏知欽州以詩招飲

今年果起故將軍幽夢清詩信有神馬革裹尸真
細事虎頭食肉更何人陣雲冷壓黃茆瘴羽扇斜
揮白葛巾痛飲從今有幾日西軒月色夜來新

喬將行烹鷺鹿出刀劔以飲客以詩戲之

破匣哀鳴出素虬倦看鴟鴞聽啾啾明朝只恐無
烹鶴此去還須却佩牛便可先呼報恩子不妨仍
帶醉鄉侯他年萬騎歸應好柰有移文在故丘

次韻劉貢父李公擇見寄二首

白髮相望兩故人眼看時事幾番新曲無和者應

思郢論少卑之且借秦歲惡詩人無好語公擇來

失中饑夜長鰥守向誰親貢夫近少思多睡無如

我鼻息雷鳴撼四隣

何人勸我此間來絃管生衣甌有埃淥蟻流唇無

百斛蝗蟲撲面已三回磨刀入谷追窮寇洒涕循
城拾棄孩爲郡鮮歡君莫歎猶勝塵土走章臺

寄黎眉州

膠西高處望西川應在孤雲落照邊瓦屋寒堆春
後雪峨眉翠掃雨餘天治經方笑春秋學好士今
無六一賢君以春秋受知於歐陽文忠公公自號六一居士且待淵明賦
歸去共將詩酒趁流年

和趙郎中捕蝗見寄次韻

麥穰人許長穀苗牛可沒天公獨何意忍使蝗蟲
發驅攘著令興農事安可忽我倦旣胼胝我馬亦

款屹飛騰漸云少筋力亦已竭苟無百篇詩何以
醒睡兀初如疏畎澮漸若決解勃往來供十吏腕
脫不容歇平生輕妄庸熟視笑魏勃受昔有之氣
詩壇專斬伐民病何時休吏職不可越慎無及世
事向空書咄咄

登常山絕頂廣巖亭

西望穆陵關東望琅邪臺南望九僊山北望空飛
埃相將叶虞舜遂欲歸蓬萊嗟我二三子狂飲亦
荒哉紅裙欲先去長笛有餘哀清歌入雲霄妙舞
纖腰回自從有此山白石封蒼苔何常有此樂將

去後徘徊人生如朝露白髮日夜催棄置當何言
萬劫終飛灰

薄薄酒二首 并序

膠西先生趙明叔家貧好飲不擇酒而醉常云薄
薄酒勝茶湯醜醜婦勝空房其言雖俚而近乎達
故推而廣之以補東州之樂府既又以爲未也復
自和一篇聊以發覽者之一喙云耳

薄薄酒勝茶湯麤麤布勝無裳醜妻惡妾勝空房
五更待漏靴滿霜不如三伏日高睡足北窓涼珠
孺王押萬人祖送歸北却不如懸鶉百結獨坐負

朝陽生前富貴死後文章百年瞬息萬世仁義齊
盜蹠俱亡羊不如眼前一醉是非憂樂都兩忘
薄薄酒飲兩鍾麤麤布著兩重美惡雖異醉暖同
醜妻惡妾壽乃公噫居求志義之從本不計較東
華塵土北窓風百年雖長要有終富死未必輪生
窮但恐珠玉留若容千載不朽遺笑崇文章自足
欺百輩誰使一朝富貴面發紅蓮人自達酒何功
世間是非憂樂本來空

同年王中甫挽詞

先帝親收十五人四方爭看擊鵬鯢如君才業真

堪用顧我衰遲不足論出處陞沉十年後死生契
闊幾人存他時京口尋遺迹宿草猶應有淚痕

朝督良十五人今惟富鄭公張
宣猷錢純老及余與舍弟在耳

七月五日二首

避謗詩尋醫畏病酒入務蕭條北窓下長日誰與
度今年苦炎熱草木困薰煮况我早衰人幽居氣
如縷秋來有佳興秫稻已含露還復此微吟往和

糟床注

何處覓新秋蕭然北臺上秋來未云幾風月已清
亮雲間聳孤翠林表浮遠漲新棗漸堪剥晚瓜猶

可餉西風送落日萬竅含悽悵念當急行樂白髮
不汝放

趙郎中見和戲復答之

趙子吟詩如潑水一揮三百八十字柰何效我欲
尋醫恰似西施藏白地趙子飲酒如淋灰一年十
萬八千杯若不令君早入務飲竭東海生黃埃我
衰臨政多繆錯羨君精采如秋鷄頗哀老子今日
飲為君坐嘯王畫諾

次韻周邠寄鴈蕩山圖二首

指點元悲採藥翁丹青化出大槐宮眼明小閣浮

煙翠齒冷新詩嚼雪風二華行觀雄談右九仙今

已歷京東將赴河中密迓太華九仙此生的有尋

山分已覺温台落手中

西湖三載與君同馬入塵埃鶴入籠東海獨來看

出日石橋先去踏長虹遙知別後添華髮時向樽

前說病翁所恨蜀山君未見他年攜手醉郢筒

送碧香酒與趙明叔教授

聞君有婦賢且庶勸君慎勿為楚相不羨紫駝分

御食自遣赤脚沽村釀嗟君老狂不知愧更吟醜

婦惡嘲謗諸生聞語定失笑冬暖號外無帳碧

香近出帝子家鶴兒破殼酥流盜不學劉伶獨自

飲一壺往助齊眉餉

趙既見和復次韻答之

長安小吏天所放日夜歌呼和丞相豈知後世有

阿瞞曹公自謂北海樽前提私釀先生未出禁酒

國詩語孤高常近謗幾回無酒欲沽君却畏有司

書簿帳近制公使酒法甚重酸寒可笑分一斗日飲如何

足衣盜更將險語壓衰翁只恐自是堂無餉

趙郎中往昔縣逾月而歸復以一壺遺之仍

用元韻

東隣主人遊不歸悲歌夜夜聞椿相門前人鬧馬
嘶急一家喜氣如春釀王事何曾怨獨賢室人豈
忍交謫謗大兒踉蹌越門限小兒咿啞語繡帳定
教舞袖掣伊涼更想夜庖鳴甕盎題詩送酒君勿
請免使退之嘲一餉

蘇潛聖挽詞

妙齡馳譽百夫雄晚節忘懷大隱中悃悞無華直
漢史文章爾雅稱吾宗趨時肯負平生志有子還
應不死同惟我閑思十年事數行老淚寄西風
東坡全集第七卷終

東坡全集第八卷

詩七十二首

和晁同年九日見寄

仰看鸞鵠刺天飛，富貴功名老不思。
病馬已無千里志，騷人長負一秋悲。
古來重九皆如此，別後西湖付與誰。
遣子窮愁天有意，吳中山水要清詩。

送喬施州

恨無負郭田二頃，空有載行書五車。
江下青山橫絕壁，雲間細路躡飛虵。
雞號黑暗通蠻貨，切人謂犀為黑蜂鬧黃連採蜜花。
共怪河南門下客，不應萬里

東坡全集 卷之八
向長沙

喬受知於吳丞相而
死州風上犬類長沙

夜雪獨宿柏山庵

晚雨纖纖變玉霰小庵高卧有餘清夢驚忽有穿
窓片夜靜惟聞瀉竹聲稍壓冬溫聊得健未濡秋
旱若爲耕天公用意真難會又作春風爛漫晴

和孔郎中荆林馬上見寄

秋禾不滿眼宿麥種亦稀求愧此邦人芒刺在膚
饑平生五千卷一字不救饑方將恣無襦忽復歌
緇衣堂堂孔北海直氣凜辟兒朱輪未及郊清風
已先馳何以累君子十萬貧與羸滔滔滿四方我

行竟安之何時劔關路春山聞子規

留別雩泉

舉酒屬雩泉白髮日夜新何時泉中天復照泉上
人二年飲泉水魚鳥亦相親還將弄泉手遮日向
西秦

留別釋迦院牡丹呈趙倅

春風小院邨來時壁間惟見使君詩應問使君何
處去憑花說與春風知年年歲歲何窮已花似今
年人老矣去年崔護若重來前度劉郎在千里

黃儲郎中嘗知眉州與先人遊過安丘訪其

故居見其子希甫留詩屋壁

白髮郎潛舊使君至今人道竅能文隻雞敢忘橋
公語下馬來尋董相墳冬月負薪雖得免隣人吹
笛不堪聞死生契闊君休問灑淚西南向白雲

劉貢父見余歌詞數首以詩見戲聊次其韻
十載漂然未可期那堪重作看花詩門前惡語誰
傳去醉後狂歌自不知刺舌君今猶未戒炙眉我
亦更何辭相從痛飲無餘事正是春容最好時

除夜大雪留濰州元日早晴遂行中塗雪復
作

除夜雪相留元日晴相送東風吹宿酒瘦馬兀殘
夢葱曨曉光開旋轉餘花弄下馬成野酌佳哉誰
與共須臾晚雲合亂灑無缺空鵝毛垂馬駿自怪
騎白鳳三年東方旱逃戶連歆棟老農釋耒歎淚
入饑腸痛春雪雖云晚春麥猶可種敢怨行役勞
助爾歌飯甕

大雪青州道上有懷東武園亭寄交代孔周

翰

超然臺上雪城郭山川兩竒絕海風吹碎碧琉璃
時見三山白銀闕蓋公堂前雪綠窓朱戶相明滅

堂中美人雪爭妍粲然一笑王齒頰就中山堂雪
更奇青松怪石亂瓊絲惟有使君遊不歸五更上
馬愁斂眉君不見淮西李侍中夜入蔡州縛取吳
元濟又不見襄陽孟浩然長安道上騎驢吟雪詩
何當閉門飲美酒無人毀譽河東守

至濟南李公擇以詩相迎次其韻二首

弊裘羸馬古河濱野闊天低糝玉塵自笑餐餽典
屬國來看換酒謫仙人宦遊到處身如寄農事何
時手自親剩作新詩與君和莫因風雨廢鳴晨
夜擁笙歌雪水濱回頭樂事總成塵今年送汝作

太守到處逢君是主人聚散細思都是夢身名漸
覺兩非親相從繼燭何煩問蝙蝠飛時日正晨

和孔君亮郎中見贈

偶對先生盡一樽醉看萬物汹崩奔優遊共我聊
卒歲骭髒如君合倚門只恐掉頭難久住應須傾
蓋便深論固知嚴勝風流在又見長身十世孫字

君嚴 嚴字君勝退之志其墓云孔子世三十八
台見其孫白而長身今君亮四十八世矣

送范景仁遊洛中

小人真闇事閑退豈公難道大吾何病言深聽者
寒憂時雖早白住世有還丹得酒相逢樂無心所

遇安去年行萬里蜀路走千盤投老身彌健登山
意未闌西遊爲櫻筍東道盡鷓鴣杖屨携兒去園
亭借客看折花斑竹寺弄水石樓灘鬻馬哀憐白
驚雷怯笑韓薛書標洞府歐陽永叔嘗遊嵩山日
莫於絕壁上見苔蘚成
文云神清之洞
明日復尋不見松蓋偃天壇試與劉夫子重尋靖
長官劉几云曾見人嵩山絕處
眼光如猫意其爲靖長官也

次韻景仁留別

公老我亦衰相見恨不數臨行一盃酒此意重山
岳歌詞白紵清琴弄黃鍾濁詩新妙難和飲少儘
可學欲參兵部選有力誰如犖且策諸侯山城

雄鼓角南遊許過我不憚千里邈會當聞公來倒
屐髮一握

書韓幹牧馬圖

南山之下沔渭之間想見開元天寶年八坊分屯
隘秦川四十萬疋如雲烟騅駟駱驪駟白魚
赤兔駢皇輪龍顧鳳頸俸且妍竒姿逸德隱鴛頑
碧眼胡兒手足鮮歲時翦刷供帝閑拓袍臨池侍
三千紅粧照日光流淵樓下玉螭吐清寒往來蹙
踏生飛湍衆工舐筆和朱鈇先生曹霸弟子韓旣
馬多肉尻雕圓肉中畫骨誇尤難金羈玉勒繡羅

鞍鞭箠刻烙傷天全不如此圖近自然平沙細草
荒芊綿驚鴻脫兔爭後先王良挾策飛上天何必
俯首服短轅

送魯元翰少卿知衛州

冗士無處著寄身范公園槐花忽成陰薺麥秀已
繁閉門春晝永惟有黃蜂喧誰人肯携酒共醉榆
柳村髯卿獨何者一月三到門我不往拜之髯來
意彌敦堂堂元老後亶亶仁人言憶在錢塘歲清
好均弟昆時於冰雪中笑語作春溫欲飲徑相覓
夜開叢竹軒搜尋到篋笥鮮醢無復存每愧煙火

中王腕親炮燔別來今幾何相對如夢魂告我當
北渡新詩侑清樽坡陀太行麓洶涌黃河翻仕宦
非不遇王畿西北垣斯民如魚耳見網則驚奔皎
皎千丈清不如尺水渾刑政雖首務念當養其源
一聞襦袴音盜賊安足論

次韻子由送蔣夔赴代州學官

功利爭先變法初典刑獨守老成餘窮人未信詩
能爾倚市懸知繡不如代北諸生漸狂簡床頭雜
說爲爬梳歸來問鴈吾何敢疾世王符解著書

和李邦直沂山祈雨有應

高田生黃埃下田生蒼耳蒼耳亦已無更問麥有
幾蛟龍睡足亦解慙二麥枯時雨如洗不知雨從
何處來但聞呂梁百步聲如雷試上城南望城北
際天菽粟青成堆饑火燒腸作牛吼不知待得秋
成否半年不雨坐龍慵共怨天公不怨龍今朝一
雨聊自贖龍神社鬼各言功無功日盜太倉穀嗟
我與龍同此責勸農使者不汝容因君作詩先自
効

宿州次韻劉涇

我欲歸休瑟漸希舞雩何日著春衣多情白髮三

千丈無用蒼皮四十圍晚覺文章真小技早知富
貴有危機爲君垂涕君知否千古華亭鶴自飛

見汴亦有文死矣

和孔密州五絕

見邸家園留題

大柿傳聞載酒過小詩未忍著樽磨陽關三疊君
須祕除却膠西不解歌

來詩有渭城之句

春步西園見寄

歲歲開園成故事年年行樂不辜春今年太守尤
難繼慈愛聰明惠利人

東欄梨花

梨花淡白柳深青，柳絮飛時花滿城。
惆悵東欄二株雪，人生看得幾清明。

和流杯石上草書小詩

蜂腰鶴膝嘲希逸，春蚓秋蛇病子雲。
醉裏自書醒自笑，如今二絕更逢君。

堂後白牡丹

城西千葉豈不好，笑舞春風醉臉丹。
何似後堂冰玉絮，遊蜂非意不相干。

和趙郎中見戲

孔頗有聲伎而客無見者
趙以徐伎不如東武詩
戲云只有當時燕子樓

燕子人亡三百秋，捲簾那復似揚州。
西行未必能勝此，空唱崔徽上白樓。

又

我擊藤床君唱歌，明年六十柰君何。
醉顛只要裝風景，莫向人前自洗磨。

和子由與顏長道同遊百步洪相地築亭種柳

平明坐衙不暖席，歸來閉閣閑終日。
卧聞客至倒屣迎，兩眼蒙籠餘睡色。
城東泗水步可到，路轉河洪翻雪白。
安得青絲絡駿馬，蹙踏飛波柳陰下。

身三丈兩蹄間振鬣長鳴身自乾少年狂興久已
謝但憶嘉陵遶劔關劔關大道車方軌君自不去
歸何難山中故人應大笑築室種柳何時還

次韻李邦直感舊

騶騎傳呼出跨坊簿書填委入充堂誰教按部如
何武只許清樽對孟光婉婉有時來入夢溫柔何
日聽還鄉酸寒病守尤堪笑千步空餘僕射場

與梁先舒煥泛舟得臨釀字二首

彭城古戰國孤客勸登臨汴泗交流處清潭百丈
深故人輕千里足蟹來相尋何以娛佳客潭水洗

君心

老守厭簿書先生罷函丈風流魏晉間談笑羲皇
上河洪忽已過水色綠可釀君毋輕此樂此樂清
且故

次韻答邦直子由四首

簿書顛倒夢魂間知我踈慵肯見原閑作閉門僧
舍冷病聞吹枕海濤喧忘懷杯酒逢人共引驪文
書信手翻欲吐狂言喙三尺怕君瞋我却須吞邦直
屢以此見戒

城南短李好交遊箕踞狂歌總自由尊主庇民君

東坡全集 卷之六
有道樂天知命我無憂醉呼妙舞留連夜閑作清
詩斷送秋瀟灑使君殊不俗罇前容我攬須不
老弟東來殊寂寞故人留飲慰酸寒艸荒城角開
新徑雨入河洪失舊灘車馬追陪迹未掃唱酬往
復字應漫此詩更欲憑君改待與江南子布看
君雖爲我此遲留別後淒涼我已憂不見便同千
里遠退歸終作十年遊恨無楊子一區宅懶卧元
龍百尺樓聞道鷓鴣滿臺閣網羅應不到沙鷗

司馬君實獨樂園

青山在屋上流水在屋下中有五畝園花竹秀而
野花香襲杖屨竹色侵盞罍樽酒樂餘春碁局消
長夏洛陽古多士風俗猶爾雅先生卧不出冠蓋
傾洛社雖云與衆樂中有獨樂者才全德不形所
貴知我寡先生獨何事四海望陶谷見重誦若實
走卒知司馬持此欲安歸造物不我捨名聲逐吾
輩此病天所儲撫掌笑先生年來效瘖啞

送顏復兼寄王鞏

彭城官居冷如水誰從我遊顏氏子我衰且病君
亦窮衰窮相守正其理胡爲一朝捨我去輕衫觸
熱行千里問君無乃求之歟答我不然聊爾耳京

師萬事日日新故人如故今有幾君知牛行相若
 宅扣門但覓王居士清詩草聖俱入妙別後寄我
 書連紙苦恨相思不相見約我重陽嗅霜葉君歸
 可喚與俱來未應指日妨進擬太一老仙閑不出
 張安道為太一官使踵門問道今時矣因行過我路幾何願
 君推挽加鞭箠吾儕一醉豈易得買羊釀酒從今
 始

蠍虎

黃雞啄蠍如啄黍窓間守官稱蠍虎閣中繳尾伺
 飛蠍巧捷功夫在腰脅跂跂脉脉善緣壁陋質從

來誰比數今年歲旱號蜥蜴狂走兒童鬧歌舞能
 衝渠水作冰雹便向蛟龍覓雲雨守官努力搏蒼
 蠅明年歲旱當求汝

轍幼從子瞻兄讀書未嘗一日相舍既壯將
 遊宦四方讀韋蘇州詩有云那知風雨夜復
 此對床眠惻然感之乃相約早退為閑居之
 樂故子瞻始為鳳翔幕官留詩與轍曰夜雨
 何時聽蕭瑟其後子瞻通守餘杭復移守膠
 西而轍滯留於淮陽濟南不見者七年熙寧
 十年二月始復會於澶濮之間相從彭城留

百餘日時宿於逍遙堂追感前約作二小詩
逍遙堂後千尋木長送中宵風雨聲悞喜對床尋
舊約不知漂泊在彭城

秋來東閣涼如水客至山公醉似泥困卧北窓呼
不醒風吹松竹雨淒淒

子由將赴南都與余會宿於逍遙堂作兩絕
句讀之殆不可爲懷因和其詩以自解念觀
子由自少曠達天資近道又得至人養生長
年之訣而余亦竊聞其一二以爲今者宦遊
相別之日淺而異時退休相從之日長旣以

自解且以慰子由六

別期漸近不堪聞風雨蕭蕭已斷魂猶勝相逢不
相識形容變盡語音存

但令朱雀長金花此別還同一轉車五百年間誰
復在會看銅狄兩咨嗟

留題石經院三首

葱蒨門前路行穿翠密中却來堂上看巖谷意無
窮

天矯庭中檜枯枝鵲踏消瘦皮纏鶴骨高頂轉龍
腰

窈窕山頭井潛通伏澗清欲知深幾許聽放轆轤
聲

過雲龍山人張天驥

郊原雨初足風日清且好病守亦欣然肩輿白門
道荒田咽蛩蚓村巷懸梨棗下有幽人居閉門空
雀噪西風高正厲落葉紛可掃孤鐘卧斜日病馬
放秋草墟里通有無垣墻任摧倒君家本冠蓋絲
竹間隣保脫身聲利中道德自濯淖躬耕抱羸疾
奉養百歲老詩書膏吻頰菽水媚翁媪饑寒天隨
子杞菊自擷茗慈孝董邵南雞狗相乳抱吾生如

寄耳歸計失不早故山豈敢忘但恐迫華皓從君
學種秫斗酒時相勞

贈王仲素寺丞名景純

養氣如養兒棄官如棄泥人皆笑子拙事定竟誰
迷歸耕獨患貧問子何所齋尺宅足自庇寸田有
餘畦明珠照短褐陋室生虹霓雖無孔方兄顧有
法喜妻彈琴一長嘯不答阮與嵇曹南劉夫子名
與子政齊家有鴻寶書不鑄金裘歸促膝問道要
遂蒙分刀圭不忍獨不死尺書肯見梯我生本強
鄙少以氣自擠孤舟倒江河赤手攬象犀年來稍

自笑留氣下暖臍苦恨聞道晚意象颯已淩空見
孫思邈區區賦病梨

陽關詞三首

受降城下紫髯郎戲馬臺南古戰場恨君不取契
丹首金甲牙旗歸故鄉

右贈張繼愿

濟南春好雪初晴行到龍山馬足輕使君莫忘
溪女時作陽關腸斷聲

右荅李公擇

暮雲收盡溢清寒銀漢無聲轉玉盤此生此夜不

長好明日明年何處看

右中秋月

和孔周翰二絕

再觀邸園留題

小園香霧曉蒙籠辭手狂詞未必工象叟吟詠詩應
有取曲收彤管邸園風

觀淨觀堂效韋蘇州詩

絳羽巢林在一枝幽人蝸舍兩相宜樂天長短三
十首却愛韋郎五字詩

京師哭任遵聖

東坡全集
十年不還鄉兒女日夜長豈惟催老大漸復成凋
喪每聞耆舊亡涕泣聲輒放老任况竒逸先子推
輩行文章小得譽詩語尤清壯更能復所長談笑
萬夫上白喜作劇縣偏工破豪黨奮髯走得吏嚼
齒對姦將哀哉命不偶每以才得謗竟使落窮山
青衫就黃壤宦遊久不樂江海永相望退耕本就
君時節相勞餉此懷今不遂歸見纍纍堊望哭國
西門落日銜千嶂平生惟一子抱負珠在掌見之
齟齬中已有食牛量他年如入洛生死一相訪惟
有王濬冲心知中散狀

荅任師中家漢公

先君昔未仕杜門皇祐初道德無貧賤風采照鄉
閭何嘗踈小人小人自闊疎出門無所詣老吏在
郊墟門前萬竿竹堂上四庫書高樹紅消梨小池
白芙蓉常呼赤脚婢雨中掘園蔬矯矯任夫子罷
官還舊廬是時里中兒始識長者車烹雞酌白酒
相對歡有餘有如龐德公往還葛與徐妻子走堂
下主人竟誰歟我時年尚幼作賦慕相如侍立看
君談精悍實起予歲月曾幾何耆老逝不居史侯
最先沒孤墳拱桑樗我亦涉萬里清血蒲襟祛漂

流二十年始悟萬緣虛獨喜任夫子老佩刺史魚
威行烏白鬢解辯請冠裾方當入奏事清廟陳璠
瑛胡爲厭軒冕歸意不少紆上蔡有良田黃沙走
涓渠罷亞百頃稻雍容十年儲閑隨李丞相搏射
鹿與猪蒼鷹十斤重猛犬如黃驢豈比陶淵明窮
苦自把鋤我今四十二衰髮不滿梳彭城古名郡
之人偶見除頭顱已可知幾何不樵漁會當相從
去芒鞋老菑畬念子瘴江邊懷抱向誰摠賴我同
羊友相歡出同輿冰盤薦文鮪鮪鮪也戊
瀘常有王竿傾
浮蛆醉中忽思我清詩綴瓊琚知我少詼諧教我

時卷舒世事日反覆翩如風中旟雀羅弔廷尉秋
扇悲婕妤升沉一何速喜怒紛衆狃作詩謝二子
我師寧與遽

初別子由

我少知子由天資和而清好學老益堅表裏漸融
明豈獨爲吾弟要是賢友生不見六七年微言誰
與齋常恐坦率性放縱不自程會合亦何事無言
對空秤使人之意消不善無由萌森然有六女包
裹布與荆無憂顏賢婦藜藿寺大烹使子得行意
青衫陋公卿明日無晨炊倒床作雷鳴秋眠我東

閤夜聽風雨聲懸知不久別妙理重細評昨日忽
出門孤舟轉西城歸來北堂上古屋空崢嶸退食
悞相從入門中自驚南都信繁會人事水火爭念
當閉閣坐頽然寄聾盲妻子亦細事文章固虛名
會須掃白髮不復用黃精

次韻呂梁仲屯田

雨葉風花日夜稀一杯相屬竟何時空虛豈敢酬
瓊玉枯朽猶能出菌芝門外呂梁從迅急胸中雲
夢自透遲待君筆力追靈運莫負南臺九日期

章質夫寄惠崔微直

王紉半脫雲垂耳亭亭芙蓉在秋水當時薄命一
酸辛千古華堂奉君子水邊何處無麗人近前試
看丞相嗔不如丹青不解語世間言語元非真知
君被惱更愁絕卷贈老夫驚爲老拙爲君援筆賦梅
花未害廣平心似鐵

王鞏屢約重九見訪既而不至以詩送將官
梁交且見寄次韻答之交頗文雅不類武人
家有侍者甚忌麗

知君月下見傾城破恨懸知酒有兵老守無何惟
日飲將軍競病自詩鳴花枝不共秋欹帽筆陣空

來夜斫營愛惜微官將底用他年只好寫銘旌

臺頭寺雨中送李邦直赴史館分韻得憶字

人字無寄孫巨源二首

霜林日夜西風急老送君歸百憂集清歌窈眇入
行雲雲為不行天為泣紅葉黃花秋正亂白魚紫
蟹君須憶憑君說向鷺將軍衰豎相逢應不識
珥筆西歸近紫宸太平典冊不緣麟付君此事寧
論晉載我當時舊過秦門外想無千斛米墓中知
有百年人看君兩眼明如鏡休把春秋坐素臣

代書荅梁先

此身與世直悠悠蒼顏華髮誰汝留強名太守古
徐州忘歸不如楚沐猴魯人豈獨不知丘藉隣夫
子無罪尤異哉梁子清而脩不遠千里從我游瞭
然正色懸雙眸世之所馳子獨不一經通明傳節
侯小楷精絕規摹歐梁上學歐
陽公書我衰廢學懶且媮
畏見問事賈長頭別來紅葉黃花秋夜夢見之起
坐愁遺我駭石盆與甌黑質白章聲琳球謂言山
石生澗溝追琢尚可王公差感子佳意能無酬反
將木瓜報瓊投學如富賈在博收仰取俯拾無遺
籌道大如天不可求脩其可見致其幽願子篤實

慎勿浮發憤忘食樂忘憂

九日邀仲屯田爲大水所隔以詩見寄次其

韻

無復龍山對孟嘉西來河伯意雄夸霜風可使吹

黃帽

舟人黃帽土勝水也

尊酒那能泛浪花謾遣鯉魚傳尺

素却將燕石報瓊華何時得見悲秋老醉裏題詩

字半斜

河復 并敘

熙寧十年秋河決澶淵注鉅野入淮泗自澶魏以
北皆絕流而濟楚大被其害彭門城下水二丈八

尺七十餘日不退吏民疲於守禦十月十三日澶
州大風終日旣止而河流一枝已復故道聞之喜
甚庶幾可塞乎乃作河復詩歌之道路以致民願
而迎神休蓋守土者之志也

君不見西漢元光元封間河決瓠子二十年鉅野
東傾淮泗滿楚人恣食黃河鱸萬里沙回封禪罷
初遣越巫沉白馬河公未許人力窮薪芻萬計隨
流下吾君仁聖如帝堯百神受職河神驕帝遣風
師下約束北流夜起澶州橋東風吹凍收微渌神
功不用淇園竹楚人種麥滿河淤仰看浮槎棲古

木

韓幹馬十四疋

二馬並驅攢八蹄二馬宛頸駿尾齊一馬任前雙
舉後一馬却避長鳴嘶老髯奚官騎且顧前身作
馬通馬語後有八匹飲且行微流赴吻若有聲前
者既濟出林鶴後者欲涉鶴俛啄最後一匹馬中
龍不嘶不動尾搖風韓生畫馬真是馬蘇子作詩
如見畫世無伯樂亦無韓此詩此畫誰當看

有言郡東北荆山下可以溝畎積水因與吳
正字王戶曹同往相視以地多亂石不果還

遊聖女山山有石室如墓而無棺椁或云朱

司馬桓魋墓二子有詩次其韻二首

側手區區未易遮奔流一瞬卷千家共疑智伯初
圍趙猶有張湯欲漕斜已坐迂疎來此地分將勞
苦送生涯使君下策真堪笑隱隱驚雷響踏車

茫茫清泗遶孤岑歸路相將得暫臨試著芒鞋穿
犖确更然松炬照幽深縱令司馬能鑿石柰有中
郎解摸金強寫蒼崖留歲月他年誰識此時心

贈寫御容妙善師

憶昔射策干先皇珠簾翠幄分兩相紫衣中使下

傳詔跪捧再拜聞天香仰觀眩晃目生暈但見曉
色開扶桑迎陽晚出步就坐餘日王斧光照廊野
人不識日月角髣髴尚記重瞳光三年歸來真一
夢橋山松檜淒風霜天容玉色誰敢盡老師古寺
晝閉房夢中神授心有得覺來信手筆已忘幅巾
常服儼不動孤臣入門涕自滂元老俯坐須眉古
虎臣立侍冠劍長平生慣寫龍鳳質肯顧草間猿
與麀都人踏破鐵門限黃金白壁空堆林爾來墓
寓亦到我謂是先帝白髮郎不須覽鏡坐自了明
年乞身歸故鄉

哭刁景純

讀書想前輩每恨生不早紛紛少年場猶得見此
老此老如松柏不受霜雪槁直從毫末中自養到
合抱宏材乏近用千歲自枯倒文章餘正始風節
貫華皓平生爲人耳自爲薄如縞是非雖難齊反
覆看愈好前年旅吳越把酒慶壽考扣門無晨夜
百過迹未掃但知從德公未省厭丘嫂別時公八
十後會知難保昨日故人書連年喪公媪景純妻
先作
傷心范橋水漾漾舞寒藻華堂不見人瘦馬空戀
早我欲江東去匏樽酌行潦鏡湖無賀監慟哭稽

山道忽見萬松岡荒池沒秋草

答呂梁仲屯田

亂山合沓圍彭門官居獨在懸水村呂梁地名居民蕭
條雜麋鹿小市冷落無雞豚黃河西來初不覺但
訝清四流奔渾夜間沙岸鳴壘蓋曉看雪浪浮鵬
鯤呂梁自古喉吻地萬頃一抹何由吞坐觀入市
巷間井吏民走盡餘王尊計窮路斷欲安適吟詩
破屋愁鳶蹲歲寒霜重水歸壑但見屋瓦留沙痕
入城相對如夢寐我亦僅免爲魚鼈旋呼歌舞雜
詠笑不惜飲醪空斝益念君官舍冰雪冷新詩美

酒聊相溫人生如寄何不樂任彼絳鳩燒黃昏直
房未築淮泗滿故道堙滅瘡痍存明年勞苦應更
甚我當畚鍤先黥髡付君萬指伐頑石千鎚雷動
蒼山根高城如鐵洪口決談笑却掃看崩奔農夫
掉臂免狼顧秋穀布野如雲屯還須更置軟脚酒
爲君擊鼓行金樽

張寺丞益齋

張子作齋舍而以益爲名吾聞之夫子求益非速
成譬如遠遊客日夜事征行今年適燕薊明早走
蠻荆東觀盡滄海西涉涓與涇歸來閉戶坐八方

在軒庭又如學醫人識病由飽更風雨晦明淫跛
蹇瘖聾盲虛實在其脉靜躁在其情榮枯在其色
壽夭在其形苟能閱千人望見知死生爲學務日
益此言當自程爲道貴日損此理在既盈願君書
此詩以爲益齋銘

荅孔周翰求書與詩

身閑曷不長閉口天寒正好深藏手吟詩寫字有
底忙未脫多生宿塵垢不蒙譏訶子厚疾反更刻
畫無鹽醜征西自有家雞肥太白應驚飯山瘦與
君相從知幾日東風待得花開否撥棄萬事勿


談百觚之後那辭酒

送李公恕赴闕

君才有如切玉刀見之凜凜寒生毛願隨壯士斬
蛟蜃不願腰間纏綿條用違其才志不展坐與胥
更同疲勞忽然眉上有黃氣吾君漸欲收英髦立
談左右俱動色一語徑破千言牢我頃分符在東
武脫略萬事惟嬉遊盡壞屏障通內外仍
爲馬曹君爲使者見不問反更對飲持雙螯酒酣
箕坐語驚衆雜以嘲諷窮詩騷世上小兒多忌諱
獨能容我真賢豪爲我買田臨汝水逝將歸去誅

蓬蒿安能終老塵上下俯仰隨人如桔槔

東坡全集第八卷終



國家圖書館, NATIONAL CENTRAL LIBRARY, TAIWAN, R.O.C.

東坡全集第九卷

詩六十七首

春菜

蔓菁宿根已生葉
韭牙戴土拳如蕨
爛丞香薺白魚肥
碎點青蒿涼餅滑
宿酒初消春睡起
細履幽畦掇芳辣
茵陳甘菊不負渠
繪縷堆盤纖手抹
比方苦寒冷未已
雪底菠薐如鐵甲
豈如吾蜀富冬蔬
霜葉露牙寒更茁
久拋菘葛猶細事
苦筍江豚那忍說
明年投効徑須歸
莫待齒搖并髮脫

送鄭戶曹



游遍錢塘湖上山歸來文字帶芳鮮羸僮瘦馬從
吾飲陋巷何人似子賢公業有田常乏食廣文好
客竟無甌東歸不趁花時節開盡春風誰與妍

虔州八境圖八首

坐看奔湍遶石樓使君高會百無憂三年竊鄙秦
太守八詠聊同沈隱侯

壽頭寂寞打城還章韞臺前莫靄寒勸客登臨無
限思孤雲落日長安

白鵲樓前翠作堆紫雲嶺路若爲開故人應在十
山外不寄梅花遠信來

未樓深處日微明皂蓋歸時酒半醒薄暮漁樵人
去盡碧溪青嶂遶螺亭

使君那暇日叅禪一望叢林一帳然成佛莫教靈
運後着鞭從使祖生先

却從塵外望塵中無限樓臺煙雨濛山水照人迷
向背只尋孤塔認西東

煙雲繚眇鬱孤臺積翠浮空雨半開想見之朶觀
海市絳宮明滅是蓬萊

回峰亂嶂鬱參差雲外高人世得知誰向空山弄
明月山中木客解吟詩

東坡全集 卷之九
讀孟郊詩二首

夜讀孟郊詩細字如牛毛寒燈照昏花佳處時一
遭孤芳擢荒穢古語餘詩騷水清石鑿鑿湍激不
受篙初如食小魚所得不償勞又似煮彭蠡竟日
嚼空螯要當鬪僧清未足當韓豪人生如朝露日
夜火消膏何苦將兩耳聽此寒蟲號不如且置之
飲我玉卮醪

我憎孟郊詩復作孟郊語饑腸自鳴喚空壁轉饑
鼠詩從肺腑出出輒愁肺腑有如黃河魚出膏以
自煮尚愛銅斗歌鄙俚頗近古桃弓射鴨罷獨

短策舞不憂踏船翻踏浪不踏七吳姬霜雪白赤
脚浣白紵嫁與踏浪兒不識離別苦歌君江湖曲
感我長羈旅

訪張山人得山中字二首

魚龍隨水落猿鶴喜君還舊隱丘墟外新堂紫翠
間野麋馴杖屨幽桂出榛菅洒掃門前路山公亦

愛山

張故居為大水所壞
新卜此宅故居之東

萬木鎖雲龍山名天留與戴公路迷山向背人在瀼
西東薺麥餘春雪櫻桃落晚風入城都不記歸路
醉眠中

送孔郎中赴陝郊

驚風擊面黃沙走西出峭函脫塵垢使君來自古
徐州聲震河潼殷關右十里長亭聞鼓角一川秀
色明花柳北臨飛檻卷黃流南望青山如峴首東
風吹開錦繡谷淥水翻動蒲萄酒訟庭生草數開
樽過客如雲牢閉口

與梁左藏會飲傅國博家

將軍破賊自草檄論詩說劍俱第一彭城老守本
虛名識字劣能欺項籍風流別駕貴公子欲把笙
歌暖鋒鏑紅旆朝開猛士隳翠帷暮卷佳人出東
堂醉卧呼不起啼鳥落花春寂寂試教長笛傍瓦
根一聲吹裂堦前石

寒食日谷公擇三絕次韻

從來蘇李得名雙只恐全齊笑陋邦詩似懸河供
不辦故欺張籍隴頭灑
簿書馨鼓不知春佳句相呼賴故人寒食得公方
上冢歸來誰主復誰賓

巡城已困塵埃眯執朴仍遭蟻蝨綠欲脫布衫携

素手試開病眼點黃連

來詩謂僕布衫督後

約公擇飲是日大風

先生生長匡廬山山中讀書三十年舊聞飲水師
顏淵不知治劇乃所便偷兒夜探赤白丸奮髯忽
逢朱子元半年群盜誅七百誰信家書藏九千春
風無事秋月閑紅粧執樂豪且妍紫衫玉帶兩部
全琵琶一抹四十絃客來留飲不計錢齊人愛公
如子產兒啼卧路呼不還我慙山郡空留連牙兵
部吏笑我寒邀公飲酒公無難約束官奴買花鈿
薰衣理髮夜不眠曉來顛風塵暗天我思其田豈
坐慳作詩愧謝公笑謹歸來瑟縮愈不安要當談
公八百里豪氣一洗儒生酸

座上賦戴花得天字

清明初過酒闌珊折得奇葩晚更妍春色豈關吾
輩事老狂聊作座中先醉吟不耐歌紗帽起舞從
教落酒船結習漸消留不住却須還與散花天

夜飲次韻畢推官

簿書叢裏過春風酒聖時時且復中紅燭照庭嘶
騷裏黃雞催曉唱玲瓏老來漸減金釵興醉後空
驚玉筋工月未上時應早散免教壑谷問吾公

續麗人行

李仲謀家有周昉畫背面欠伸內人極精

戲作此詩

深宮無人春日長沉香亭北百花香美人睡起薄
梳洗燕舞鶯啼空斷腸畫工欲畫無窮意背立東
風初破睡若教回首却嫣然陽城下蔡俱風靡杜
陵饑客眼長寒寒驢破帽隨金鞍隔花臨水時一
見只許腰支背後看心醉歸來茅屋底方信人間
有西子君不見孟光舉案與眉齊何曾背面傷春
啼

聞李公擇飲傅國博家大醉二首

兒童拍手鬧黃昏應笑山公醉習園縱使先生能

一石主人未肯獨留髡

不肯惺惺騎馬迴正山知爲王人頽紫雲有語君
知否莫喚分司御史來

起伏龍行

并敘

徐州城東二十里有石潭父老云與泗水通增損
清濁相應不差時有河魚出焉元豐元年春旱或
云置虎頭潭中可以致雷雨用其說作起伏龍行
一首

何年白竹千鈞弩射殺南山雪毛虎至今顛骨帶
霜牙尚作四海毛蟲祖東方久旱千里赤三月行

人口生土碧潭近在古城東神物所蟠誰敢侮上
欹蒼石擁巖竇下應清河通水府眼光作電走金
蛇鼻息爲雲握煙縷當年負圖傳帝命左右義軒
詔神禹爾來懷寶但貪眠蒲腹雷霆瘖不吐赤龍
白虎戰明日是月丙辰倒卷黃河作飛雨嗟吾豈
樂鬪兩雄有事徑須煩一怒

聞公擇過雲龍張山人輒往從之公擇有詩
戲用其韻

我生固多愛肉食常苦墨軒然就一笑猶得好飲
力聞君過雲龍對酒兩靜默急攜清歌女出郭及
未曷一歡難力致邂逅有勝特喧蜂集晚花亂雀
啁叢棘山人樂此耳寂寞誰侍側何當求好人聊
使治要褻使君自孤憤此理誰相直不如學養生
一氣服千息

送李公擇

嗟余寡兄弟四海一子由故人雖云多出處不我
謀弓車無停招逝去勢莫留僅存今幾人各在天
一畝有如長庚月到曉爛不收宜我與夫子相好
手足侔比年兩見之賓主更獻酬樂哉十日飲衍
衍和不流論事到深夜僵仆鈴與騶頗嘗見使君

有客如此不欲別不忍言慘慘集百憂念我野夫
兄知名三十秋已得其爲人不待風馬牛他年林
下見頰蓋如白頭

送荀芍藥與公擇二首

久客厭虜饌蜀人謂東虜子枵然思南烹故人知我意
千里寄竹萌駢頭玉嬰兒一一脫錦裯庖人應未
識旅人眼先明我家拙厨膳彘肉芼蕪菁送與江
南客燒煮配香粳

今日忽不樂折盡園中花園中亦何有芍藥裊殘
葩久旱復遭雨紛披亂泥沙不折亦安用折去還

可嗟棄擲亮未能送與謫仙家還將一枝春插向
兩髻丫

和孫莘老次韻

去國光陰春雪消還家蹤迹野雲飄功名正自妨
行樂迎送纔堪博早朝雖去友朋親吏卒却辭讒
謗得風謠明年我亦江東去不問繁華與寂寥

游張山人園

壁間一軸煙蘿子盆裏千枝錦被堆慣與先生爲
酒伴不嫌刺史亦顏開纖纖入麥黃花亂颯颯催
詩白雨來聞道君家好井水歸軒乞得滿餅回

杜介熙熙堂

崎嶇世路取先回窈窕華堂手自開咄咄何曾書
怪事熙熙長覺似春臺白砂碧玉味方永黃紙紅
旗心已灰遙想閉門投轄飲鴟絃鐵揆響如雷

次韻荅劉涇

吟詩莫作秋蟲聲天公怪汝鈎物情使汝未老華
髮生芝蘭得雨蔚青青何用自燔以出馨細書千
紙雜真行新音百變口如鶯異議蜂起弟子爭舌
翻濤瀾卷齊城萬卷堆胸兀相撐以病爲樂子未
驚我有至味非煎烹是中之樂吁難名綠槐如山

閭廣庭飛蟲繞耳細而清敗席展轉卧看經亦自
不嫌翠織成意行信足無溝坑不識五郎呼作卿
吏民哀我老不明相戒毋復煩鞭荆時臨泗水照
星星微風不起鏡面平安得一舟如葉輕卧聞郵
籤報水程尊羹羊酪不須評一飽且救饑腸鳴

携妓樂游張山人園

大杏金黃小麥熟墮巢乳鵲奉新竹故將俗物惱
幽人細馬紅粧滿山谷提壺勸酒意雖重杜鵑催
歸聲更速酒闌人散却關門寂歷斜陽挂疎木

種德亭并敘

東坡全集 卷之九
處士王復家於錢塘爲人多技能而醫尤精期於活人而已不志於利築室候潮門外治園圃作亭榭以與賢士大夫游惟恐不及然終無所求人徒知其接花藝果之勤而不知其所種者德也乃以名其亭而作詩以遺之

小圃旁城郭閉門芝朮香名隨市人隱德與佳木長元化善養性倉公多禁方所活不可數相逢旒相忘但喜賓客來置酒花滿堂我欲東南去再觀雙檜蒼山茶想出屋湖橋應過墻木老德亦熟吾言豈荒唐

文與可有詩元寄云待將一段鵝溪綉掃取寒梢萬尺長次韻答之

爲愛鵝溪白靈光掃殘雞距紫毫鉞世間那有千尋竹月落庭空影許長

聞辯才法師復歸上天竺以詩戲問

道人出山去山色如死灰白雲不解笑青松有餘哀忽聞道人歸鳥語山容開神光出寶髻法雨洗浮埃想見南北山花發前後臺寄聲問道人借禪以爲誑何所聞而去何所見而回道入笑不答此意安在哉昔年本不住今者亦無來此語竟非是

且食白楊梅

和子由送將官梁左藏仲通

雨足誰言春麥短城堅不怕秋濤卷日長惟有睡
相宜半脫紗巾落統扇芳草不鋤當戶長珍禽獨
下無人見覺來身世都是夢坐久枕痕猶著面城
西忽報故人來急掃風軒炊麥飯徐州伏波論兵
初矍鑠中散談仙更清遠南都從事亦學道不卹
勝空誇腦滿問羊他日到金華應許相將游闕苑

黃初平之兄華
其弟於金華山

次韻秦觀秀才見贈秦與孫莘老李公擇甚

熟將入京應舉

夜光明月非所投逢年遇合百無憂將軍百戰竟
不侯伯郎一斗得涼州翹關負重君無力十年不
入紛華域故人坐上見君文謂是古人吁莫側新
詩說盡萬物情硬黃小字臨黃庭故人已去君未
到空吟河畔草青青誰謂他鄉各異縣天遣君來
破吾願一聞君語識君心短李髯孫眼中見江湖
放浪久全真忽然一鳴驚倒人從橫所值無不可
知君不怕新書新千金弊帚那堪換我亦淹留豈
長筭山中既未決同歸我聊爾耳君其漫

僕曩於長安陳漢卿家見吳道子畫佛碎爛
可惜其後十餘年復見之於鮮于子駿家則
已裝背完好子駿以見遺作詩謝之

貴人金多身復閑爭買書畫不計錢已將鐵石充

逸少

殷鐵石梁武帝時人今法帖大王書中有鐵石字

更補朱繇為道玄

世所收吳畫多朱繇筆也

煙熏屋漏裝玉軸鹿皮蒼壁知誰賢

吳生畫佛本神授夢中化作飛空僊覺來落筆不
經意神妙獨到秋毫顛我昔長安見此畫歎惜至
寶空潜然素絲斷續不忍看已作胡蝶飛聯翩君
能收拾為補綴體質散落嗟神全志公髣髴見刀

尺脩羅天女猶雄妍如觀老杜飛鳥句脫字欲補
知無緣問君乞得良有意欲將俗眼為洗滌貴人
一見定羞作錦囊千紙何足指不須更用博麻縷
付與一炬隨飛煙

雨中過舒教授

疎疎簾外竹瀏瀏竹間雨窓扉靜無塵几碗寒生
霧美人樂幽獨有得緣無慕坐依蒲褐禪起聽風
甌語客來淡無有灑掃涼冠履濃茗洗積昏妙香
淨浮慮歸來北堂闌一一微螢度此生憂患中一
餉安閑處飛鳶悔前笑黃犬悲晚悟自非陶靖節

誰識此間趣

次韻舒教授寄李公擇

草書妙絕吾所兄真書小低猶抗行論文作詩俱

不敵看君談笑收降旌去年逾月方出晝予去年留齊月

餘爲君劇飲幾濡首今年過我雖少留寂寞陶潛

方止酒此行公擇病酒夕不飲別時流涕攬君須懸知此歡

墮空虛松下從橫餘屐齒門前纏轆想君車怪君

一身都是德近之清潤淪肌骨細思還有可恨時

不許藍橋見傾國公擇有姪冬五英屢欲出不果

送鄭戶曹

水遶彭城樓山圍戲馬臺古來豪傑地千歲有餘

哀隆準飛上天重瞳亦成灰白門下呂布大星隕

臨淮尚想劉德輿置酒此徘徊爾來苦寂寞廢圃

多蒼苔河從百步響山到九里回山水自相激夜

聲轉風雷蕩蕩清河壩黃樓我所開秋月墮城角

春風搖酒杯遲君爲坐客新詩出瓊瑰樓成君已

去人事固多乖他年君倦游白首賦歸來登樓

長嘯使君安在哉

次韻黃魯直見贈古風二首

佳穀卧風雨菑莠登我場陳前漫方丈王食慘無

光大哉天宇間美惡更臭香君看五六月飛蚊殷
回廊茲時不少暇俛仰霜葉黃期君蟠桃枝千歲
終一嘗顧我如苦李全生依路傍紛紛不足愠悄
悄徒自傷

空山學仙子妄意笙簫聲千金得竒藥開視皆豨
苓不知市人中自有安期生今君已度世坐閱霜
中帶摩挲古銅人歲月不可計閩風安在哉要君
相指似

次韻荅舒教授觀余所藏墨

異時長笑王會稽野鷺臙腥汗刀几莫年却得庾
安西自厭家雞題六紙二子風流冠當代顧與兒
童爭愠喜秦王十八已龍飛嗜好晚將蛇蚓比我
生百事不挂眼時人繆說云工此世間有癖念誰
無傾身障麈尾堪鄙一生當著幾兩屐定心肯爲
微物起此墨足支三十年但恐風霜侵髮齒非人
磨墨墨磨人鉞應未罄墨先耻逝將振衣歸故國
數畝荒園自鋤理作書寄君君莫笑但覓來禽與
青李一螺點漆便有餘萬竈燒松何處使君不見
永寧第中擣龍麝列屋閑居清且美倒暈連眉秀
嶺浮雙鴉畫髻香雲委時聞五斛賜蛾綠不惜千

金求懶髓聞君此詩當大笑寒窓冷硯冰生水

送鄭戶曹賦席上果得榘子

彼美玉山果粲爲金盤實瘴霧脫蠻溪清樽奉佳
客客行何以贈一語當加璧祝君如此果德膏以
自澤驅攘三彭仇已我心腹疾願君如此木凜凜
傲霜雪斷爲君倚几滑淨不容削物微興不淺此
增毋輕擲

送胡掾

亂葉和淒雨投空如散絲流年一如此游子去何
之節義古所重艱危方自茲他時著清德仍復畏

人知

荅仲屯田次韻

秋來不見漢波岑千里詩盟忽重尋大木百圍生
遠籟朱絃三嘆有遺音清風卷地收殘暑素月流
天掃積陰欲遣何人廢絕唱滿塔桐葉候蟲吟

密州宋國博以詩見紀在郡雜詠次韻荅之
吾觀二宋文字字字照縑素淵源皆有考竒嶮或難
句後來邈無繼嗣子其殆庶胡爲尚流落用舍真
有數當時苟悅可慎勿笑杖杜斲窓誰赴秋袖手
良優裕山城辱吾繼缺短煩遮護昔年繆陳詩無

東坡全集 卷之九 七五
人聊瓦注于今廢絕唱外重中已懼何當州家集
擊壤追咸濩

荅范祖禹

吾州下邑生劉季誰數區區張與李來詩有張僕射李臨淮之

句重瞳遺迹已塵埃惟有黃樓臨泗水郡有廳事俗謂之朝

王廳相傳不可坐僕拆之以蓋黃樓而余太守老且寒俠氣不洗儒

生酸猶勝白門窮呂布欲將鞍馬事曹瞞

次韻荅王定國

每得君詩如得書宣心寫妙書不如眼前百種無
不有知君一以詩驅除傳聞都下十日雨青泥沒

馬衛生魚舊雨來人今不來油然獨酌卧清虛名堂

我雖作郡古云樂山川信美非吾廬願君不廢重
九約念此衰冷勤呵嘘

芙蓉城并敘

世傳王迥字子高與仙人周瑤英游芙蓉城元豐
元年三月余始識子高問之信然乃作此詩極其
情而歸之正亦變風止乎禮義之意也

芙蓉城中花冥冥誰其主者石與丁珠簾玉樓翳
翠屏雲舒霞卷千俦停中有一人長眉青炯如微
雲淡疎星往來三世空練形竟坐誤讀黃庭經天

門夜開飛爽靈無復白日乘雲輶俗緣千劫磨不
盡翠被冷落妻餘馨因過緱山朝帝廷夜聞笙簫
弭節聽飄然而來誰使令皎如明月入牕櫺忽然
而去不可執寒衾虛幌風泠泠仙宮洞房本不扃
夢中同躡鳳凰羽徑渡萬里如奔霆王樓浮空聳
亭亭天書雲篆誰所銘遶樓飛步高矜孿仙風鏘
然韻流鈴籟籟形開如酒醒芳卿寄謝空丁寧一
朝覆水不返餅羅巾別淚空熒熒春風花開秋葉
零世間羅綺紛臃腥此生流浪隨滄溟偶然相值
兩浮萍願君收視觀三庭勿與嘉穀生蝗螟從渠

一念三千齡下作人間尹與邢

和鮮于子駿鄆州新堂月夜二首

前次韻
後不次

去歲游新堂春風雪消後池中半篙水池上千尺
柳佳人如桃李胡蝶入衫袖山川今何許疆野已
分宿歲月不可思駛若船放溜繁華真一夢寂寞
兩榮朽惟有當時月依然照杯酒應憐船上人坐
穩不知漏

明月入華池反照池上堂堂中隱几人心與水月
涼風螢已無迹露草時有光起觀河漢流步屨響
長廊名都信繁會千指調絲簧先生病不飲童子

為燒香獨作五字詩清絕如韋郎詩成月漸側皎
皎兩相望

送將官梁左藏赴莫州

燕南番趙北際其間不合大如礪至今父老哀公
孫烝土為城鐵作門城中積穀三百萬猛士如雲
驕不戰一朝鼓角鳴地中帳下美人空掩面豈如
千騎平時來笑談聲欬生風雷葛巾羽扇紅塵靜
投壺雅歌清燕開東方健兒虓虎樣泣涕懷思廉
耻將彭城老守亦凄然不見君家雪兒唱

次韻子由送趙屺歸觀錢塘遂赴永嘉

歸舟轉河曲稍見楚山蒼候吏來迎客吳音已帶
鄉言從謝康樂先獻魯靈光已擊三千里何須四
十強風流半刺史清絕校書郎到郡詩成集尋溪
水濺裳芒鞋隨採藥蠶紙記流觴海靜蛟鼉出山
空草木長宦游無遠近民事要更嘗願子傳家法
他年請尚方

中秋月三首

殷勤去年月澹灑古城東憔悴去年人卧病破窓
中徘徊巧相覓窈窕穿房櫳月豈知我病但見歌
樓空撫枕三嘆息扶杖起相從天風不相哀吹我

落瓊宮白露入肝肺夜吟如秋蟲坐令太白豪化為東野窮餘年知幾何佳月豈屢逢寒魚亦不睡竟夕相噉嚼

六年逢此月五年照離別

中秋有月凡六年矣惟去歲與子由會於此

歌君別時曲滿坐為淒咽留都信繁麗此會豈輕擲鎔銀百頃湖挂鏡千尋闕三更歌吹罷人影亂清懋歸來北堂下寒光翻露葉喚酒與婦飲念我向兒說豈知衰病後空盞對梨栗但見古河東麩麥如鋪雪欲和去年曲復恐心斷絕

舒子在汶上閉門相對清

舒煥軾舉人鄆州

鄭子向河朔

鄭惟趙北京戶曹

孤舟連夜行頃子雖咫尺兀如在牢局

頃起來徐試舉人

趙子寄書來水調有餘聲

今日得趙果卿書猶記余

在東武中秋所作小語歌頭

悠哉四子心共此千里明明月不

解老良辰難合并回顧坐上人聚散如流萍嘗聞

此宵月萬里同陰晴

故人文生為余言嘗見海賈云中秋有月則是歲味多而

圓賈人常以此候之雖相去萬里他日會合相問陰晴無不同者

天公自著意此

會那可輕明年各相望俯仰今古情

中秋見月寄子由

西風吹暑天益高明月耿耿分秋毫彭城閉門青嶂合坐聽百步鳴飛濤史君携客登燕子月色著

東坡全集 卷之九 十九
人如著水筵前不設鼓與鐘處處笛聲相應起浮
雲卷盡流金丸戲馬臺西山鬱蟠杯中淥酒一時
盡衣上白露三更寒扁舟明日浮古汴回首逡巡
陵谷變河吞巨野入長淮城沒黃流只三板明年
築城似山伐木爲堤更堅黃樓未成河已退
空有遺迹令人看城頭看月應更好河流深處今
生草子孫免被魚鼈食歌舞聊寬史君老南都從
事老更貧羞見青天月照人飛鶴投籠不能出曾
是彭城坐中客

和子由中秋見月

明月未出群山高瑞光千丈生白毫一杯未盡銀
闕滿亂雲脫壞如崩濤誰爲天公洗眸子應費明
河千斛水遂令冷看世間人照我湛然心不起西
南火星如彈丸角尾奕奕蒼龍蟠今宵注眼看
不見更許螢火爭清寒何人艤舟臨古汴千燈夜作
魚龍變曲折無心逐浪花低昂赴節隨歌板是夜賈客舟中放
水燈青熒滅沒轉前山浪颭風迴豈復堅明月
易低人易散歸來呼酒更重看堂前月色愈清好
咽咽寒螿鳴露草蒼籬推戶寂無人窓下唧啞惟
楚老近有一孫名楚老南都從事莫羞貧對月題詩有幾

人明朝人事隨日出恍然一夢瑤臺客

荅王鞏上將見過有詩自謂惡客戲之

汴泗遶吾城城堅如削鐵中有李臨淮號令肝膽裂古來彭城守未省怕惡客惡客云是誰祥符相公孫是家豪逸生有種千金一擲頗黎盆連車載酒來不飲外酒嫌其村子有千餅酒我有萬株菊任子滿頭插團七見花不見目醉中插花歸花重歷折軸問客何所須客言我愛山青山自遶郭不憂買山錢此外有黃樓下一河水美哉洋洋乎可以療饑并洗耳彭城之遊樂復樂客惡何如主

人惡

次韻王定國馬上見寄

昨夜霜風入袂衣曉來病骨更支離踈狂似我人誰顧坎軻憐君志未移但恨不携桃葉女尚能來趁菊花時南臺二謝無人繼直恐君詩勝義熙二謝

從宋武帝九日燕戲馬臺

與頓起孫勉泛舟探韻得未字

窓前堆梧桐牀下鳴絡緯佳人尺書到客子中夜喟朝來一樽酒晤語聊自慰秋蠅已無聲霜蟹初有味當爲壯士飲毗裂須磔磔勿作兒女懷坐念

嘯竄畏山城亦何有一笑瀉肝胃泛舟以娛君魚
鼈多可餽縱爲十日飲未遽主人費吾儕俱老矣
耿耿知自貴寧能傍門戶啼笑雜猩猩要將百篇
詩一吐千丈氣蕭條歲行莫迨此霜雪未明朝出
城南遺迹觀楚魏西風迫吹帽金菊亂如沸願君
勿言歸輕別吾所諱

次韻荅頓起二首

挽袖推腰踏破紳舊聞携手上天門相逢應覺聲
容似欲話先驚歲月奔新學已皆從許子諸生猶
自畏何蕃殿廬直宿真如夢猶記憂時策萬言君

及第時余爲殿後編排官見其荅策語頗直其後
與子由試舉人西京既罷同登嵩山絕頂嘗見其
唱謝詩十餘首
頓詩中及之

十二東秦比漢京去年古寺共題名去歲見之
於青州早

衰恠我遽如許苦學憐君大瘦生茆屋擬歸田二
頃金丹終掃雪千莖何人更似蘇司業和邇新詩
滿洛城



國家圖書館, NATIONAL CENTRAL LIBRARY, TAIWAN, R.O.C.

卷之六

四

東坡全集第十卷

詩七十八首

九日黃樓作

去年重陽不可說
南城夜半千漚發
水穿城下作雷鳴
泥滿城頭飛雨滑
黃花白酒無人問
日暮歸來洗鞵鞮
豈知還復有今年
把盞對花容一呷
莫嫌酒薄紅粉陋
終勝泥中事鋤鋤
黃樓新成壁未乾
青河已落霜初殺
朝來白露如細雨
南山不見千尋剎
樓前便作海茫茫
樓下空聞鶻鴉軋
薄寒中人老可畏
熱酒澆腸氣先壓
煙消日出見漁村

遠水鱗鱗山鬱鬱詩人猛士雜龍虎坐客三十餘人多知名之士楚舞吳歌亂鵝鴨一杯相屬君勿辭此境何殊泛清雪

太虛以黃樓賦見寄作詩為謝

我在黃樓上欲作黃樓詩忽得故人書中有黃樓詞黃樓高十丈下建五丈旗楚山以為城泗水以為池我詩無傑句萬景驕莫隨夫子獨何妙雨雹散雷椎雄詞雜今古中有屈宋姿南山多磬石清滑如流脂朱蠟為摹刻細妙分毫釐佳處未易識富有來者知

九日次韻王琴

我醉欲眠君罷休已教從事到青州髮霜饒我三千丈詩律輸君一百籌聞道郎君閉東閣且容老子上南樓相逢不用忙歸去明日黃花蝶也愁

送頓起

客路相逢難為樂常不足臨行挽衫袖更賞折殘菊佳人亦何念凄斷陽關曲酒闌不忍去共接一寸燭留君終無窮歸駕不免促岱宗已在眼一往繼前躅天門四十里夜看扶桑浴回頭望彭城大海浮一粟故人在其下塵上相雁跡惟有黃樓詩

千古配淇澳

頃有詩記黃樓本末

送孫勉

昔年罷東武曾過北海縣白河翻雪浪黃土如蒸
麩桑麻冠東方一熟天下賤是時累饑饉常苦盜
賊變每情追胥官野宿風裂面君為淮南秀文采
照金殿君嘗考中進士第一人胡為事奔走投筆腰羽箭
被髯將軍豪篇來督戰其兄莘老以詩寄之皆言戰事親程三郡
士王石不能術欲知君得人失者亦稱善君才無
不可要欲經百鍊吾詩堪咀嚼聊送別酒巵

李思訓畫長江絕島圖

山蒼蒼江茫茫大孤小孤江中央崖崩路絕猿鳥
去惟有喬木攬天長客舟何處來棹歌中流聲抑
揚沙平風軟望不到孤山久與船低昂我我兩煙
鬟曉鏡開新粧舟中賈客莫漫狂小孤前年嫁彭
郎

次韻荅王鞏

我有方外客顏如瓊之英十年塵土窟一寸冰雪
清竭來從我游坦率見真情顧我無足戀戀此山
水清新詩如彈丸脫手不斲停昨日放魚回衣巾
蒲浮萍今日扁舟去白酒載烏程山頭見月出江

東坡全集 卷之十
路聞鼉鳴莫作孺子歌滄浪濯吾纓吾詩自堪唱
相子棹歌聲

張安道見示近詩

人物一衰謝微言難重尋殷勤永嘉末復聞正始
音清談未足多感時意殊深少年有奇志欲和南
風琴荒林蝸蚶亂廢沼蛙烟淫遂欲掩兩耳臨文
但意瘖蕭然王郎子來自緱山陰其婿王云見浮
丘伯吹簫明月峯遺聲落淮泗蛟鼉為悲吟顧公
正士度祈招繼惜情

次韻王鞏顏復同泛舟

涉江清瘦不勝衣邊老便帶十圍蹠躑身輕山
上走謹呼船重醉中歸舞腰似雪金釵落談辯如
雲玉麈塵憶在錢塘正如此回頭四十二年非

次韻張十七九日贈子由

千戈萬槩擁笮籬九日清樽豈復持是日南都官
設使後無
事無窮何日了菊花有信不吾欺逍遙瓊館真堪
羨取次塵纓未可縻迨此暇時須痛飲他年長劍
挂君頤

次韻王鞏獨眠

居士身心如槁木旅館孤眠體生粟誰能相思琢

白上服藥千朝償一宿天寒日短銀燈續欲往從
之車脫軸何人吹斷參差竹泗水茫茫鴨頭綠

次韻王鞏留別

去國已八年故人今有誰當時交游內未數蔡克
兒豈無知我者好爵半已縻爭爲東閣吏不顧北
山移公子表獨立與世頗異馳不辭千里遠成此
一段奇蛾眉亦可憐無柰思餅師無人伴客寢惟
有支牀龜君歸與何人文字相娛嬉持此調張子
一笑當脫頤

登雲龍山

醉中走上黃茆岡蒲岡亂石如群羊岡頭醉倒石
作牀仰看白雲天茫茫歌聲落谷秋風長路人舉
首東南望拍手大笑使君狂

次韻僧潛見贈

道人胸中水鏡清萬象起滅無逃形獨依古寺種
秋菊要伴騷人餐落英人間底處有南北紛紛鴻
鴈何曾真閉門坐穴一禪榻頭上歲月空崢嶸今
年偶出爲求法欲與慧劍加礪礪雲衲新磨山水
出霜髭不翦兒童驚公侯欲識不可得故知倚市
無傾城秋風吹夢過淮水想見橘柚垂空庭故人

各在天一角相望落落如晨星彭城老守何足顧
叢林桑野相邀迎千山不憚荒店遠兩脚欲趲飛
孫輕多生綺語磨不盡尚有宛轉詩人情淡吟鶴
唳本無意不知下有行人行空堦夜雨自清絕誰
使掩抑啼孤惻我欲仙山掇瑤草傾筐坐歎何時
盈簿書鞭朴書填委煮茗燒栗宜宵征乞取摩尼
照濁水共看落月金盆傾

次韻潛師放魚

法師說法臨泗水無數天花隨塵尾勸將淨業種
西方莫待夢中呼起哀哉若魚竟坐口遠愧知
幾穆生醜况逢孟簡對盧仝不怕校人欺子產疲
民尚作魚尾赤數畧未除吾穎此法師自有衣中
珠不用辛苦沙泥底

與舒教授張山人參寥師同遊戲馬臺書西

軒壁兼簡顏長道二首

古寺長廊院院行此軒偏慰旅人情楚山西斷如
迎客泮水南來故遠城路失王鈞芳草合林亡白
鶴古泉清淡滌何以娛庠老坐聽郊原琢磬聲
竹杖芒鞋取次行下臨官道見人情天寒菽粟猶
栖畝日莫牛羊自入城沽酒獨教陶令醉題詩誰

似皎公清更尋陋巷顏夫子乞取微言繼此聲

滕縣時同年西園

人皆種榆柳坐待十畝陰我獨種松柏守此一寸
心君看閭里間盛衰日駸駸種木不種德聚散如
飛禽老時吾不識用意一何深知人得數士重義
忘千金西園手所開玆木來千岑養此霜雪根遲
彼鸞鳳吟池塘得流水龜魚自浮沉幽桂日夜長
白花亂青衿豈獨富草木子孫已成林拱把不知
數會當出千尋樊侯種梓漆壽張富華簪我作西
園詩以爲里人箴

次韻王廷老和張十七九日見寄

霜葉技空雀啣籬上樓筋力强扶持對花把酒未
甘老膏面染鬚聊自欺無事亦知君好飲多才終
恐世相縻請看平日銜杯口會有金椎爲控願

次韻參寥師寄秦太虛三絕句時秦君舉進士不得

秦郎文字固超然漢武憑虛意欲仙底事秋來不
得解定中試與問諸天
一尾追風抹萬蹄崑崙玄圃謂朝隳回看世上無
伯樂却道鹽車勝月題

東坡全集 卷之十
得喪秋毫久已冥不須聞此氣崢嶸何妨却伴參
寥子無數新詩咏唾成

與參寥師行園中得黃耳蕈

遣化何時取衆香法筵齋鉢久淒涼寒蔬病甲誰
能採落葉空畦半已荒老楮忽生黃耳菌故人兼
致白牙薑蕭然放筯東南去又入春山筍蕨鄉

百步洪二首并敘

王定國訪余於彭城一日棹小舟與顏長道携盼
英卿三子游泗水北上聖女山南下百步洪吹笛
飲酒乘月而歸余時以事不得往夜着羽衣佇立

於黃樓上相視而笑以爲李太白死世間無此樂
三百餘年矣定國旣去逾月復與參寥師放舟洪
下追懷景濂已爲陳迹喟然而歎故作二詩一以
遺參寥一以寄定國且示顏長道舒堯文邀同賦
云

長洪斗落生跳波輕舟南下如投梭水師絕叫鳧
鴈起亂石一縷爭磋磨有如兔走鷹隼落駿馬下
注千文坡斷絃離柱箭脫手飛電過隙珠翻荷四
山眩轉風掠耳但見流沫生千渦嶮中得樂雖一
快何異水伯夸秋河我生乘化日夜逝坐覺一念

逾新羅紛紛爭奪醉夢裏豈信荆棘埋銅駝覺來
俯仰失千劫回視此水殊委蛇君看岸邊蒼石上
古來箇眼如蜂窠但應此心無所住造物雖駛如
余何回船上馬各歸去多言嘵嘵師所呵

佳人未肯回秋波幼輿欲語防飛梭輕舟弄水買
一笑醉中蕩槳肩相磨不似長安閭里俠貂裘夜
走燕脂坡獨將詩句擬鮑謝涉江共秣秋江荷不
知詩中道何語但覺兩頰生微渦我時羽服黃樓
上坐見織女初斜河歸來笛聲滿山谷明月正照
金叵羅柰何捨我入塵土擾擾毛群欺卧馳不念
空齋老病叟退食誰與同委蛇時來洪上看遺迹
忍見麴齒青苔窠詩成不覺雙淚下悲吟相對惟
羊何欲遣佳人寄錦字夜寒手冷無人呵

送參寥師

上人學苦空百念已灰冷劍頭惟一吷焦穀無新
穎胡爲逐吾輩文字辛蔚炳新詩如玉雪出語便
清警退之論草書萬事未嘗屏憂愁不平氣一寓
筆所騁頗怪浮屠人視身如丘井顏然寄淡泊誰
與發豪猛細思乃不然真巧非幻影欲令詩語妙
無厭空且靜靜故了群動空故納萬境閱世走人

間觀身卧雲嶺鹹酸雜衆好中有至味永清法不
相妨此語當更請

夜過舒堯文戲作

先生堂前霜月苦弟子讀書喧兩廡推門入室書
縱橫蠟紙燈籠晃雲母先生骨清少眠卧長夜默
坐數更鼓耐寒石硯欲生水得火銅餅如過雨郎
君欲出先自替坐客斂衽誰敢侮明朝阮籍過阿
戎應作羲之羨懷祖

十月十五日觀月黃樓席上次韻

中秋天氣未應殊不用紅紗照坐隅山下白雲橫
匹素水中明月卧浮圖未成短棹還三峽已約輕
舟泛五湖爲問登臨好風景明年還憶使君無

荅王定民

開緘奕奕滿銀鈎書尾題詩語更道八法舊聞宗
長史五言今復擬蘇州筆蹤好在留臺寺旗隊遙
知到石溝欲寄鼠須并蠶紙請君章草賦黃樓

次韻王廷老退居見寄二首

浪蕪浮花不辨春歸來方識歲寒人回頭自笑風
波地閉眼聊觀夢幻身北牖已安陶令榻西風還
避庾公塵更搔短髮東南望試問今誰裹舊巾

接果移花看補籬腰鎌手斧不妨持上都新事長
先到老圃閑談未易欺釀酒閉門開社壘殺牛留
客解耕縻何時得見織織玉右手持盃左捧願

次顏長道韻送傅倅

兩見黃花掃落英南山山寺遍題名宗成不獨休
岑范魯衛終當似弟兄去歲雲濤浮汴泗與君泥
土蒲衣纓如今別酒休辭醉試聽雙洪落後聲

雲龍山觀燒得雲字

丁女真水妃寒山便火耘隕霜已殺培戶聽初
焚束縕方熠燿敲石俄氤氳落泉烽橫煙燹

塞氛窮虵上喬木潛蛟躡浮雲驚飛墮傷鴈狂走
迷癡磨谷螫起蜩鸞山妖竄夔嶺野竹爆哀聲幽
桂飄窈芬悲同秋照蠓快若夏燎蚊火牛入燕壘
燧象奔吳軍崩騰井陘口萬馬皆朱幘搖曳驪山
陰諸姨爛紅裙方隨長風卷忽值絕澗分我本山
中人習見匪獨聞偶從二三子來訪張隱君君家
亦何有物象移朝暉把酒看飛燼空庭落繽紛行
觀農事起畦壟如縵紋細雨發春穎嚴霜倒秋蕘
始知一炬力洗盡狐兔群

和田國博喜雪

疇昔月如晝曉來雲暗天王花飛半夜翠浪舞明年
蟬蠶無遺種流亡稍占田歲豐君不樂鐘磬幾
時編田有服不樂

祈雪霧猪泉出城馬上作贈舒堯文

二年走吳越踏遍千里山朝隨白雲去莫與栖鴉
還翻如得木狃飛步誰能攀一為符竹累坐老敲
榜聞此行亦何事聊散腰脚頑浩蕩城西南亂山
如玦環山下野人家桑柘雜榛菅歲晏風日暖人
牛相對閑薄雪不蓋土麥苗稀可刪願君發豪句
嘲詼破天慳

次韻舒堯文祈雪霧猪泉

長笑虵醫一寸腹銜冰吐電何時足蒼鵝無罪亦
可憐斬頸橫盤不敢哭豈知泉下有猪龍卧枕雷
車踏陰軸前年太守為旱請雨點隨人如撒菽傳
之魯得雨此太守歸國龍歸泉至今人詠淇園綠我
今又復罹此旱凜凜疲民在溝瀆却尋舊迹叩神
泉坐客仍携玉下淵欽之時客看草中和樂職頌
新聲妙語慰華顛曉來泉上東風急須上冰珠老
蛟泣怪詞欲逼龍飛起嶮韻不量吾所及行看積
雪厚埋牛誰與春工掀百蟄此時還復借君詩餘

力汰輒仍貫笠揮毫落紙勿言疲驚龍再起震失
是

石炭 并引

彭城舊無石炭元豐元年十二月始遣人訪獲於
州之西南白上鎮之北以冶鐵作兵犀利勝常云
君不見前年雨雪行人斷城中居民風裂骨濕薪
半束抱衾裯日莫敲門無處換豈料山中有遺寶
磊落如礮萬車炭流膏迸液無人知陣陣腥風自
吹散根苗一發浩無際萬人鼓舞千人看投泥濘
水愈光明燦玉流金見精悍南山栗林漸可息北

山頌鑛何勞鍛爲君鑄作百煉刀要斬長鯨爲萬
段

人日獵城南會者十人以身輕一鳥過捨急
萬人呼爲韻軾得鳥字

兒童笑使君憂愠長悄悄誰拈白接離今跨金駃
裹東風吹濕雪手冷怯清曉忽發兩鳴鶴相於飛
蠅小放弓一長嘯目送孤鴻矯吟詩忘鞭轡不語
頭自掉歸來仍脫粟鹽豉煮芹蓼何似雷將軍兩
眼霜鵲咬黑頭已爲將百戰意未了馬上倒銀餅
得鬼不暇燎少年負奇志蹭蹬百憂繞回首英雄

東坡全集 卷之十
人老死已不少青春還一夢餘年真過鳥莫上呼
應臺平生笑劉表

將官雷勝得過字代作

胡騎入雲中急烽連夜過短刀穿虜陣濺血貂裘
泥一來輦轂下愁悶惟欲卧今朝從公獵稍覺天
宇大一雙鐵絲箭未發手先唾射殺雪毛狐腰間
餘一箇

臺頭寺步月得人字

風吹河漢掃微雲步屨中庭月趁人浥浥爐香初
泛夜離離花影欲搖春遙知金闕同清景想見氈

車輾暗塵回首舊游真是夢一簪華髮岸綸巾

臺頭寺送宋希元

相從傾蓋只今年送別南臺便黯然入夜更歌金

縷曲他時莫忘角弓篇是日與宋希元同賦於寺中三年不顧東

鄰女取宋王二頃方求負郭田取李我欲歸休君未

可茂先方議斲龍泉

種松得徠字其四在懷古堂其六在石經院

春風吹榆林亂英飛作佳荒園一雨過戢戢千萬
栽青松種不生百株望一枚一枚已有餘氣壓千
畝槐野人易斗粟云自魯徂徠魯人不知貴萬竈

飛青煤束縛同一車胡爲乎來哉
泫然解其縛清泉洗浮埃
枝傷葉尚困生意未肯回
山僧老無子養護如嬰孩
坐待走龍蛇清陰滿南臺
孤根裂山石直幹排風雷
我今百日客養此千歲材
時去林不百日 茯苓無消息雙鬢日夜摧
古今一俛仰作詩寄餘哀

作詩寄王晉卿忽憶前年寒食北城之游走
筆爲此詩

北城寒食煙火微落花蝴蝶作團飛
王孫出游樂忘歸門前驄馬紫金鞵
吹笙帳底煙霏霏行人舉

頭誰敢睇扣門狂客君不麾更遣傾城出翠幃
書生老眼省見稀畫圖但覺周昉肥
別來春物已再菲西望不見紅日圍
何時東山歌采薇把殘一聽金縷衣

往在東武與人往反作繁字韻詩四首今黃魯直亦次韻見寄復和答之

符堅破荆州止獲一人半中郎老不遇但喜識元
歎我今獨何幸文字厭奇玩又得天下才相從百
憂散陰求我輩人規作林泉伴寧當待冉老倉卒
收一旦不見梁伯鸞空對孟光案才難不其然婦

女廁周亂世豈無作者於我如既盟獨喜誦君詩
咸韶音節緩夜光一已多矧獲纍纍貫相思君欲
瘦不往我真懦吾儕眷微祿寒夜抱寸炭何時定
相過徑就我乎館飄然東南去江水清且渙相與
訪名山微言師忍粲

雪齋

抗澹法言作
雪山於齋中

君不見蛾眉山西雪千里北望城都如井底春風
百日吹不消五月行人如凍蟻紛紛市人爭奪中
誰信言公似贊公人間熱惱無處洗故向西齋作
雪峰我夢扁舟適吳越長廊靜院燈如月開門不

與牛惟見空庭滿山雪

言有詩見寄云
下開看水枯中

以雙刀遺子由子由有詩次其韻

寶刀匣不見但見龍雀鏤何曾斬蛟虵亦未切琅
玕胡爲穿窬輩見之要領寒吾刀不汝問有愧在
其肝念此乃自藏包之虎皮斑湛然如古井終歲
不復潤不憂無所用憂在用者難佩之非其人匣
中自長歎我老衆所易屢遭非意于惟有王玄通
堦庭秀芳蘭知子後必大故揮刀所便屠狗非不
用一歲六七剗欲試百鍊剛要須更泥蟠作詩銘
其背以待知者看

游桓山會者十人以春水滿四澤夏雲多奇
峰爲韻得澤字

東郊欲尋春未見鶯花迹春風在流水鳧鴈先拍
拍孤帆信溶漾弄此半篙碧艤舟桓山下長咲理
輕策彈琴石室中幽響清磔磔弔彼泉下人野火
失枯腊悟此人間世何者爲真宅暮回百步洪散
坐洪上石愧我非王襄子淵肯見客臨流吹洞簫
水月照連壁謂王氏兄弟也此歡真不朽回首歲月隔想
象斜川游作詩繼彭澤

戴道士得四字代作

少小家江南寄迹方外士偶遇白雲出賣藥彭城
市雪霜侵鬢髮塵土汗冠袂賴此三尺桐中有山
水意自從夷夏亂七絛久已棄心知鹿鳴三不及
胡琴四使君獨慕古嗜好與衆異共弔桓遜官一
麗孟嘗淚歸來鎖塵匣獨對斷絃唱挂名石壁間
寂寞千歲事

次韻田國博部夫南京見寄二絕

歲月翩翩下坂輪歸來杏子已生仁深紅落盡東
風惡柳絮榆錢不當春

火冷餽稀杏粥稠青裙縞袂餉田頭大夫行役家

東坡全集 卷之十一
人怨應羨居鄉馬少游

月夜與客飲酒杏花下

杏花飛簾散餘春明月入戶尋幽人褰衣步月踏
花影炯如流水涵青蘋花間置酒清香發爭挽長
條落香雪山城薄酒不堪飲勸君且吸盃中月洞
簫聲斷月明中惟憂月落酒杯空明朝卷地春風
惡但見綠葉悽殘紅

送蜀人張師厚赴殿試二首

忘歸不覺髮毛斑好事鄉人尚往還斷嶺不遮西
望眼送君直過楚江山

雲龍山下試春衣放鶴亭前送落暉一色杏花紅
十里新郎君去馬如飛

再次韻答田國博部夫還二首

西郊黃土沒車輪滿面風埃笑路人已放後夫三
萬指從教積雨洗殘春
枝上稀疎地上稠忍看紅糝落墻頭風流別乘多
才思歸趁西園秉燭游

田國博見示石炭詩有鑄劍斬佞臣之句次
韻答之

楚山鐵炭皆奇物知君欲听姦邪窟屬鏤無眼不

識人楚國何曾斬無極王川狂直古遺民救月裁
詩語取真千里妖墓一寸鐵地上空愁蟻蝨臣

荅郡中同僚賀雨

水旱行十年饑疫遍九土奇窮所向惡歲歲祈晴
雨雖非爲已求重請終愧古鬼神亦知我老病入
腰管何曾拜向人此意難不許重雲淒已合微潤
先流礎蕭蕭止還作坐聽及三鼓天明將吏集泥
土滿靴履登城望薺麥綠浪風掀舞愧我賢友生
雄篇闢新語君看大熟歲風雨占十五天地本無
功祈禳何足數渡河不入境豈若無蝗虎而况刑

百鴛下策君勿取

罷徐州往南上走筆寄子山五首

貞民莫拔援歌管莫悽咽吾生如寄耳寧獨爲此
別別離隨處有悲惱緣愛結而我本無思此涕誰
爲設紛紛等見戲鞭韉遭割截道邊雙石人幾見
太守發有知當解笑撫掌冠纓絕

父老何自來花枝裊長紅洗錢拜馬前請壽使君
公前年無使君魚鼈化兒童舉鞭謝父老正坐使
君窮窮人命分惡所向招災凶水來非吾過去亦
非吾功

古汴從西來迎我向南京東流入淮泗送我東南
行甃別還復見依然有餘情春雨漲微波一夜到
彭城過我黃樓下朱欄照飛甍可憐洪上石誰聽
月中聲

前年過南京麥老櫻桃熟今來舊游處櫻麥半黃
綠歲月如宿昔人事幾反覆青衫老從事坐穩生
髀肉騾翩閱三守迎送如轉轂歸耕何時決田舍
我已卜

卜田向何許石佛山南路下有爾家川千畦種秔
稌山泉宅龍蜃平地走膏乳異時竝一金近欲爲
逃戶近荆解簪紱賣劍買牛具故山豈不懷廢宅
生蒿櫓便恐桐鄉人長祠仲卿墓

次韻曹九章見贈

遽愛知非我所師流年已似手中著正平獨肯從
文舉中散何曾靳老尼賣劍買牛真欲老得錢沽
酒更無疑雞豚異日爲同社應有千篇唱和詩

書泗州孫景山西軒

落日明孤塔青山繞病身知君向西望不愧塔中
人

過淮三首贈景山兼寄子由

好在長淮水十年三往來功名真已矣歸計亦悠哉今日風憐客平時浪作堆晚來洪澤口捍索響如雷

過淮山漸好松檜亦蒼然藹藹藏孤寺泠泠出細泉故人真吏隱小檻帶巖偏却望臨淮市東風語笑傳

回首淮陽幕簿書高沒人何時桐栢水一洗庾公塵此去漸佳境獨游長慘神待君詩百首來寫浙西春

舟中夜起

微風蕭蕭吹菰蒲開門看雨月滿湖舟人水鳥兩同夢大魚驚竄如奔狐夜深人物不相管我獨形影相嬉娛暗潮生渚弔寒蛸落月挂柳看慈蛛此生忽忽憂患裏清境過眼能須臾雞鳴鐘動百鳥散舟人擊鼓還相呼

余去金山五年而復至次舊詩韻贈寶覺長老

誰能斗酒博西涼但愛齋厨法鼓香舊事真成一夢過高談爲洗五年忙清風偶與山阿曲明月聊隨屋角方稽首願師憐久客直將歸路指茫茫

遊惠山并敘

余昔爲錢塘倅往來無錫未嘗不至惠山旣去五
年復爲湖州與高郵秦太虛杭僧參寥同至覽唐
處士王武陵竇群朱宿所賦詩愛其語清簡蕭然
有出塵之姿追用其韻各賦三首

夢裏五年過覺來雙鬢蒼還將塵土足一步漪瀾
堂俯窺松桂影仰見鴻鶴翔炯然肝腑間已作水
王光虛明中有色清淨自生香還從世俗去未與
世俗忘

薄雲不遮山疎雨不濕人蕭蕭松徑滑榮榮山桂

新嘉我二三子皎然無滯磷勝游豈殊昔清句仍
絕塵弔古泣舊史疾譏歌小曼哀哉扶風子難與
巢許隣謝實亭

敲火發山泉烹茶避林樾明牕傾紫琰色味兩可
絕吾生眠食耳一飽萬想滅頗笑王川子饑弄三
百月豈如山中人睡起山花發一甌誰與共門外
無來轍

贈惠山僧惠表

行遍天涯意未闌將心到處遣人安山中老宿依
然在案上楞嚴已不看欹枕落花餘幾片閉門新

竹自千竿客來茶罷空無有盧橘楊梅向帶酸

贈錢道人

書生苦信書世事仍臆度不量力所負輕出千鈞
諾當時一快意事過有餘竹不知幾州鐵鑄此一
大錯我生涉憂患常恐長罪惡靜觀殊可喜脚淺
猶容却而况錢夫之萬事初不作相逢更何言無
病亦無藥

與秦太虛參寥會于松江而關彥長徐安中
適至分韻得風字二首

吳越溪山興未窮又扶衰病過垂虹浮天自古東

南水送客今朝西北風絕境自忘千里遠勝游難
復五人司舟師不會留連意擬看斜陽萬頃紅
二子綠詩老更窮人間無處吐長虹平生晤足連
江雨盡日舟橫擘岸風人笑年來三黜慣天教我
輩一樽同知君欲寫長相憶更送銀盤尾鬣紅
次韻關令送魚

舉網驚呼得巨魚饒涎不易忍流酥更煩赤脚長
須老來趁西風十幅蒲



國家圖書館, NATIONAL CENTRAL LIBRARY, TAIWAN, R.O.C.

東坡全集第十一卷

詩七十二首

次韻秦大虛見戲耳銘

君不見詩人借車無可載留得一錢何足賴晚年
更似杜陵翁右臂雖存耳先聵人將蟻動作牛鬪
我覺風雷真一噫聞塵掃盡根性空不須更枕清
流派大朴初散失混沌六鑿相攘更勝敗眼花亂
墜酒生風口業不停詩有債君知五蘊皆是賊人
生一病今生差但恐此心終未了不見不聞還是
礙今君疑我特佯聾故作嘲詩窮嶮怪須防額癢

出三耳莫放筆端風雨快

端午遍遊諸寺得禪字

肩輿任所適過勝輒留連焚香引幽步酌茗開淨
筵微雨止還作小窓幽更妍盆山不見日草木自
蒼然忽登最高塔眼界窮大千卞峰照城郭震澤
浮雲天深沉既可喜曠蕩亦所便幽尋未云畢墟
落生晚煙歸來記所歷耿耿清不眠道人亦未寢
孤燈同夜禪

送劉寺丞赴餘姚

中和堂後石楠樹與君對牀聽夜雨玉笙哀怨不

逢人但見香煙橫碧紗
謳吟思歸出無計坐想蟋
蟀空房語明朝開鑠放觀潮豪氣正與潮爭怒銀
山動地君不看獨愛清香生雪霧別來聚散如宿
昔城郭空存鶴飛去我老人間萬事休君亦洗心
從佛祖手香新寫法界觀眼淨不覩登伽女餘姚
古縣亦何有龍井白泉甘勝乳千金買斷顧渚春
似與越人降日注

李公擇過高郵見施大夫與孫莘老賞公詩

憶與僕去歲會于彭門折花餽筭故事作詩
二十四韻見戲依韻奉荅亦以一戲公擇云

爾

汝陽真天人，絹帽著紅槿。纏頭三伯萬，不買一微
哂。共誇青山峯，曲盡花不隕。嘗時謫仙人，逸韻謝
封畛。詩成天一笑，萬象解寒窘。鶯開小桃杏，不待
雷發軫。餘波尚涓滴，乞與居易稔。爾來誰復見，前
輩風流盡。寂寞兩詩人，殘紅對櫻筍。餞腸得一醉，
妙語傳不泯。君來恨不與，更復相牽引。我老心已
灰，空煩扇餘燼。天邊照六鑿，虛空掃玄刃。懸知色
竟空，那復嗜鳥吻。蕭然一方丈，居士老。雁蘊散花
從滿，穢不答天女問。故人猶故日，怨句寫餘恨。疑

我此心在遮，防費欄楯。應虞已斃她，折尾時一蠢。
仄聞孟光賢，未學處仲忍。時聞處仲事見本傳寄招應已足，
左右侍雲鬢。何時花月夜，羊酒謝不敏。此生如幻
耳，戲語君勿愠。應同亡是公，一對子虛聽。

王鞏清虛堂

清虛堂裏王居士，閉眼觀身如止水。水中照見萬
象空，敢問堂中誰隱几。吳興太守老且癯，堆案滿
前長渴睡。願君勿咲反自觀，夢幻去來殊未已。長
疑安石恐不免，未信犀首終無事。勿將一念住清
虛，居士與我蓋同耳。

和孫同年卞山龍洞禱晴

吳興連月雨釜甑生魚蛙往問卞山龍曷不安厥
家梯空上巉絕俯視驚給訝神井湧雲蓋陰崖垂
薜花交流百道泉赴谷走群蛇不知落何處隱隱
如縑車我來叩石戶飛鼠翻白鴉寄語洞中龍睡
味豈不嘉雨師少弭節雷師亦停槓積水得反壑
稻苗出泥沙農夫免菜色龍亦飽豚豕看君擁黃
紬高卧放晚衙

乘舟過賈收水閣收不在見其子三首

愛酒陶元亮能詩張志和青山來水檻白雨滿漁

蓑淚垢添下面貧低舉案蛾不知何所樂竟夕獨

酣歌

嫋嫋風蒲亂倚倚水荇長小舟浮鴨綠大杓瀉鵝
黃得意詩酒社終身魚稻鄉樂哉無一事何處不
清涼

曳杖青苔岸繫船枯柳根德公方上冢季路獨留
言已占蒲魚港更開松菊園從茲來往數兒女自
磨門

次韻孫秘丞見贈

感槩清哀似變風老於詩句耳偏聰迂疎自笑成

東坡全集 卷之十一
何事冷淡誰能用許功不怕飛蚊如立豹肯隨白
鳥過垂虹吟哦相對忘三伏擬泛冰溪入雪宮

多蚊豹脚尤毒
垂虹吳江亭名

與客遊道場何山得鳥字

清溪到山盡飛路盤空小紅亭與白塔隱見喬木
杪中休得小庵孤絕寄雲表洞庭在北戶雲水天
渺渺庵僧俗緣盡淨業洗未了十年畫鶴竹益以
詩自繞高堂儼像設禪室各深窈奔泉何處來華
屋過溪沼何山隔幽谷去路清且悄長松度翠蔓
絕壁掛啼鳥我友自杭來尚歎所歷少歸塗風雨

作一洗紅日燎俄驚萬竅號黑霧卷蓬萊舟人紛
變色坐羨輕鷗矯我獨換酒杯醉死勝流殍書生
例強狠造物空煩擾更將掀舞勢把燭畫風篠美
人為破顏正似腰支妨明朝更陳迹清景墮空香
作詩記餘歡萬古一昏曉

僕去杭五年吳中仍歲大饑疫故人往往逝
去聞湖上僧舍不復往日繁麗獨淨慈本長
老學者益盛作此詩寄之

來往三吳一夢間故人半作家壘然獨依舊社傳
真法要與遺民度厄年趙叟近聞還印綬竺翁先

東坡全集 卷之十一 五
已返林泉何時杖策相隨去任性逍遙不學禪

船趨風 并引

吳中梅雨既過颯然清風彌旬歲歲如此湖人謂之船趨風是時海舶初回云此風自海上與船俱至云爾

三旬已過梅黃雨萬里初來船趨風幾處縈回度山曲一時清駛滿江東驚飄簌簌先秋葉喚醒昏昏嗜睡翁欲作蘭亭快哉賦却嫌分別問雌雄

丁公默送螭舫

溪邊石蟹小如錢喜見輪囷赤玉盤半殼含黃宜

點酒兩螯斫雪勸加餐蠻珍海錯聞名久怪雨腥風入座寒堪笑吳興饒太守一詩換得兩尖團

送孫著作赴考城兼寄錢醇老李邦直二君於孫處有書見及

使君閑如雲欲出誰肯伴清風獨無事一嘯亦可噴來從白蘋洲吹我明月觀門前遠行客青衫流自汗問子何忽忽王事不可緩故人錢與李清廟兩圭瓚蔚為萬乘器尚記溝中斷子亦東南瓊價重不可筭別情何以慰酒盡對空案惜持一榻涼勸子巾少岸此風那復有塵土飛灰炭欲寄一大

夫發發不可絆

泛舟城南會者五人分韻賦詩得人皆苦炎
字四首

城中樓閣似魚鱗不見清風起白蘋試選茗溪寂
深處仍呼我輩不羈人窺船野鶴何曾下見燭飛
蠅空自馴遶郭荷花一千頃誰知六月下塘春
苦熱誠知處處皆何當危坐學心齋海螯要共詩
人把溪月行遭霧雨霾鄉國飄零斷書信弟兄流
落隔江淮便應築室茗溪上荷葉遮門水浸堦
紫蟹鱸魚賤如土得錢相付何曾數碧甯時作象

鼻彎白酒微帶荷心苦運肘風生看斫膾隨刀雪
落驚飛縷不將醉語作新詩飽食應慙腹如鼓
齋上游人夜未厭共依水檻立風簷樓中煮酒初
嘗炙月下新粧半出簾南郭清游繼顏謝北窓歸
卧等羲炎人間實無窮事自笑疎頑不受疢

次韻李公擇梅花

詩人固長貧日午饑未動偶然得一飽萬象困嘲
弄尋花不論命愛雪長忍凍天公非不憐聽飽卽
喧閔君爲三郡守所至滿賓從江湖常在眼詩酒
事豪縱奉使今折磨清比於陵仲永懷茶山下携

東坡全集 卷之十一 七
妓脩春貢更憶檻泉亭插花雲髻重蕭然卧鶯麓
愁聽春禽哢忽見早梅花不飲但孤諷詩成獨寄
我字字愈頭痛嗟君本侍臣筆橐從上雍脫鞞吟
芍藥給札賦雲夢何人慰流落嘉蔭天為種杯傾
笛中吟帽拂果下鞵感時念羈旅此意吾儕共故
山亦何有桐花集么鳳君亦憶匡廬歸掃藏書洞
何當種此花各抱漢陰壘

送淵師歸徑山

我昔常為徑山客至今詩筆餘山色師住此山三
十年妙語應須得山骨溪城六月水雲丞飛蚊猛

捷如花鷹美師方丈冰雪冷蘭膏不動長明燈山
中故人知我至爭來問訊今何似為言百事不如
人兩眼猶能書細字徑山夏無蚊亦舊詩云問龍
乞水歸洗眼餘看細字銷殘

送表忠觀錢道士歸杭

先生舊德在民心著令稱忠上意深墮淚行看會
初下挂名爭欲刻碑陰淒涼破屋塵凝座憔悴雲
孫雪滿簪未信許家容郭解却從他縣施千金

次韻周開祖長官見寄

俯仰東西閱數州老於歧路豈伶優初聞父老推

謝令旋見兒童迎細侯政拙年年祈水旱民勞處
處避嘲謳河吞巨野那容寒盜入蒙山不易搜仕
道固應慙孔孟扶顛未可責求由漸謀田舍猶悞
祿未脫風濤且傍洲罔罔可憐真喪狗時時相觸
是虛舟劫來震澤都如夢只有苕溪可倚樓齋釀
酸甜如蜜水樂工零落似風旣遠思顏柳并諸謝
近憶張子陳吟與老劉詩風定軒窓飛豹脚雨餘
欄檻上蝸牛舊遊到處皆蒼蘚同甲恠君尚黑頭
憶昔湖山共尋勝相逢杯酒兩忘憂醉看梅雪清
香過夜棹風船駭汗流百首共成山上集三人俱

作月中遊海南未起垂天翼澗底仍依徑寸寐已
許秋風歸過我預憂詩筆老難隄此生歲月行飄
忽晚節功名亦繆悠犀首正綠無事飲馮驩應爲
有魚留從今便踏青州麴薄酒知君笑督郵

林子中以詩寄文與可及余與可旣沒追和
其韻

斯人所甚厭投畀每不受欲其少須臾奪去惟恐
後云誰尸此職無乃亦假守賦才有巨細無異斛
與斗胡不安其分但聽物所誘時來各飛動意令
無妍醜坐令雞栖車長載朱伯厚平生無一旅旣

死咤萬口自聞與可下胸臆生堆阜懸知臨絕意
要我一執手相望五百里安得自其牖遺文付來
哲後事待諸友伶俜嵇紹孤老病孟光偶世人賤
自見爭笑千金帚君詩與楚詞識者當有取但知
愛墨竹此歎吾已久故人多厚祿能復哀君否不
見林與蘇饑寒自奔走

與王郎昆仲及兒子邁遶城觀荷花登峴山

亭晚入飛英寺分韻得月明星稀四首

昨夜雨鳴渠曉來風襲月蕭然欲秋意溪水清可
環城三十里處處皆佳絕蒲蓮浩如海時見舟

一葉此間真避世青鬢低白髮相逢欲相問已逐
驚鷗沒

清風定何物可愛不可名所至如君子草木有嘉
聲我行本無事孤舟任斜橫中流自偃仰適與風
相迎舉杯屬浩渺樂此兩無情歸來兩溪間雲水
夜自明

茗水如漢水鱗鱗鴨頭青吳興勝襄陽萬瓦浮青
真我非羊叔子愧此峴山亭悲傷意則同歲月如
流星從我兩王子高鴻插脩翎湛輩何足道當以
德自銘

吏民憐我懶，鬪訟日已稀。能爲無事飲，可作不夜歸。復尋飛英游，盡此一寸暉。撞鐘履聲集，顛倒雲山衣。我來無時節，杖屨自推扉。莫作使君看，外似中已非。

城南縣尉水亭得長字

兩尉鬱相望，東南百步場。揮旗蒲柳市，伐鼓水雲鄉。已作觀魚檻，仍開射鴨堂。全家依畫舫，極目亂紅粧。湫湫波頭細，疎疎雨脚長。我來閑濯足，溪漲欲浮牀。澤國山圍裏，孤城水影傍。欲知歸路處，葦外記風檣。

與胡祠部遊法華山

陂湖欲盡山爲界，始見寒泉落高派。道人未放泉出山，曲折虛堂瀉清快。使君年老尚兒戲，綠棹紅舫舞澎湃。一笑翻杯水濺裙，餘懽濯足波生隘。長松攬天龍，起立蒼藤倒谷雪。崩壑仰穿蒙密得清曠，一覽震澤吁可怪。誰云四萬八千頃，渺渺東盡日所曬。歸塗十里盡風荷，清唱一聲聞露薤。是日有作此嗟余少小慕真隱，白髮青衫天所械。忽逢佳士與名山，何異枯楊便馬疥。君猶鸞鶴偶飄墮，六翮如雲豈長鍛。不將新句紀茲遊，恐負山中清。

淨債

又次前韻贈賈耘老

具區吞滅三州界浩浩湯湯納千派從來不著萬
斛船一葦漁舟恣奔快仙壇古洞不可到空聽餘
淵鳴泮泮今朝偶上法華嶺縱觀始覺人寰隘山
頭卧碣弔孤冢下有至人僵不壞空餘白棘網

蟲無復青蓮出幽怪市見木
院碑我來徙倚長松下欲

搗茯苓親洗晒聞道山中富竒藥往往靈芝雜葵

薤詩人空腹待黃精三事只看長柄械杜子美詩
云長鏡短

鏡白木柄我生
託子以爲命今年大熟期一飽食葉微蟲真癡

疥今歲有小蟲
葉不甚爲害白花半落紫穉香攘臂欲助磨石鎌

鍛安得山泉變春酒與子一洗尋常債

趙閱道高齋

見公奔走謂公勞聞公隱退云公高公心底處有
高下夢幻去來隨所遭不知高齋竟何義此名之
設緣吾曹公年四十已得道俗緣未盡餘伊臯功
名富貴俱逆旅黃金知繫何人袍超然已了一大
事挂冠而去真秋毫坐看猿猱落且罔兩手未肯
置所操乃知賢達與愚陋豈直相去九牛毛長松
百尺不自覺企而羨者蓬與蒿我欲贏糧往問道

未應舉臂辭盧敖

送俞節推

尚之子尚
字退翁

吳興有君子淡如朱絲琴一唱三太息至今有遺
音嗟余與夫子相避如辰參退翁官于蜀余在京
師余歸而退翁去及
余官于吳興
則退翁亡矣猶喜見諸郎窈然清且深異時多良
士末路喪初心我生不有命其肯枉尺尋

次韻荅孫侔

十年身不到朝廷欲伴騷人賦落英但得低頭拜
東野不辭中路伺淵明艤舟茗雪人安在上築江
淮計已成千里論交一言足與君蓋亦不須傾

重寄一首

凜然高節照時人不信微官解浼君蔣濟謂能來
阮藉薛宣真欲吏朱雲好詩衝口誰能擇俗子疑
人未遑聞乞取千篇看佞逸不將輕比鮑參軍

次韻和劉貢甫登黃樓見寄并寄子由二首

青派連淮上黃樓冠海隅此詩尤偉麗夫子計魁

梧劉禹人世俗輕瑚璉巾箱襲武夫坐今乘傳遽

奔走為儲須邂逅我已失登臨誰與俱貧貧倉氏

粟身聽治家樵會合難前定歸休試後圖腴田未

可買窮鬼却須呼本欲買田於泗
上近已不遂矣二水何年到雙

洪不受疆至今清夜夢飛轡策天吳

此詩寄劉

與子皆去國千年天一禹數竒逢惡歲計拙集枯
梧好士餘劉表窮交憶灌夫不矜持漢節猶許攬
桓須清句金絲合高樓雪月俱吟哦出新意指畫
想前樵子由初赴南京送之出東門登城上覽山
川之勝云此地可作樓觀於是始有政築
之自寫千言賦新裁六幅圖近以絹自寫子由黃
樓賦爲六幅圖甚妙
傳看一坐聳勸著尺書呼莫使騷人怨東游不到

吳

此詩寄子由

陳州與文郎逸民飲別携手河堤上作此詩

曰酒無聲滑瀉油醉行堤上散吾愁春風料峭年

角轉河水渺綿瓜蔓流君已思歸夢巴峽我能未
到說黃州此生聚散何窮已未忍悲歌學楚囚

子由自南都來陳三日而別

夫子自逐客尚能哀楚囚奔馳二百里徑來寬我
憂相逢知有得道眼清不流別來未一年落盡驕
氣浮嗟我晚聞道款啟如孫休至言雖久服放心
不自收悟彼善知識妙藥應所投納之憂患場磨
以百日愁冥頑雖難化鐫發亦已周平時種種心
次第去莫留但餘無所還未與夫子遊此別何足
道大江東西州畏虺不下榻睡足吾無求便爲齊

安民何必歸故丘

正月十八日蔡州道上遇雪次子由韻二首

蘭菊有生意微陽回寸根方憂集莫雪復喜迎朝
曦憶我故居室浮光動南軒松竹半傾瀉未數蔡
與萱三徑瑤草合一餅井花温至今行吟處向餘
履鳥痕一朝出從仕未愧李仲元晚歲益可羞犯
雪方南奔山城買廢圃槁葉手自撤長使齊安人
指說故侯園

鉛膏染髭鬚旋露霜雪根不如閉目坐丹府夜自
嗽誰知憂患中方十寓羲軒大雪從壓屋我非兒

女當平生學趾在心坐覺兩輜温下馬作雪詩滿地
鞭箠痕佇立望原野悲歌為黎元道逢射獵子遙
指狐兔奔蹤跡尚可尋窟穴何足撤寄謝李丞相
吾將反丘園

過新息留示鄉人任師中

任時知盧州亦坐青堂

昔年嘗美任夫子卜居新息臨淮水怪君便爾忘
故鄉稻熟魚肥信清美竹陂鴈起天為黑小竹陂在縣北
桐栢煙橫山半紫桐栢南在縣南知君坐受兒女困悔不
先歸弄清泚塵埃我亦失收身此行蹭蹬尤可鄙
寄食方將依白足附書未免煩黃耳往雖不及來

有年詔恩倘許歸田里却下關山入蔡州爲買鳥
糲三百尾

黃州出
水牛

過淮

朝離新息縣初亂一水碧莫宿淮南村已渡千山
赤磨颺號古戍霧雨暗破驛回頭梁楚郊未與中
原隔黃州在何許想像雲夢澤吾生如寄耳初不
擇所適但有魚與稻生理已自畢獨喜小兒子少
小爭安佚相從艱難中肝肺如鐵石便應與晤語
同止寄衰疾

時家在子由處獨
與兒子邁南來

書磨公詩後

并序

過加祿鎮南二十五里大許店休焉于逆旅祁宗
祥家見壁上有幅紙題詩云滿院秋光濃欲滴老
僧倚杖青松側只怪高聲問不磨瞋余踏破蒼苔
色其後題云滏水僧寶磨宗祥謂余此光黃間狂
僧也年百三十死於熙寧十年旣死人有見之者
宗祥言其異事甚多作是詩以識之磨公本名清
戒俗謂之戒和尚云

磨公昔未化來往淮山曲壽逾兩甲子氣壓諸尊
宿但嗟濁惡世不受龍象躡我來不及見悵望空
遺躅霜顱隱白毫鎖骨埋青王皆云似達磨隻履

還天竺壁間餘清詩字勢頗拔俗爲吟五字偈一
洗凡眼肉

游淨居寺并敘

寺在光山縣南四十里大蘇山之南小蘇山之北
寺僧居仁爲余言齊天保中僧思惠過此見父老
問其姓曰蘇氏又得二山名乃歎曰吾師告我過
二蘇則住遂留結庵而父老竟無有蓋山神也其
後僧智顛見思於此山而得法焉則世所謂思大
和尚智者大師是也唐神龍中道岸禪師始建寺
於其地廣明庾子之亂寺廢於兵火至乾興中乃

後而賜名曰梵天云

十載游名山自製山中衣願言畢婚嫁携手老翠
微不悟俗緣在失身蹈危機刑名非夙學陷穽損
積威遂恐死生隔未與雲山違今日復何日芒鞋
自輕飛稽首兩足尊舉頭雙涕揮靈山會未散八
部猶光輝願從二聖往一洗千劫非裴回竹溪月
空翠搖煙霏鐘聲自送客出谷猶依依回首吾家
山歲晚將焉歸

梅花二首

春來幽谷水潺潺的礫梅花草棘間一夜東風吹

石裂半隨飛雪渡關山

何人把酒慰深幽開自無聊落更愁幸有清溪三百曲不辭相送到黃州

戲作種松

我昔少年日種松滿東岡初移一寸根瑣細如插秧二年黃茅下一一攢麥芒三年出蓬艾滿山散牛羊不見十餘年想作龍蛇長夜風波浪碎朝露珠璣香我欲食其膏已伐百本桑黃松脂法用人桑柴灰水事多乖迤神藥竟渺茫竭來齊安野夾路須髯蒼曾聞龜蛇窟不惜斤斧創縱未得伏苓且當拾流

昉釜盜百出入皎然散飛霜槁死三彭仇澡換五谷腸青骨凝綠髓丹田發幽光白髮何足道要使雙瞳方却後五百年騎鶴還故鄉

萬松亭并敘

麻城縣令張毅植萬松於道周以芘行者且以名其亭去未十年而松之存者十不及三四傷來者之不嗣其意也故作是詩

十年栽種百年規好德無人助我儀古語云一年穀十年之計樹之以木百年之計來之以德縣令若同倉庾氏亭松應長子孫枝天公不救斧斤厄野火解憐冰雪姿爲

問幾株能合抱慙懃記取角弓詩

張先生 并敘

先生不知其名黃州故縣人本姓盧爲張氏所養陽狂垢汗寒暑不能侵常獨行市中夜或不知其所止往來者欲見之多不能致余試使人召之欣然而來旣至立而不言與之言不應使之坐不可但俯仰熟視傳舍堂中久之而去夫孰非傳舍者是中竟何有乎然余以有思惟心追躡其意蓋未得也

熟視空堂竟不言故應知我未天全肯來傳舍人
昔說敢致先生予亦賢脫屣不妨眠糞屋流澌爭
看浴冰川士廉豈識桃堆妙妄意稱量未必然

陳季常所畜朱陳村嫁娶圖

何年顧陸丹青手畫作朱陳嫁娶圖聞道一村惟
雨姓不將門戶買崔盧

我是朱陳舊使君勤耕曾入杏花村而今風物那

堪畫縣吏催錢夜打門

朱陳村在徐州蕭縣

少年時嘗過一村院見壁上有詩云夜涼疑
有雨院靜似無僧不知何人詩也宿黃州禪
智寺寺僧皆不在夜半雨作偶記此詩故作

一絕

佛燈漸暗饑鼠出山雨忽來脩竹鳴知是何人舊
詩句已應知我此時情

初到黃州

自笑平生爲口忙老來事業轉荒唐長江遶郭知
魚美好竹連山覺筍香逐客不妨貧外置詩人例
作水曹郎只慙無補絲毫事尚費官家壓酒囊
檢校
官例折支多得退酒袋

定惠院寓居月夜偶出

無人無事不出門偶逐東風轉良夜參差玉宇飛

才未繚繞香煙來月下江雲有態清白娼竹露無
聲浩如瀉已驚弱柳萬絲垂尚有殘梅一枝亞清
詩獨吟還自和白酒已盡誰能借不詞青春忽忽
過但恐懽意年年謝自知醉耳愛松風會揀霜林
結茅舍浮浮大甌長炊玉溜溜小槽如壓蔗飲中
真味老更濃醉裏狂言醒可怕但當謝客對妻子
倒冠落佩從嘲罵

次韻前篇

去年花落在徐州對月酣歌美清夜
去年徐州花下對月與張
君厚王子忠兄弟
飲酒作頌字韻詩今年黃州見花發卜院閉門風

東坡全集 卷之三
露下萬事如花不可期餘年似酒那禁瀉憶昔還
鄉沂巴峽落帆樊口在黃州南岸高桅亞長江袞袞空
自流白髮紛紛寧少借竟無五畝繼沮溺空有千
篇陵鮑謝至今歸計負雲山未免孤衾眠客舍少
年辛苦真食蓼老景清閑如啖蔗饑寒未至且安
居憂患已空猶夢怕穿花踏月飲村酒免使醉歸
官長罵

安國寺浴

老來百事懶身垢猶念浴衰髮不到耳尚煩月
沐山城足薪炭煙霧濛湯谷塵垢能幾何儵然脫
羈縻披衣坐小閣散髮臨脩竹心困萬緣空身安
一牀足豈惟忘淨穢無以洗榮辱默歸無多談此
理觀要熟

安國寺尋春

計聞百舌呼春風起尋花柳村村同城南古寺脩
竹合小房曲檻欹深紅看花歎老憶年少對酒思
家愁老翁病眼不羞雲母亂鬢絲強理茶煙中遙
知二月王城外玉仙洪福花如海薄羅勻霧蓋新
粧快馬爭風鳴雜珮王川先生真可憐一生耽酒
終無錢病過春風九十日獨抱添丁看花發

寓居定惠院之東雜花滿山有海棠一株土
人不知貴也

江城地瘴蕃草木只有名花苦幽獨嫣然一笑竹
籬間桃李漫山總麤俗也知造物有深意故遣佳
人在空谷自然富貴出天姿不待金盤薦華屋朱
唇得酒暈生臉翠袖卷紗紅映肉林深霧暗曉光
遲日暖風輕春睡足雨中有淚亦悽愴月下無人
更清淑先生食飽無一事散步逍遙自捫腹不問
人家與僧舍拄杖敲門看修竹忽逢絕艷照衰朽
歎息無言措病日陋那何處得此花無乃好事移

西蜀寸根千里不易到銜子飛來定鴻鶴天涯流
落俱可念爲飲一樽歌此曲明朝酒醒還獨來雪
落紛紛那忍觸

次韻樂著作野步

老來幾不辨西東秋後霜林且強紅眼暈見花真
是病耳虛聞蟻足非聽酒醒不覺春強半睡起常
驚日過中植杖偶逢爲黍客披衣閑詠舞雩風仰
看落蕊收松粉俯見新芽摘杞叢楚雨還昏雲夢
澤吳潮不到武昌宮黃州對岸武昌縣有孫權故宮廢興古郡詩
無數寂寞閑窓易粗通解組歸來成二老風流他

日與君同

二月二十六日雨中熟睡至晚強起出門還作此詩意思殊昏昏也

卯酒困三盃午餐便一肉雨聲來不斷睡味清且熟昏昏覺還臥展轉無由足強起出門行孤夢猶可續泥深竹雞語村暗鳩婦哭明朝看此詩睡語應難讀

雨晴後步至四望亭下魚池上遂自乾明寺前東岡上歸二首

前過浮萍合蛙聲滿四鄰海棠真一夢梅子欲嘗

新拄杖閑挑菜鞦韆不見人慙慙木芍藥獨自殿餘春

高亭廢已久下有種魚塘暮色千山入春風百草香市橋人寂寂古寺竹蒼蒼鸛鶴來何處號鳴滿夕陽

雨中看牡丹三首

霧雨不成點映空疑有無時於花上見的驟走明珠秀色洗紅粉暗香生雪膚黃昏更蕭瑟頭重欲相扶

明日雨當止晨光在松枝清寒入花骨肅肅初自

東坡全集 卷之十一
持午景發穠麗一笑當及時依然暮還斂亦自惜

幽姿

幽姿不可惜後日東風起酒醒何所見金粉抱青
子千花與百草共盡無妍鄙未忍汗泥沙牛酥煎
落葉

次韻樂著作送酒

少年多病怯盃觴老去方知此味長萬斛驚愁都
似雪一壺春酒若爲湯

次韻樂著作天慶觀醮

世紛紛肯下臨夢尋飛步五雲深無因上到邊

明殿只許微聞玉佩聲

王齊萬秀才寓居武昌縣劉郎洑正與伍洲
相對伍子胥奔吳所從渡江也

君家稻田冠西蜀擣玉揚珠三萬斛塞江流梯起
書樓碧瓦珠欄照山谷傾家取樂不論命散盡黃
金如轉燭惟餘舊書一百車方舟載入荆江曲江
上青山亦何有伍洲遙望劉郎藪明朝寒食當過
君請殺耕牛壓私酒與君飲酒細論文酒酣訪古
江之濱仲謀公瑾不須弔一酹波神英烈君

杭州伍子

吳烈王

杜沂遊武昌以酴醾花菩薩泉見餉二首

酴醾不爭春寂寞開寂晚青蛟走玉骨羽蓋蒙珠
憶不粧艷已絕無風香自遠淒涼吳宮闕紅粉埋
故死至今微月夜笙簫來絕巘餘妍入此花千載
虛噴說怪君呼不歸定爲花所挽昨宵雷雨惡花
盡君應遂任隨風
君言西山頂自古流白泉上爲千牛乳下有萬石
鈇不愧惠山味但無陸子賢願君揚其名庶託文
字傳寒泉比吉士清濁在其源不食我心惻於泉
非所患嗟我本何有虛名空自纏不見子柳子餘

愚汗溪山

陳季常自岐亭見訪郡中及舊州諸豪爭欲
邀致之戲作陳孟公詩一首

孟公好飲寧論斗醉後關門防客走不妨閑過左
阿君百諷終爲賢太守老居閭里自浮湛笑問栢
松何苦心忽然載酒從陋巷爲愛楊雄作酒箴長
安富兒求一過千金壽君君笑唾汝家安得客孟
公從來只識陳驚座



國家圖書館, NATIONAL CENTRAL LIBRARY, TAIWAN, R.O.C.

國立中央圖書館



東坡全集第十二卷

詩八十九首

游武昌寒溪西山寺

連山蟠武昌翠木蔚樊口我來已百日欲濟空搔
首坐看鷗鳥沒夢逐麝麝走今朝橫江來一葦奇
衰朽高談破巨浪飛屨輕重阜去人曾幾何絕壁
寒溪吼風泉兩部樂松竹三益友徐行欣有得芝
朮在蓬萊西上九曲亦衆山皆培塿却看江北路
雲水渺何有離離見吳宮莽莽見楚藪空傳孫郎
石無復陶公柳爾來風流人惟有漫浪叟買田吾

東坡全集 卷之十一
已決乳水况宜酒所須脩竹林深處安井臼相將
踏勝絕更裹三日糗

武昌銅劍歌 并敘

供奉官鄭文嘗官於武昌江岸裂出古銅劍文得
之以遺余治鑄精巧非鍛冶所成者

雨餘江清風卷沙雷公躡雲捕黃蛇蛇行空中如
枉矢電光煜煜燒蛇尾或投以塊鏗有聲雷飛上
天蛇入水水上青山如削鐵神物欲出山自裂細
看兩脅生碧花猶是西江老蛟血蘇子得之何所
為荆緱彈缺詠新詩君不見凌煙功臣長九尺腰

閻王具高柱頤

定惠顯師爲余竹下開齋軒

啼鳩催天明喧喧相語語誰暗蛩泣夜未唧唧自相
吊飲風蟬至潔長吟不改調食土蚓無腸亦自終
夕叫鷺禽聲寂鄙鵲喜意可料皆緣不平鳴慟哭
等嬉笑阮生已粗率孫子亦未妙道人開此軒清
坐默自照衝風振河海不能號無竅累盡吾何言
風來竹自嘯

石芝 并敘

元豐三年五月十一日癸酉夜夢游何人家開堂

西門有小園古井井上皆蒼石石上生紫藤如龍
蛇枝葉如赤箭主人言此石芝也余率爾折食一
枝衆皆驚笑其味如雞蘇而甘明日作此詩
空堂明月清且新幽人睡息來初勻了然非夢亦
非覺有人夜呼祁孔賓披衣相從到何許朱欄碧
井開瓊戶忽驚石上堆龍蛇玉芝紫筍生無數鏘
然敲折青珊瑚味如蜜藕和雞蘇主人相顧一撫
掌滿堂坐客皆盧胡亦知洞府嘲輕脫終勝嵇康
羨王烈神仙一合五百年風吹石髓堅如鐵

今年正月十四日與子由別於陳州五月子

由復至齊安未至以詩迎之

驚塵急雪清貂裘淚酒東風別死丘又向邯鄲枕
中見却來雲夢澤南州睽離動作三年計牽挽當
爲十日留早晚青山映黃髮相看萬事一時休
可謂別夢行詩云思告許
歸田去黃髮相看萬事休

遷居臨臬亭

我生天地間一蟻寄大磨區區欲右行不救風輪
左雖云走仁義未免違寒餓劍米有危炊鍼氈無
穩坐豈無佳山水借眼風雨過歸田不待老勇決
几幾箇事茲廢棄餘疲馬解鞍馱全家古江驛絕

境天為破饑貧相乘除未見可弔賀澹然無憂樂
苦語不成些

曉至巴河口迎子由

三年御史府舉動觸四壁幽幽百尺井仰天無一
席隔墻聞歌呼自恨計之失留詩不忍寫苦淚漬
紙筆餘生復何幸樂事有今日江流鏡面靜煙雨
輕幕幕孤舟如鳥鷺點破千頃碧聞君在磁湖欲
見隔咫尺朝來好風色旗尾西北擲行當中流見
笑眼青光溢此邦疑可老脩竹帶泉石欲買柯氏
林茲謀待君必

與子由同游寒溪西山

散人出入無町畦朝游湖北暮淮西高安酒官雖
未上兩脚垂欲穿塵泥與君聚散若雲雨共惜此
日相提携千搖萬元到樊口一箭放溜先鳧鷖層
層草木暗西嶺瀏瀏霜雪鳴寒溪空山古寺亦何
有歸路萬頃青玻璃我今漂泊等鴻鴈江南江北
無常栖幅巾不擬過城市欲踏徑路開新蹊路有
武昌者却憂別後不忍到見子行迹空餘悽吾
儕流落豈天意自坐迂濶非人擠行逢山水輒羞
歎此去未免慙鹽齏何當一遇李八百相哀白髮

分刀圭

李八百宅在筠州

次韻荅子由

平生弱羽寄衝風此去歸飛識所從
好語似珠穿一一忘心如膜退重重
山僧有味寧知子瀧吏無言只笑儂
尚有讀書清淨業未容春睡敵千鍾

和何長官六言次韻

作邑君真伯厚去官我豈曼容一屨願託仁政六字難磨變風

五噫已出東洛三復願比南容學道未從潘盎海

謂益為益潘近世得道者也

草書猶似揚風揚風式也

石渠何須反顧水驛幸足相容長江大欲見鹿探支八月涼風

清風初號地籟明月自寫天容貧家何以娛客但知抹月批風

青山自是絕色無人誰與爲容說向市朝公子何殊馬耳東風

觀張師正所蓄辰砂

將軍結髮戰蠻溪篋有珠玕勝象犀漫說玉牀分箭鏃何曾金鼎識刀圭近聞猛虎收丹穴欲助君王鑄裴蹄多少空巖人不見自隨初日吐虹霓

五禽言并敘

梅聖俞嘗作四禽言余謫黃州寓居定惠院遶舍皆茂林脩竹荒池蒲葦春夏之交鳴鳥百族上人

多以其聲之似者名之遂用聖俞體作五禽言

使君向蘄州更唱蘄州鬼我不識使君寧知使君

死人相作鬼會不免使君已老知何晚王元之自黃移蘄州

聞啼鳥問其名或對曰此名蘄州是元之大惡之果卒於蘄

南山昨夜雨西溪不可渡溪邊布谷兒勸我脫破

袴不詞脫袴溪水寒水中照見催利癩古人謂布袴破

去年麥不熟挾彈規我肉今年麥上場處處有殘

粟豐年無象何處尋聽取林間快活吟此鳥聲云麥熟快活即

力作力作蠶絲一百箔籠上麥頭昂林間桑子落

願儂一箔千兩絲繅絲得蛹飼爾雛此鳥聲云蠶絲一百箔

姑惡姑惡姑不惡妾命薄君不見東海孝婦死作

三年乾不如廣漢龐姑去却還姑惡水鳥也俗云婦以姑虐死故其

次韻子由病酒肺疾發

憶子少年時肺喘疲坐卧喊呀或終日勢若風雨

憶子少年時肺喘疲坐卧喊呀或終日勢若風雨

過虛陽作浮漲客冷仍下墮妻孥恐悵望噲炙不
登坐終年禁晚食半夜發清餓胃強鬲苦滿肺歛
腹輒破三彭恣啖齧二豎肯逋播寸田可治生誰
勸耕黃稷新法方田謂上腴為黃稷探懷得真藥不待君臣佐
初如雪花積漸作櫻珠大隔墻聞三燕隱隱如轉
磨自茲失故疾陽唱陰輒和神仙多歷試中路或
坎坷平生不盡噐痛飲知無柰舊人眼看盡老伴
餘幾箇殘年一斗粟待子同春飯云何不自珍醉
病又一挫真源結梨棗世味等糠莖耕耘當待穫
願子勸自課相將賦遠遊仙語不用些

正月二十日往岐亭郡人潘古郭三人送

於女王城東禪莊院

一本作代書寄桃山居士張聖可

十日春寒不出門不知江柳已搖村稍聞泱泱流
冰谷盡放青青沒燒痕數畝荒園留我住半饅濁
酒待君溫去年今日關山路細雨梅花正斷魂

鐵拄杖并敘

柳真齡字安期閩人也家寶一鐵拄杖如柳栗木
牙節宛轉天成中空有簧行輒微響柳云得之浙
中相傳王審知以遺錢鏐鏐以賜一僧柳偶得之
以遺余作此詩謝之

柳公手中黑虵滑千年老根生乳節忽聞鏗然不
甲聲四坐驚顧知是鐵含箐腹中細泉語迸火石
上飛星裂公言此物老有神自昔閩王餉吳越不
知流落幾人手坐看變滅如春雪忽然贈我意安
在兩脚未許甘衰歇便尋轍迹訪崆峒徑渡洞庭
探禹穴披榛覓藥採芝菌刺虎縱蛟擗蛇蝎會教
化作兩錢錐歸來見公未華髮問我鐵君無恙否
取出摩挲向公說

與潘三失解後飲酒

千金獎帚人誰買半額蛾眉世所妍顧我自爲都

眊睺憐君欲鬪小婢娟青雲豈易量他日黃菊猶
應似去年醉裏未知誰得喪滿江風月不論錢

東坡八首并敘

余至黃二年日以困匱故人馬正卿哀予乏食爲
於郡中請故營地數十畝使得躬耕其中地既久
荒爲茨棘瓦礫之場而歲又大旱墾闢之勞筋力
殆盡釋耒而歎乃作是詩自愍其慙庶幾來歲之
入以忘其勞焉

廢壘無人顧頽垣滿蓬蒿誰能捐筋力歲晚不償
勞獨有孤旅人天窮無所逃端來拾瓦礫歲旱土

不膏崎嶇草棘中欲刮一寸毛喟焉釋耒歎我廩
何時高

荒田雖浪莽高庫各有適下隰種杭社東原蒔棗
粟江南有蜀士桑果已許乞好竹不難栽但恐鞭
橫逸仍須卜佳處規以安我室家童燒枯草走報
暗井出一飽未敢期瓢飲已可必

自惜有微泉來從遠嶺背穿城過聚落流惡壯蓬
艾去為柯氏陂十畝魚蝦會歲旱泉亦竭枯萍粘
破塊昨夜南山雲雨到一犁外泫然尋故瀆知我
理荒蒼泥芹有宿根一寸嗟獨在雪芽何時動春

鳩行可膾蜀人黃芹芽膾

種稻清明前樂事我能數毛空暗春澤鹹水聞好

語蜀人以細雨為雨毛稱初分秧及初夏漸喜風

葉舉月明看露上一珠垂縷秋來霜穗重顛倒

相撐柱但聞畦壟間蚱蟥如風雨蜀中稻熟時蚱蟥羣飛田間如

小蝗狀而不害稻新春便入甌玉粒照筐筥我久食官倉

紅腐等泥土行當知此味口腹吾已許

良農惜地力幸此十年荒桑柘未及成一麥庶可

望投種未逾月覆塊已蒼蒼農夫告我言勿使苗

葉昌君欲富餅餌要須縱牛羊再拜謝苦言得飽

不敢忘

種棗期可剥種松期可斲事在十年外吾計亦已
慤十年何足道千載如風電舊聞李衡如此策疑
可學我有同舍郎官居在瀟岳李公擇也遺我三寸棋
照坐光卓帶百栽儻可致當及春冰渥想見竹籬
間青黃垂屋角

潘子久不調沽酒江南村郭生本將種賣藥西市
垣古生亦好事恐是押牙孫家有十畝竹無時客
叩門我窮交舊絕三子獨見存從我於東坡勞餉
同一餐可憐杜拾遺事與朱阮論吾師卜子夏四

潘皆躬昆

馬生本窮士從我二十年日夜望我貴求分買山
錢我今反累生借耕輟茲田刮毛龜背上何時得
成羶可憐馬生癡至今誇我賢衆笑終不悔施一
當獲千

題織錦圖上回文三首

春晚落花餘碧草夜涼低月半枯桐人隨遠鴈邊
城暮雨映疎簾繡閣空
紅手素絲千字錦故人新曲九回腸風吹絮雪愁
繁骨淚酒縑書恨見郎

羞看一首回文錦錦似文君別恨深頭白自吟悲
賦客斷腸愁是斷絃琴

姪安節遠來夜坐三首

南來不覺歲崢嶸坐撥寒灰聽雨聲遮眼文書元
不讀伴人燈火亦多情嗟予潦倒無歸日今汝蹉
跎已半生免使韓公悲世事白頭還對短長檠
心衰面改瘦崢嶸相見惟應識舊聲永夜思家在
何處殘年知汝遠來情畏人默坐成癡鈍問舊鷺
呼半死生夢斷酒醒山雨絕笑看饑鼠上燈檠
落第汝爲中酒味吟詩我作忍饑聲便思絕粒真

無策苦說歸田似不情腰下牛閑方解佩洲中奴
長足爲生大弔一池何緣穀已覺翻翻不受檠

冬至日贈安節

我生幾冬至少小如昨日當時事父兄上壽拜脫
膝十年閱凋謝白髮催衰疾瞻前惟兄三顧後子
由一近者隔濤江遠者天一壁今朝復何幸見此
萬里矻憶汝總角時啼笑爲黎粟今來能慷慨志
氣堅鐵石諸孫行復爾世事何時畢詩成却超然
老淚不成滴

岐亭道上見梅花戲贈季常

蕙死蘭枯菊亦摧返魂香入嶺頭梅數枝殘綠風
吹盡一點芳心雀啁開野店初嘗竹葉酒江雲欲
落豆楷灰行當更向釵頭見病起烏雲正作堆

樂全先生生日以鐵拄杖爲壽二首

先生真是地行仙住世因循五百年每向銅人話
疇昔故教鐵杖鬪清堅入懷冰雪生秋思倚壁較
龍護晝眠遙想人天會方丈衆中驚倒野狐禪
三年相伴影隨身踏遍江湖草木春摘石舊痕猶
作眼閉門高節欲生鱗畏塗自衛真無敵捷徑爭
先却累人遠寄知公不嫌重筆端猶自幹千鈞

杭州故人信至齊安

昨夜風月清夢到西湖上初來聞好語扣戶得吳
餉輕圓白灑荔脆醞紅螺醬更將西庵茶勸我洗
江瘴故人情義重說我必西向一年兩僕夫千里
問無恙相期結書社故人相約釀錢雇木怕供詩
僕未一歲再至黃帳僕頃以詩得罪有司移物取境內
所留詩杭州供數百首謂之詩帳還將夢魂去
一夜到江漲江漲杭州橋名

送牛尾狸與徐使君時大雪中

風捲飛花自入帷一樽遙想破愁眉泥深厭聽雞
頭鶻蜀人謂泥骨雞頭鶻酒淺欣嘗牛尾狸通印子魚猶

帶骨披綿黃雀漫多脂慙勤送去煩纖手爲我磨
刀削玉肌

四時詞

春雲陰陰雪欲落東風和冷驚羅幕漸看遠水綠
生漪未放小桃紅入夢佳人瘦盡雪膚肌眉斂春
愁知爲誰深院無人剪刀響應將白紵作春衣
垂柳陰陰日初永蔗漿酪粉金盃冷簾額低垂紫
燕忙蜜脾已滿黃蜂靜高樓睡起翠眉顰枕破斜
紅未肯勻玉腕半拖雲碧袖樓前知有斷腸人
新愁舊恨眉生綠粉汗餘香在蘄竹象牀素手熨

寒衣爍爍風撼動華屋夜香燒罷掩重扃香露
濛月滿庭抱琴轉軸無人見門外空聞裂帛聲
霜葉蕭蕭鳴屋角黃昏斗覺羅衾薄夜風搖動鎮
幃竿酒醒夢回聞雪落起來呵手畫雙鴉醉臉輕
勻襯眼霞真態香生誰畫得玉奴纖手嗅梅花
太守徐君猷通守孟亨之皆不飲酒諷戲之
云

孟嘉嗜酒桓温笑徐顛狂言孟德疑公獨未知其
趣爾臣今時復一中之風流自有高人識通介寧
隨薄俗移二子有靈應撫掌吾孫還有獨醒時

雪後到乾明寺遂宿

門外山光馬亦驚，堦前屐齒我先行。
風花誤入長春苑，雪月長臨不夜城。
未許牛羊傷至潔，且看鴉鵲弄新晴。
更須携被留僧榻，待聽摧簷瀉竹聲。

伯父送先人下第歸蜀詩云：人稀野店休安枕，路入靈關穩跨驢。安節將去爲誦此句，因以爲韻作小詩十四首送之。

索漠齊安郡，從來着放臣。如何風雪裏，更送獨歸人。

瘦骨寒將斷，衰髭摘更稀。未甘爲死別，猶恐得生

歸

日上氣暎江，雪晴光眩野。記取到家時，鋤耰吾正把。

月明穿破裘，霜雪澁孤劒。歸來閉戶坐，默數來時店。

諸兄無可寄，一語會須酌。晚歲俱黃髮，相看萬事休。

故人如念我，爲說瘦癯栞。尚有身爲患，已無心可安。

吾兄喜酒人，今汝亦能飲。一杯歸誦此，萬事那鄴

枕

東阡在何許寒食江頭路哀哉魏城君宿草荒新墓

臨分亦泫然不爲窮途泣東阡時一到莫遣牛羊入

我夢隨汝去東阡松栢青却入西州門永愧比山靈

乞墦何足羨負米可忘艱莫爲無車馬含羞入劍關

我坐名過實謹譁自招損汝幸無人知莫厭家山

穩

竹筥與練裙隨時畢婚嫁無事若相思征鞍還跨

萬里却來口一庵仍獨居應笑謀生拙團團如磨驢

和王鞏六首並次韻

君談陽朔山不作一錢直巖藏兩頭虺瘴落千仞翼雅宜驩堯放頗訝虞舜陟暨來已可畏覽鏡憂面黑况子二年囚苦霧變飲食吉人終不死仰荷天地德我來黃岡下歆枕江流碧江南武昌山向

我如咫尺春蔬黃土軟凍筍蒼崖折此行我累君
乃反得安宅遙知丹穴近爲斲岫巉石他年分刀
圭名字挂仙籍君許惠桂州丹砂

少年帶刀劍但識從軍樂老大服犁鋤解佩付鎔
鑠雖無獻捷功會賜力田爵敲冰春擣紙刈葦秋
織箔櫟林斬冬炭竹塢收夏籜四時俯有取一飽
天所酢君生統綺間欲學非其脚左右玉織織束
薪誰爲縛勿令聞此語翠黛頰將惡笑我一間茆
婦姑紛六鑿

欲結千年實先摧二月花故教窮到骨要使壽無

涯久已逃天網何須服日華賓州在何處爲子上

栖霞

樓名

鄰里有異趣何妨傾蓋新殊方君莫厭數面自成
親默坐無餘事回光照此身他年赤墀下玉立看
垂紳

平生我亦輕餘子晚歲人誰念此翁巧語屢曾遭
蕙苴庾詞聊復託芴藥子還可責同元亮妻却差
賢勝敬通若問我貧天所賦不因遷謫始囊空
君家玉臂貫銅青下客何時見日成勤把鈇黃記
宮樣莫教絃管作蠻聲薰衣漸歎徭香少擁髻遙

憐夜語清記取北歸携過我南江風浪雪山傾
南江赴任
不一過我

記夢回文二首 并敘

十二月二十五日大雪始晴夢人以雪水烹小團
茶使美人歌以飲余夢中爲作回文詩覺而記其
一句云亂點餘花唾碧衫意用飛燕唾花故事也
乃續之爲二絕句云

醜顏玉盃捧纖纖亂點餘花唾碧衫歌咽水雲凝
靜院夢驚松雪落空巖

空花落盡酒傾缸日出山融雪漲江紅焙淺甌新

火活龍團小碾闢晴窓

三朶花 并敘

房州通判許安世以書遺余言吾州有異人常戴
三朶花莫知其姓名郡人因以三朶花名之能作
詩皆神仙意又能自寫真人有得之者許欲以一
本見惠乃爲作此詩

學道無成鬢已華不勞千劫漫烝砂歸來且看一
宿覺未暇遠尋三朶花兩手欲遮餅裏雀四條深
怕井中蛇畫圖要識先生面試問房陵好事家

次韻陳四雪中賞梅

臘酒詩催熟寒梅雪鬪新杜陵休歎老韋曲已先
春獨秀驚凡目遺英卧逸民高歌對三白遲莫慰
安仁

正月二十日與潘郭二生出郊尋春忽記去
年是日同至女王城作詩乃和前韻

東風未肯入東門走馬還尋去歲村人似秋鴻來
有信事如春夢了無痕江城白酒三杯釀野老蒼
顏一笑温已約年年爲此會故人不用賦招魂

是日偶至野人汪氏之居有神降於其室自
稱天人李全字德通善篆字用筆奇妙而字

不可識云天篆也與予言有所會者復作一
篇仍用前韻

酒渴思茶漫扣門那知竹裏是山村已聞龜策通
神語更看龍蛇落筆痕色瘁形枯應笑屈道存目
擊豈非温歸來獨掃空齋卧猶恐微言入夢魂

浚井

古井没荒萊不食誰爲側斲罌下兩綆蛙蚓飛白
尺腥風被泥滓空響聞點滴上除青青芹下洗鑿
鑿石沾濡愧童僕盃酒暖寒栗白水漸泓渟青天
落寒碧云何失舊穢底處來新潔井在無有中無

來亦無失

紅梅三首

怕愁貪睡獨開遲自恐冰容不入時故作小紅飛
杏色尚餘孤瘦雪霜姿寒心未肯隨春態酒暈無
端上玉肌詩老不知梅格在更看綠葉與青枝石曼卿紅梅詩云認苑無綠葉辨杏有青枝

雪裏開花却是遲何如獨占上春時也知造物含
深意故與施朱發妙姿細雨裛殘千顆淚輕寒瘦
損一分肌不應便雜夭桃杏半點微酸已著枝
幽人自恨探春遲不見檀心未吐時丹鼎奪胎那

是寶

朱砂紅眼謂之不奪胎色

玉人頰頰更多姿抱叢暗蕊初

含子落盞穠香已透肌乞與徐熙新畫樣竹間瓏
璨出斜枝

和子由寄題孔平仲草庵次韻

逢人欲覓安心法到處先為問道庵盧子不須從
若士蓋公嘗自過曹參羨君美玉經三火笑我枯
桑困八蠶猶喜大江同一味故應千里共清甘

二蟲

君不見水馬兒步步逆流水大江東流日千里此
蟲趯趯長在此君不見鷄濫堆決起隨衝風隨風

一去宿何許逆風還落蓬蒿中二蟲愚智俱莫測
江邊一笑無人識

陳季常見過三首

仕宦常畏人退居還喜客君來輒館我未覺雞黍
窄東坡有奇事已種十畝麥但得君眼青不辭奴
飯白

送君四十里只使一帆風江邊千樹柳落我酒盃
中此行非遠別此樂固無窮但願長如此來往一
生同

聞君開鼉軒東檻俯喬木人言君畏事欲作鼉頭

縮我知君不然朝飯仰暘谷餘光幸分我不死安
可獨

寒食雨二首

自我來黃州已過三寒食年年欲惜春春去不容
惜今年又苦雨兩月秋蕭瑟卧聞海棠花泥汗臘
脂雪暗中偷負去夜半真有力何殊病少年病起
頭已白

春江欲入戶雨勢來不已小屋如漁舟濛濛水雲
裏空庖煮寒菜破竈燒濕葦那知是寒食但見烏
銜紙君門深九重墳墓在萬里也擬哭塗窮死灰

吹不起

徐使君分新火

臨臯亭中一危坐三見清明改新火溝中枯木應
笑人鑽斫不然誰似我黃州使君憐久病分我五
更紅一朵從來破釜躍江魚只有清詩嘲飯顆起
攜蠟炬遶空屋欲事烹煎無一可爲公分作無盡
燈照破十方昏暗鏢

次韻荅元素余舊有贈元素云天涯同是傷
流落元素以爲今日之先兆且悲當時六客
之存亡六客蓋張子野劉孝叔陳令舉李公

擇及元素與余也

不愁春盡絮隨風但喜丹砂入頰紅流落天涯先
有識摩挲金狄會當同遽遽未必都非夢了了方
知不落空莫把存亡悲六客已將地獄等天宮



國家圖書館, NATIONAL CENTRAL LIBRARY, TAIWAN, R.O.C.



東坡全集第十三卷

詩八十一首

蜜酒歌并敘

西蜀道士楊世昌善作蜜酒絕醇釀余既得其方
作此歌遺之

真珠爲漿玉爲醴六月田夫汗流泚不如春甕自
生香蜂爲耕耘花作米一日小沸魚吐沫二日眩
轉清光活三日開甕香滿城快瀉銀餅不須撥百
錢一斗濃無聲甘露微濁醞醱清君不見南園採
花蜂似雨天教釀酒醉先生先生年來窮到骨問



人乞米何曾得世間萬事真悠悠蜜蜂大勝鹽河侯

又一首答二猶子與王郎見和

脯青苔炙青蒲爛蒸鵝鴨乃瓠壺煮豆作乳脂爲
酥高燒油燭斟蜜酒貧家百物初何有古來百巧
出窮人搜羅假合亂天真詩書與我爲麴蘖醞釀
老夫成措紳質非文是終難久脫冠還作扶犁叟
不如蜜酒無燠寒冬不加甜夏不酸老夫作詩殊
少味愛此三篇如酒美封胡羯末已可憐不知更
有王郎子

謝陳季常惠一指巾

夫子胸中萬斛寬此巾何事小團團半升僅漉淵
明酒二寸纔容子夏冠好帶黃金雙得勝可憐白
紵一生酸臂弓腰箭何時去直上陰山取可汗

贈黃山人

面頰照人元自赤眉毛覆眼見來烏倦遊不擬談
玄牝示病何妨出白鬚絕學已生真定惠說禪長咲
老浮屠東坡若肯三年住親與先生看藥爐

問大治長老乞桃花茶栽東坡

周詩記苦茶茗飲出近世初緣厭梁肉假此雪昏

滯嗟我五畝園桑麥苦蒙翳不令寸地閑更乞茶
子藝饑寒未知免已作太飽計庶將通有無農末
不相戾春來凍地裂紫筍森已銳牛羊煩訶叱筐
筥未敢睨江南老道人齒髮日夜逝他年雪堂品
空記桃花裔

魚蠻子

江淮水爲田舟楫爲室居魚鰕以爲糧不耕自有
餘異哉魚蠻子本非左衽徒連排入江住竹瓦三
尺廬於馬長子孫戚施且侏儒擘水取魴鯉易如
拾諸途破釜不着監雪鱗毛青蔬一飽便其寢何
異獺與狙人間行路難踏地出賦租不如魚蠻子
駕浪浮空虛空虛未可知會當美舟車蠻子叩頭
泣勿語桑大夫

弔李臺卿并敘

李臺卿字明仲廬州人貌陋甚性介不羣而博學
強記罕見其比好左氏有史學考正同異多所發
明知天文律歷千載之日可坐數也軾謫居黃州
臺卿爲麻城主簿始識之旣罷居於廬而曹光州
演甫以書報其亡臺卿光州之妻黨也

我初未識君人以君爲笑垂頭若病鶴煙雨蓬

竅弊衣來過我危坐若持釣褚裛半面新醜茂一
語妙徐徐涉其瀾極望不得傲却觀元嫵媚士固
難輕料看書眼如月罅隙靡不照我老多遺忘得
君如再少從橫通雜藝甚博且知要所恨言無文
至老幽不耀其生世莫識已死誰復吊作詩遺故
人庶解俗子譙

曹既見和復次其韻

造物本兒戲風噫雷電笑誰令妄驚怪失七號萬
竅人人走江湖一一操網釣偶然連六鰲便謂此
手妙空令任公子三歲蹲海徼長貧固不辭一死

實未料難將著草筭除用佛眼照何人嗣家學悵
子兒尚少嗟我與公曹衰老世不要空言今無救
竒志後必耀吟公五字詩義重千金弔收藏慎勿
出免使羣兒譙

次韻孔毅甫集古人句見贈五首

羨君戲集他人詩指呼市人如使兒天邊鴻鵠不
易得便令作對隨家雞退之驚笑子美泣問君久
假何時歸世間好句世人共明月自滿千家壻
紫駝之峯人莫識雜以雞豚真可惜今君坐致五
侯鯖盡是猩脣與熊白路傍拾得半斷槍何必開

爐鑄矛戟用之如何在我耳入手當令君喪魄
天下幾人學杜甫誰得其皮與其骨劃如太華當
我前跋狎欲上驚嶒崿各章俊語紛交衡無人巧
會當時情前生子美只君是信手拈得俱天成
詩人雕刻閑草木搜抉肝腎神應哭不如默誦千
萬首左袖右取談笑足夜吟石鼎聲悲秋可憐好
事劉與侯何當一醉百不問我欲眠矣君歸休
膏明蘭臭俱自焚象牙翠羽戕其身多言自古爲
數窮微中有時堪解紛癡人但數羊羔兒不知何
者是左慈千章萬句卒非我急走捉君應已遲

六年正月二十日復出東門仍用前韻

亂山環合水侵門身在淮南盡處村五畝漸成終
老計九重新掃舊巢痕豈惟見慣沙鷗熟已覺來
多釣石溫長與東風約今日暗香先返玉梅窺

食柑

一雙羅帕未分珍林下先嘗愧逐臣露葉霜枝翦
寒碧金盤玉指破芳辛清泉蔌蔌先流齒香霧霏
霏欲噴人坐客慙慙爲收子千奴一掬柰吾貧

大寒步至東坡贈巢三

春雨如暗塵春風吹倒人東坡數間屋巢子與誰

鄰空床斂敗絮破竈鬱生薪相對不言寒哀哉知
我貧我有一瓢酒獨飲良不仁未能頽我頽聊復
濡子唇故人千鍾祿馭吏醉吐茵那知我與子坐
作寒蛩呻努力莫怨天我尔皆天民行看花柳動
共享無邊春

元脩菜

并敘

菜之美者有吾鄉之巢故人巢元脩嗜之余亦嗜
之元脩云使孔北海見當復云吾家菜邪因謂之
元脩菜余去鄉十有五年思而不可得元脩適自
蜀來見余於黃乃作是詩使歸致其子而種之東

坊之下云

彼美君家菜鋪田綠茸茸豆莢圓且小槐芽細而
豐種之秋雨餘擢秀繁霜中欲花而未萼一一如
青蟲是時青裙女採擷何忽忽蒸之復湘之香色
蔚其饒點酒下鹽豉縷橙芼薑葱那知雞與豚但
暖作青泥融始終不我負力與糞壤同我老忘家
舍楚音變兒童此物獨嫵媚終年繫余胸君歸致
其子囊盛勿函封張騫移苜蓿適用如葵菘馬援
載薏苡羅生等篙蓬懸知東坡下堵鹵化千鍾長

使齊安人指此說兩翁

二月三日點燈會客

江上東風浪接天苦寒無賴破春妍試開雲夢羔
兒酒快瀉錢塘藥王船蠶市光陰非故國馬行燈
火記當年冷烟濕雪梅花在留得新春作上元

上巳日與二三子携酒出游隨所見輒作數

句明日集之爲詩故詞無倫次

薄雲霏霏不成雨杖藜曉入千花塢柯丘海棠吾
有詩獨笑深林誰敢侮三杯卯酒人徑醉一枕春
睡日亭午竹間老人不讀書留我閉門誰教汝出

簷藜積十圍大寫直素壁千蛟舞東坡作塘今幾
尺携酒一勞農工苦却尋流水出東門壞垣古塹
花無主卧開桃李爲誰妍對立鷓鴣相媚嫵開鉞
藉草勸行路不惜春衫汗泥上褰裳共過木草亭
扣門却入韓家園轆轤繩斷井深碧鞦韆索挂人
何所映簾空復小桃枝乞漿不見磨門女南上古
臺臨斷岸雪陣翻空迷仰俯故人餽我玉葉羹火
冷煙消誰爲煮崎嶇束蘊下荒徑姪姪隔花聞好
語更隨落景盡餘樽却傍孤城得僧宇主人勸我
洗足眠倒床不復聞鐘鼓明朝門外泥一尺始悟

三更雨如許平生所向無一遂茲遊何事天不阻
固知我友不終窮豈弟君子神所予

日日出東門

日日出東門步尋東城遊城門抱關卒笑我此何
求我亦無所求駕言寓我憂意適忽忘返路窮乃
歸休懸知百歲後父老說故侯古來賢達人此路
誰不由百年寓華屋千載歸山丘何事羊公子不
肯過西州

南堂五首

江上西山半隱堤此邦臺館一時西南堂獨有西
南向卧看千帆落淺溪

莫年眼力嗟猶在多病顛毛却未華故作明窓書
小字更開幽室養丹砂

他時雨夜困移床坐厭秋聲點客腸一聽南堂新
瓦響似聞東塢小荷香

山家爲割千房蜜稚子新畦五畝蔬更有南堂堪
著客不憂門外故人車

掃地焚香閉閣眠簟紋如水帳如煙客來夢覺知
何處挂起西窓浪接天

次韻子由種杉竹

吏散空庭雀噪簷閉門獨宿夜厭厭似聞梨棗同
時種應與杉篁刻日添糟麴有神薰不醉雪霜誇
健巧相沾先生坐待清陰滿空使人人歎滯淹

孔毅甫妻挽詞

結襦記初歡同亢期晚歲擇夫得溫嶠生子勝王
濟高風相賓友古義仍兄弟從君吏隱中窮達初
不計云何抱沉疾俯仰便一世幽陰淒房櫳芳澤
在中袂百年縱得滿此路行亦逝那將有限身長
瀉無益涕君文照今古不比山石脆當觀千字誅
寧用百金瘞

次韻孔毅甫久旱已而甚雨三首

饑人忽夢飯甕溢夢中一飽百憂失只知夢飽本
來空未悟真饑定何物我生無田食破碗爾來硯
枯磨不出去年太歲空在酉傍舍壺漿不容乞今
年旱勢復如此歲晚何以黔吾突青天蕩蕩呼不
聞况欲稽首號泥佛甕中蜴蜥尤可笑跂跂昧昧
何等秩陰陽有時雨有數民是天民天自卹我雖
窮苦不如人要亦自是民之一形容可似喪家狗
未肯弭耳爭投骨倒冠落幘謝朋友獨與蚊雷共
圭華故人嗔我不開門君視我門誰肯屈可憐明

月如潑水夜半清光翻我室風從南來非雨候且
為疲人洗烝鬱褰裳一和快哉謹未暇饑寒念明
日

去年東坡拾瓦礫自種黃桑三百尺今年刈草蓋
雪堂日炙風吹面如墨平生懶惰今始悔老大勤
農天所直沛然例賜三尺雨造化無心悅難測四
方上下同一雲甘霖不為龍所隔

俗有分龍日

蓬蒿下

濕迎曉未燈火新涼催夜織老夫作罷得甘寢卧
聽墻東人響破奔流未已坑谷平折葦枯荷恣漂
流為貧儒麤糲支百年力耕不受衆目憐破破漏水

不耐旱人力未至求天全會當作塘徑千步橫斷
西北遮山泉四鄰相率助舉杵人人知我囊無錢
明年共看決渠雨饑飽在我寧關天誰能伴我田
間飲醉倒惟有支頭顛

天公號令不再出十日愁霖併為一君家有田水
冒田我家無田憂入室不如西州楊道士萬里隨
身惟兩膝汨流不惡沂亦佳一葉扁州任漂突山
芎麥麴都不用泥行露宿終無疾夜來饑腸如轉
雷旅愁非酒不可開楊生自言識音律洞簫入手
清且哀不須更待秋井塌見人白骨方銜盃

初秋寄子由

百川日夜逝物我相隨去惟有宿昔心依然守故處憶在懷遠驛閉門秋暑中藜羹對書史揮汗與子同西風忽淒厲萬葉穿戶牖子起尋袂衣感歎執我手朱顏不可恃此語君勿疑別離恐不免功名定難期當時已悽斷况此兩衰老失塗旣難追學道恨不早買田秋已議築室春當成雪堂風雨夜已作對床聲

和黃魯直食筍次韻

飽食有殘肉饑食無餘菜紛然生喜怒似被狙公

賣介來誰獨覺凜凜白下宰

太古和古
台下

一飯在家僧

至樂且不壞多生味蠹簡食筍乃餘債蕭然映樽俎未肯雜菘芥君看霜雪姿里稚已耿介胡爲遭暴橫三嗅不忍啜朝來忽解箨勢迫風雷噫尚可餉三問飯筒纏五采

聞子由爲郡僚所摈恐當去官

少學不爲身宿志固有在雖然敢自必用舍置度外天初若相我發迹造宏大豈敢負所付捐軀欲投會寧知事大繆舉步得狼狽我已無可言墜甑難追悔子雖僅自免雞肋安足賴低回畏罪罟

俛敢言退若人疑或使爲子得微罪時哉歸去來
共抱東坡耒

次韻王鞏南遷初歸二首

問君謫南賓野葛食幾尺逢人瘴髮黃入市胡眼
碧三年不易過坐睨倚天壁歸來貌如故妙語仍
破鑄那能廢詩酒亦未妨禪寂願爲尚書郎還賜
尚方烏

江家舊池臺脩竹圍一尺歸來萬事非惟見秦淮
碧平生痛飲處遺黑鴉棲壁西來故交客金印雜
鳴鏑三槐老更茂花絮春寂寂中微未可料家廟

藏赤烏

孔毅甫以詩戒飲酒問買田且乞墨竹次其
韻

酒中真復有何好孟土雖賢未聞道醉時萬慮一
掃空醒後紛紛如宿草十年揩洗見真妄石女無
兒焦穀稿此身何異貯酒瓶滿輒予人空自倒武
昌痛飲豈吾意性不違人遭客惱君家長松十畝
陰借我一庵聊洗心我田方寸耕不盡何用百頃
糜千金枕書睡熟呼不起好學憐君工雜擬且將
墨竹換新詩潤色何須待東里

任師中挽詞

大任剛烈世無有疾惡如風朱伯厚小任溫毅老
更文聰明慈愛小馮君兩任才行不須說疇昔並
友吾先人相看半作晨星沒可憐太白與殘月大
任先去冢未乾小任相繼呼不還強寄一樽生死
別樽中有淚酒應酸貴賤賢愚同盡耳君家不盡
緣賢子人間得喪了無憑只有天公終可倚

子由作二頌頌石臺長老同公手寫蓮經字
如黑蟻且誦萬遍脇不至席二十餘年予亦
作二首

眼前擾擾黑虬蟬口角霏霏白唾珠要識吾師無
礙處試將燒却看嗔無

眼睛心地兩虛圓脇不霑床二十年誰信吾師非
不睡睡蛇已死得安眠

鄧忠臣母周挽詞

微生真草木無處謝天力慈顏如春風不見桃李
實古今抱此恨有志俯仰失公子豈先知戰戰常
惜日吾君日月照委曲到肝膈哀哉人子心吾何
愛一邑家庭拜前後粲然發笑色豈比黃壤下焚
瘞千金璧若人道德人視此亦戲劇聊償曾閔意

遽與仙佛寂孤纍臥江渚未望墳墓隔作詩相楚
挽感慟淚載滴

徐君猷挽詞

一舸南遊遂不歸清江赤壁照人悲請看行路無
從涕盡是當年不忍欺雪後獨來栽柳處竹間行
復採茶時山城散盡樽前客舊恨新愁只自知

和蔡景繁海州石室

芙蓉仙人石蔓卿也舊遊處蒼藤翠壁初無路戲將桃
核裹黃泥石間散擲如風雨坐令空山出錦繡綺
天照海花無數花間石室可容卓流蘇寶蓋窺靈

宇何年霹靂起神物玉棺飛出王喬墓當時醉卧
動千日至今石縫餘糟醕仙人一去五十年花老
室空誰作主手植數松今偃蓋蒼髯白甲低瓊戶
我來取酒酌先生後車仍載胡琴女一聲冰鐵散
巖谷海鳥瀾翻松為舞爾來心賞復何人持節中
郎醉無伍獨臨斷岸呼出口紅波碧巘相吞吐徑
尋我語覓餘聲拄杖彭鏗叩銅鼓長篇小字遠相
寄一唱三歎神淒楚江風海雨入牙頰似聽石室
胡琴語我今老病不出門海山巖洞知何許門外
桃花自開落床頭酒甕生塵土前年開閣放柳枝

東坡全集 卷之十一
今年洗心參佛祖夢中舊事時一笑坐覺俯仰成
今古願君不用刻此詩東海桑田真日暮

和秦太虛梅花

西湖處士骨應槁只有此詩君壓倒東坡先生心
已灰爲愛君詩被花惱多情立馬待黃昏殘雪消
遲月出早江頭千樹春欲闌竹外一枝斜更好孤
山山下醉眠處點綴裙腰紛不掃萬里春隨逐客
來十年花送佳人老去年花開我已病今年對花
還草草不如風雨卷春歸收拾餘香還畀昊

再和潛師

化工未識蘇群槁先向寒梅一傾倒江南無雪春
瘴生爲散冰花除熱惱風清月落無人見洗粧自
趁霜鐘早惟有飛來雙白鷺玉羽瓊林闔清好吳
山道人心似水眼淨塵空無可掃故將妙語寄多
情橫機欲試東坡老東坡習氣除未盡時復長篇
書小草且撼長條餐落英忍饑未擬窮呼昊

橄欖

紛紛青子落紅鹽正味森森苦且嚴待得微甘回
齒頰已輸崖蜜十分甜

海棠

東風嫋嫋泛崇光香霧霏霏月轉廊只恐夜深花
睡去更燒高燭照紅粧

東坡

雨洗東坡月色清市人行盡野人行莫嫌犖确坡
頭路自愛鏗然曳杖聲

生日王郎以詩見慶次其韻并寄茶二十一
片

折楊新曲萬人趨獨和先生于為干但信櫝藏終
自售豈知盤脫本無樵竭從冰叟來游宦肯伴瞿
仙亦號儒棠棣並為天下士芙蓉曾到海邊郭不

嫌霧合霾松栢終恐虹梁荷棟榑高論無窮如錯
屑小詩有味似連珠感君生日遙稱壽祝我餘年
老不枯未辦報君青王案建溪新餅截雲腴

列貴州

病瘡老馬不任鞮猶向君王得敝帷桑下豈無三
宿戀樽前聊與一身歸長腰尚載撐腸米闊領先
裁蓋瘦衣投老江湖終不失來時莫遣故人非

過江夜行武昌山上聞黃州鼓角

清風弄水月銜山幽人夜渡吳王峴黃州鼓角亦
多情送我南來不辭遠江南又聞出塞曲半雜江

聲作悲健誰言萬方聲一槩鼉憤龍愁為余變我
記江邊枯柳樹未死相逢真識面他年一葉沂江
來還吹此曲相迎餞

自興國往筠宿石田驛南二十五里野人舍
溪上青山三百疊快馬輕衫來一抹倚山脩竹有
人家橫道清泉知我渴芒鞋竹杖自輕軟蒲薦松
床亦香滑夜深風露滿中庭惟見孤螢自開闔

將上筠先寄遲適遠三猶子

露宿風餐六百里明朝飲馬南江水未見豐盈犀
角兒先逢王雪王郎子

時道逢王郎於建昌方北行也

對床欲作

連夜語念汝還須戴星起夜來夢見小於菟

遠小名於菟

兒猶是髧髦垂兩耳憶過濟南春未動三子出迎
殘雪裏我時移守古河東酒肉淋漓渾舍喜而今
憔悴一羸馬逆旅擔夫相汝尔出城見我定驚嗟
身健窮愁不須耻我為乃翁留十日掣電一歡何
足恃惟當火急作新詩一醉兩翁勝酒美

端午游真如遲適遠從子由在酒局

一與子由別却數七端午身隨綵絲繫心與昌歎
苦今年疋馬來佳節日夜數兒童喜我至典衣具
雞黍水餅既懷鄉飯筒仍愍楚謂言必一醉快作

西川語寧知是官身糟麴困薰煮獨携三子出古
刹訪禪祖高談付梁羅詩律到阿虎歸來一調笑
慰此長齟齬

梁羅遲
迺小名

別子由三首

兼別遲

知君念我欲別難我今此別非他日風裏楊花雖
未定雨中荷葉終不濕三年磨我費百書一見何
止得雙璧願君亦莫歎留滯六十小劫風雨疾
先君昔愛洛城居我今亦過高山麓水南卜宅吾
豈敢試向伊川買脩竹又聞緱山好泉眼傍市穿
林瀉冰玉遙想茆軒照水開兩翁相對清如鵠

兩翁歸隱非難事惟要傳家好兒子憶昔汝翁如
汝長筆頭一落三千字世人聞此皆大笑慎勿生
兒兩翁似不知榜檟薦明堂何似監車壓千里

初別子由至奉新作

雙鵲先我來飛上東軒背書隨好夢到人與佳節
會一歡難把玩回首了無在却渡來時溪斷橋號
淺瀨茫茫暑天闊藹藹孤城背青山眊噪中落日
淒涼外盛衰豈吾意離合非所礙何以解我憂粗
了一事大

同年程筠德林求先墳二詩